

من حياة الحياة

تمثيلان ذاتا فصل واحد

تأليف
أحمد حسين
الحامى



١٦، ١٧ شارع صريح سعد بالقاهرة

إلى روح أخى الشهيد
قدّيس الوطنية والإسلام
الدكتور مصطفى العركيل

بسم الله الرحمن الرحيم

تصدير للمؤلف

هاتان قصتان منتزعتان من صميم الحياة ، انفعلت بهما ابان وقوعهما اذ قدر لي أن أكون أحد شهودهما في كلتا الحالتين .

وقد طلب مني في أحد المناسبات أن ضع شيئا للمسرح فلم أتردد لحظة في اتخاذ هاتين الحادثتين موضوعا لمسرحيتين قصيرتين ذاتا فصل واحد يستغرق تمثيل كل منهما ساعة وبعض الساعه .

وقد أشير على بأن أخلق من الحادثة الثانية «ليلة الحساب» مسرحية ذات ثلاثة أو أربعة فصول ، ولكن لم أشأ أن أجعل للخيال نصيبا كبيرا في سرد هذه القصة ، وقد أتيح لي أن أشهد فصلها الأخير فأثرت أن أقدمها على هذه الصورة الواقعية التي تمت بها .

وقد جرنى هذا الحرص على الواقعية الى ما اعتبره نقصا في الروايتين وهو استخدام اللغة العامية في معالجة الموضوعين . فأنامن المؤمنون بتفوق اللغة العربية في علاج أى عمل أدبي يراد أن يتحقق له النجاح من حيث الانتشار والبقاء . فاللغة العربية هي وحدها التي تربط أجزاء العالم العربي على ترامي أطرافه ، واختلاف شعوبه ، وهي وحدها التي يمكن أن تطالع بعد مئات من السنين أو ألوفاها ، وليس أدل على ذلك من خلود الشعر العربي القديم وهو أعلى صور الكتابة الأدبية ، وليس ذلك قاصرا على اللغة العربية وحدها ، بل هو أمر عام في سائر اللغات فالخلود هو من نصيب المسرحيات الشعرية لا النثرية .

ولكنها الواقعية وتأثيرها العميق في نفسى ، فقد أتيح لي أن أشهد الحادثتين أو بالأحرى جانبيا منهما ، وسمعت أو نقل الى مادار فيهما من حوار ، فلما جلست ، لاكتب ضغطت على هذه الصورة الحية فرحت

انقلها على القرطاس كما وقعت .
ويربطنى بالقصتين ، ويدفعنى لتصويرهما ليس مجرد رؤيتى
لهما ، بل ما انطوى عليه كل حادث منهما من فكرة عميقة تجسد
صداها فى نفسى .

الاسرة السعيدة

فالمسرحية الاولى وهى من نوع الملهاة (الكوميديا) تصور قصة
كل يوم ومشكلة كل بيت وازمة المتحابين فى صلب سواد كانوا
أزواجا أو غير أزواج .

ولطالما راعنى كيف تسوء العلاقات بين الأزواج المتحابين لكلمة
عابرة ، أو حركة طائشة ، وآخر مارأيت من هذا القبيل شجارا
عنيفا وقع بين زوجين يحسدهما كل معارفهما على السعادة التى
ينعمان بها ، ولما بحثنا عن سبب الشجار كان من التفاهة بحيث
خجل الزوجان من ذكره . ولما كانت هذه ظاهرة انسانية تصدى
لها الكتاب منذ أقدم العصور بالتصوير والتحليل فقد رأيت أن
أسجل هذا الحادث كما شهدت طرفا منه وكما روى لى أوله ، عسى
أن تنفع هذه الصورة بعض الأزواج إذا رأوها ، فيضحكون من
أنفسهم إذا كانوا من هذا الطراز ، أو يتعزون بأنهم ليسوا وحدهم
فى الميدان ، وأن الامر على ما يظهر جزء من طبيعتنا المصرية خاصة
والانسانية بصفة عامة .

ليلة الحساب

أما الحادثة الثانية فهى احدى مآسى الحياة وإذا كان للحياة جانبها
المضحك فإن لها جانبها المبكى وأنا من المؤمنين بالقضاء والقدر خير
وشره ، وليلة الحساب تجسيد لهذا القدر الذى ينسج خيوطه حولنا ،
وإذا كانت عملية التسيج دائبة بالليل والنهار ، فهى تتجلى لنا على
أشدّها عندما تقترب النهاية نهاية أى انسان منا .
فى ليلة الحساب غريمان أحدهما يمثل فى مقاييس المجتمع الشر

المطلق والثاني يمثل جانب الخير أو بالأحرى جانب المظلوم المهيض
الجنح الذي صمم على أن ينتقم لعرضه ، وسترون المآل الذي انتهى
إليه هذان الغريمان ، المنتصر والمهزوم ، المنتقم والمنتقم منه
وستقفون مشدوهين أمام سر الحياة الرهيب الذي عجز العقل
البشرى حتى الآن عن فك طلاسمه ، وما أظنه بمستطيع في يوم من
الأيام .

علاقة قديمة بالمرح

وانها لظاهرة تستوقف النظر أن من ارتبط بالمرح في أى يوم
من الأيام فلا يمكن إلا أن يعاوده الحنين إليه من جديد مهما طالت
الفرقة بينهما وتباعد العهد . ولقد هويت المسرح في شبابه المبكر ،
وتعلمت على الاستاذ يوسف وهبى ، حتى ظن أن مستقبله سيكون
في هذا الميدان ، ولكن تيار الحياة لم يلبث أن دفعنى بعيدا عن
المسرح ، وإن كان تعلقى به لم يفتر طوال هذه السنوات .

ولذلك فاني لم أتردد لحظة واحدة عندما طلب منى الاستاذ احمد غزى
صاحب المطبعة العالمية ، وقد علم بأمر هاتين الروايتين فى
مخطوطاتى ، أن اسمح له بنشرهما ، أن أوافق على ذلك شاكرا .
واذا كانت هذه الايام تشهد بعنا للحياة الفنية فى مصر عامة والمسرح
خاصة ، فاني أقدم هاتين الروايتين تحية منى للعاملين على انهاض
المسرح المصرى ، واعترافا منى برسالة الفن ودوره الخلاق فى حياة
المجتمع

شكر واجب

بقيت كلمة شكر أسجلها للفنان الكبير أخى الاستاذ بيكار ،
الذى تفضل فأهدانى صورة الغلاف وبعض المشاهد من الروايتين ،
وهكذا سد بفته العالى ما قد ينقص الروايتين من فن .
وفقنا الله جميعا لما فيه الخير والسداد .

احمد حسين



اسرة سعيدة

أو

سوسن

كوميديا أخلاقية ذات فصل واحد



أبطال الرواية


- عبد المجيد** : عبد المجيد قاسم مهندس سن ٤٢ سنة
متوسط القامة ربع الجسم - وافر الرجولة
- حسن الصورة والهندام
- سوسن** : زوجة عبد المجيد - جميلة ٠٠ رشيقة -
رزينه في حالتها العادية مفرطة في العصبية
عند اضطراب أعصابها - سن ٣٦ سنة ٠
- الشيخ صابر سالم** : رئيس محكمة شرعية متقاعد سن ٦٥ سنة
نحيف - له لحية قصيرة والد عبد المجيد
- الحاجة زينب** : زوجته - ممثلة سن ٥٧ سنة ترتدى
دائماً الطرحه البيضاء ، والد عبد المجيد
- عيشه هانم** : جارة سوسن هانم - متزوجة سن ٣٧ سنة
نصف بلدى ونصف متفرنجة
- نجوى** : فتاة جامعية سن ٢١ سنة رشيقة - طريفة
- عفريتة
- سيد عبد الحفيظ** : دكتور متقاعد سن ٧٠ سنة
ثقيل السمع وضعيف البصر - مصاب
بأمراض الشيخوخة كلها
- هناء** : سن ١٦ سنة
بالتوجيهية
- هنية** : سن ١٢ سنة
- عائى** : سن ٨ سنوات
- أولاد عبد المجيد



إهداء

بعد الانتهاء من عزف موسيقى الافتتاح يسمع في المدياع عبارة
الإهداء التالية

« الى الذين يشقون في حياتهم الزوجية أهدي هذه الصورة من
حياة أسرة سعيدة »



المنظر

صالة تتوسط الدور الأعلى في فيلا بمدينة حلوان .
في الصدر باب كبير مزخرف من الخشب والزجاج يفتح
على شرفة السلم المؤدى الى الدور الارضى .
الى الشمال بابان أحدهما يؤدى الى حجرة نوم عبد المجيد
وسوسن والاخر يؤدى الى دورة المياه والمطبخ وبينهما ساعة
حائط كبيرة دقاقة .
الى اليمين نافذة كبيرة تطل على حديقة الفيلا والجراج
بابان يؤديان الى أجزاء الدور وخاصة حجرات الاولاد .
(الاثاث عبارة عن أريكة (كنبه استديو) قد رص على
ظهرها كتب وجهاز راديو - أمام الكنبه مائدة صغيرة عليها
جهاز تسجيل - فوتيلات موزعة فى كل مكان - صور
(تأملوهات) جميلة تزين المكان وزهرات مليئة بالورد -
تليفون موضوع على ترابيزة صغيرة الى جوار حجرة النوم .

المشهد الاول

سوسن - عائشة - نجوى

(عند رفع الستار تسمع أغنية لعبد الحليم حافظ
منبثقة من جهاز التسجيل وهى أغنية « أهواك وأتمنى
لو أنساك » عند نهاية الاغنية يضحك الجميع - نجوى
تصفق)

نجوى - برافو ... برافو عبد الحليم حافظ دا رائع ... مش
عارفه ليه صوته بيأثر فى تأثير عجيب .

عائشة - مبروك يا سوسن هانم هدية جوزك الجديدة لكن ياختى

الناس يتقول ان جهاز التسجيل دا غالى جدا ، صحيح تمنه
تلتماية جنيه ؟

سوسن - هو فى السوق بيتباع بكده ، لكن صاحبك عبد المجيد
مايتخافش عليه ، اشتراه أرخص من كده كثير ، اتفق مع
واحد صاحبه فى الكويت جابه معاه ، والحاجات دى فى الكويت
رخيصة جدا ٠٠٠ كلفنا حوالى مائة جنيه .

نجوى - بس ؟! يابلاش ! دا رخيص جدا ٠٠٠ ياما نفسى يكون عندى
(ريكوردر) زى ده أسجل فيه الاغانى الى بحبها واسجل صوتى
وانا باغنى وأنا باكلم .

سوسن - يالله يا ستى الجهاز تحت أمرك « ألفهولك ؟ »

نجوى - (تضحك بسرور) متشكرة جدا ٠٠٠ مابشربوش .

عيشة - شوفى ياختى بنات الايام دى وكلامهم - (تنظر فى الساعة)
يوه ١٠٠٠ ! دا الكلام سرقنا والساعة بقت عشرة . ياللا بينا
يا نجوى قبل سوسن هانم ماتطردنا ٠٠٠ زمان عبد المجيد
بك جوزها حيطب علينا .

سوسن - والنبي تقعدوا شوية . انتو مسلينى وماعنديش حاجة
اعملها - الولاد الصغيرين ناموا - وهناء قافله على روحها زى
العادة وقاعدة تذاكر علشان امتحان التوجيهية ٠٠٠ وعبد
المجيد مش راجع قبل الساعة حداثر ، معزوم على حفلة فى
نقابة المهندسين وحيرجع بالقطر لان عربيتنا فى التصليح -
جياخد من باب اللوق قطر عشرة وتلت يوصل حلوان حداثر
ويدوبك من المحطة لهنأ خمس دقائق .

عيشة - ياختى ياسوسن ، مش حتبطلى بقى النظام بتاعك ده - هو
جوزك ده وابور اكسيريس قاعده تحسبى له بالدقيقة
والثانية !

سوسن - أنا لى حد غيره ياعيشة ، مش أمى وابويا واخواتى كلهم

عائشين وباحبهم زى مانتي عارفه ٠٠ لكن أنا ماليش الا عبد المجيد
٠٠٠ هو عندي كل شيء ٠٠٠ هو أمي وأبوي وكل عيلتي .

عائشه - ربنا ياختي يخليكو لبعض ويحوش عنكم العين ويهنيكم -
(تنتهد) أنا عارفه ياختي مش بتعليميني شوية ليه وتفهمني
السر ٠٠٠ دنا جوزي سعيد دايمًا داير على حل شعره لا أقدر
أقول له رايح فين ولا جاي منين ، وإذا غلظت مرة وقلت له
اتأخرت ليه ، تبقى يا داهيه دقي ٠٠٠ تبقى خناقه لرب السما
واسهل ما عليه يقول لي بفظاظه (تحاول أن تقلد زوجها)
وايش حشرك يا وليه في المسائل دي ؟ هو انتي وصية على
ولا أنا لسه ولد صغير - اوعى تاني مرة تتدخل في شئوني
٠٠٠ الزمي حدك أحسن لك .

نجوى - لا ٠٠٠ حقه مفيش نسبة يا آبله سوسن بين (أنكل) سعيد
وعبد المجيد بك أنكل سعيد صعب جدا عبد المجيد بالنسبة
له ملاك ٠٠٠ ملاك من السما .

سوسن - يا نجوى الدنيا هافيهاش ملايكه ، الناس كلها زى بعض
٠٠ من عجينة واحدة ، انت حاتحسدينني ولا ايه ؟
عائشه هي اختك عينها مدوره من اللى تحسد ؟

عائشه - من ناحية عينها مدورة ٠٠٠ مدورة ؟ وعلشان كده لازم
تبخرى بعد ما نمشي وتعمل عروسة ورق وتخرقها من
عينا .

سوسن - (تضحك) بعد الشر عليكم - لكن البخور دا عندنا عاده
هي نينه الحاجة والدة عبد المجيد بتنام قبل ما تبخر !

نجوى - والنبي يا آبله الحاجة بتبخر كل ليلة ؟

سوسن - تقريبا - وتقول لي انت مالكيش دعوه ، خليكوا انتو في
الفرنجة بتاعة الايام دي ٠٠٠ هو الحسد دأ مش مكتوب في
القرآن - ومن شر حاسد اذا حسد .

(تدخل هنية بقميص النوم - وهاني بالبيجاما)

المشهد الثاني

السابقون - هنيه - وهانى

سوسن - (منزعة) باسم الله الرحمن الرحيم ، ودول طلعتوا
منين دلوقت ٠٠٠ انتو لسه مانتوش ؟

هانى - مش جاى لى نوم ياماما ٠٠٠ وهنيه بتعاكسنى

سوسن - هنيه بتعاكسك ؟ ياللا ٠٠٠ ياللا بلاش كلام فارغ ٠٠٠
أنت كان لازم تكون نايم بقى لك ساعة دلوقت ٠٠ ياللا على
السريـر ٠٠٠ وانتي ياهنيه اختشى اى

هنـيه - والنـبى يا ماما ما عملت حاجة هو الى قاعد يزغد فى ويقرصنى
ويقول لى عاوز أروح أسجل فى الـريكوردر الجديـد .

سوسن - أنا قلت لك تنام الليلة وبكره الجمعة بابا حيكون قاعد فى
البيت وهو يسجل لك .

هانى - والنـبى يا ماما - عاوز أسجل حكاية من بتوع بابا شارو .

نجوى - ياختى عليه ! والنـبى يا آبله تسيبيه يعمل زى ماهو عاوز

سوسن - يا نجوى يا حبيبتي الساعة دلوقت عشرة وربع ، دا كان

لازم يكون فى عز النوم دلوقت ٠٠٠ أنما هما كده ما يصدقوا

يكون عندى ضيوف علشان يتعفرتوا ويقلبوها فوضى . من

ساعة ما رجع من المدرسة فى الضهر وهو يقول لى عاوز أسجل

٠٠ عاوز أسجل زى بابا شارو ٠٠ وبابا وعده ان بكره الصبح

حيسجل له ٠٠٠ لكن مافيش فايده وارث الدماغ الناشفة

من أبوه .

كله منك انت يا هنيه .

هنـيه - (محتجة) الله طب وأنا مالى هو كل حاجة أنا ٠٠٠ أنا طب

والله العظيم ٠٠٠ والله العظيم ولا اخسر دينى ٠٠٠

سوسن - (زاجرة اياها) هنيه ؟ وبعدين أنا مش قلت لك الفمرة

مش علوزه اسمع الكلمة الوحشة دى (لعيشه) شوفنى ياستنى
المدارس واللى بقوا بيتعلموه فى المدارس .

عيشه - حقه اسكتنى على المدارس وعمایل المدارس دلوقت !

سوسن - (لهنيه) مش بابا قال لك ألف مرة الى يحلف كثير
يبقى كداب - كم مرة بابا ضربك علشان كلمة « ولا اخسر
دينى » دى !

هنيه - (تبكى) الله ! مش انت الى قاعده تقولى كله منك ؟

سوسن - أبوه كله منك ، هو انا مش عارفاكى . . . انت بنت خبيثة
تزقيه من تحت لتحت وتعمل نفسك مالكيش دعوى .

هنيه - هو ايه ده ؟ طب والله العظيم . . . والله العظيم . . . ولا
اخسر دينى . . .

نجوى - تانى ! . . .

سوسن - شايفه آبله نجوى زعلت منك آزاي . . . ودلوقت تقول
عليكى بنت وحشه . . . ياللا . . . ياللا على النوم (تنهض
لتخرجهم وتدفعهم أمامها) ولكم على الصبح بدرى أول ما
يصحى بابا من النوم حاخليه يسجل لكم الى انتو عاوزينه . . .
ياللا . . . ياللا يا حبيبى عشان احبك . . . وانت يا هنيه
خليكى عاقله .

هانى - طب اتمسوا بالخير . . . اتمسى بالخير يا ابله نجوى .
اتمسى بالخير يا طنط عيشه .

نجوى - وانت من أهل الخير يا حبيبى .

عيشه - وانت من أهل الخير يا عنين طنط عيشه .

(يخرج هانى وهنيه)

المشهد الثالث

سوسن - عيشة - نجوى

عيشة - قمور ابنك ده ودمه زى الشربات • أنا حاجزه له « منيح »
بس خليه يتقل جيبه •

سوسن - لا ياختى على أيامهم منى هى الى حتدفع المهر •
نجوى - والنبي يظهر كده يا أبله سوسن ! لكن تعسرفى ان هانى
لفت نظرى لفكرة التسجيل ، والنبي أنا من زمان عاوزه أجرب
صوتى واشوف اذا كنت أنفع مديعة ، تعالى أسجل معاكي
حديث على الناصية •• أنا أعمل آمال فهمى وأنتى تجاوبى •
سوسن - (تضحك) أجاب على ايه يا نجوى مش تقولى أجاب
على ايه ؟ ولا كده على طول •

عيشة - طب ياللا والنبي يا سوسن هانم أما نشوف ••• طاوعى
أما نشوف تقاليعها •

نجوى - (لسوسن) وضبى الجهاز على التسجيل يا أبله •
(سوسن تعد الجهاز)

نجوى - (تقلد صوت وطريقة آمال فهمى بما فى ذلك الرقة فى
نطقها بحرف الراء)

أنا لسه ماشيه فى الجنية السابانى فى حلوان زى ما قلت
لكم ••• شايفه دلوقت واحد ست قاعده لواحدتها على مقعد
من مقاعد الحديقة وتتشتغل فى (بلوفر) صوف لونه كحل ••
دلوقت حاقرب منها واكلمها •
- صباح الخير -

سوسن - (مبتسمة) صباح النور •
نجوى - أقدر أزعجك شوية واقعد جنبك ؟

- سوسن - (تضحك) بالعكس يا افندم دا احنا تشرفنا .
نجوى - عندك مانع تكلمي في برنامج على الناصية ؟
سوسن - (تضحك) أبدا . . . أبدا مافيش مانع
نجوى - ياترى مين السعيد ده الي بتعملى له (البلوفر) ده .
سوسن - السعيد دا يا ستى يبقى جوزى .
نجوى - حاجة لطيفة خالص ، اللون جميل جدا والغرزه جنان .
سوسن - متشكره يا افندم .
نجوى - لكن يا . . . (متداركة) تسمحي تعرفيني بنفسك .
عيشه - (تضحك) جتك ايه يا نجوى تعملها وتخلي شوفى
ياختى البت !
نجوى - (مستمرة) تسمحي تعرفيني باسمك .
سوسن - سوسن قاسم .

نجوى - تشرفنا يا افندم - ايه رأيك بقى يا سوسن هانم -
ما تأخذنيش فى الراى الى حاقوله - تظنى أن عمل (بلوفر)
بسيده يستاهل التعب والمجهود الي بتبذليه فيه ؟ مش
باستطاعتك توفرى كل ده بانك تشتري واحد جاهز . . .
الدنيا تطورت والمكينات بقت بتعمل كل حاجة .

سوسن - (وقد أخذت الموضوع موضع الجد) تعب ايه ومجهود
ايه ؟ مين قال لك اني تعبانه ، بالعكس أنا فى منتهى السعادة .
طول مانا باشتغل فى (البلوفر) ده وأنا بفكر فى جوزى ومتصوراه
وهو لابس لابس وازاي حيدفيه وبعد ما أخلصه واقدمه له هدية
شوفى سعادته تبقى أد ايه ، ولما يلبسه ويعجب أصحابه ،
شوفى يبقى مبسوط أد ايه لما يقول للناس دا من شغل مراتى .
أؤكد لك ان أجمل شئ فى حياة الزوجة لما تكون بتشتغل من
أجل زوجها وأولادها ، لما تعمل لهم كل حاجة بايديها لانها

بتحط روحها ، كل حبها وحنانها فى الاكل واللبس الى بتقديمه
لجوزها وأولادها .

نجوى - يا سلام دا معنى جميل جدا ما جاش على ذهنى . . . صحيح
عندك حق ، كل الحياة الآلية والميكانيكية ما تطفى علينا ،
دا بيكون على حساب العواطف والروابط الانسانية ، لكن
يظهر يا سوسن هانم انك بتحبى جوزك جدا . . . ما تأخذنيش
أقصد يعنى انك عاشقاه لانك بتتكلمى عنه بعشق .

سوسن - كل واحدة مخلصه بتحب جوزها وعاشقاه
نجوى - يا سلام ! رأيك كده ، كل السبيلات المتجوزين بيعجبوا
أجوازهم بعشق وهيام .

سوسن - طبعا ، وأنا باكلم عن الست الطبيعية الى متجوزة جواز
طبيعى . ما دام الست تكون عاشت مع جوزها وخلقت منه
أولاد ، جوزها يبقى كل حاجة فى حياتها ، وايه هو العشق
أكثر من كده .

نجوى - غريبه خالص ، لكن أنا بالذات أعرف ستات مجوزين بيكرهوا
أجوازهم وتملى بيتخانقوا ويتضاربوا .

سوسن - حكاية الخناق دى مش دليل على حاجة ، طلعيها من
الموضوع ، هما العشاق ما بيتخانقوش وبيكون ده علامه الحب
لا الكره .

نجوى - يعنى انت موافقة على المثل الى بيقول ضرب الحبيب زى
أكل الزبيب (ضحك)

عيشه - قطع الضرب والى بيضربوا . . . بلا زبيب . . . بلا نيله .
نجوى - على كل حال يا سوسن هانم انتى بتغيرى كثير من أفكارى
. . . وأقدر أعرف بقى مين الزوج السعيد الى مجوز ست
السننات .

سوسن - يوه يا نجوى . .

نجوى . . - (مقاطعة) آمال من فضلك

سوسن - طيب ياست آمال أهو أنا برده ست زى بقيت السننات



نجوى : عندك مانع تتكلمى فى برنامج على الناصية ؟
سوسن : أبدا ... أبدا مافيش مانع

نجوى - مش ممكن تكونى زى بقيت الستات بأفكارك المدهشة دى
... وعلشان كده عاوزين نعرف اسم الزوج السعيد .

سوسن - عبد المجيد قاسم .

نجوى - عبد المجيد قاسم المهندس المشهور الى بنى العمارة الكبيرة
الى على النيل ؟

سوسن - (ضاحكة) أهوه يا ستى .

نجوى - ومجوزين من زمان يا سوسن هانم ؟

سوسن - جهاز التسجيل ده هدية عن زواجنا السبعثاشر .

نجوى - (تشبهق) سبعثاشر سنة .

سوسن - (ضاحكة) خبر ايه يا ست آمال اخص عليكى بتشبهقى
كده ليه خمسة وخميسه .

نجوى - أيوه فلتت منى دى صحيح - نبقى نمسحها من الشريط .
أنا سعيدة جدا بأنى تعرفت بأسرة نموذجية ... أسرة
سعيدة ... انتم عندكم أولاد طبعاً يا سوسن هانم .

سوسن - ثلاثة : هناء وهنيه وهانى

نجوى - يا سلام ياعنى مش بس كلهم مبتدئين بحرف الهه وانما
أساميهم كلها مشتقة من الهناء .

دى كلها حاجة نموذجية ... طب اسمحى بقى يا سوسن
هانم انى أهنيكى بجوزك وأولادك وببيتك وأتمنى لك كل
سعادة وهناء وعلشان تفضل كل حياتك « هنيه » وجوزك
هانى معاك على طول .

(ضحك)

ودلوقت بقى تحبى أسمعك آيه ؟

(ضحك ... عيشه تضرب أختها على صدرها)

عيشه - جتك ايه يا نجوى دا انت يابنت جنيه صحيح . !

نجوى - والنبي * مش أنفع مذبة يا أبله .
سوسن - دانتى تنفعى ونص ٠٠٠ دا انت غلبتى آمال فهمى .
(تدخل الحاجة زينب - سن ٥٧ - ترتدى الطرحة
البيضاء ممثلة القوام)

المشهد الرابع السابقون - الحاجة زينب

الحاجة - سالحير يا اولاد .
الجميع - (كل على حدة) سالحير ياطنط ٠٠٠ سالحير يانينه ٠٠٠
سالحير يا حاجة .
الحاجة - أنا زعلانه من نينتك جليدة يا عيشه هانم ٠٠٠ برده كده
ما تسألش عليه وأنا عيانه بقالى تسع تشهر .
عيشه - سلامتك يا حاجة ٠٠٠ هي مش رخره بعيد عنك جالهاسكر
وتقل عليها .
الحاجة - يا اختى قطع السكر ده ٠٠٠ أنا عارفه البلاوى دى بتحط
علينا منين ، يا اختى زمان لا كنا نعرف لاسكر ولا ملح ٠٠٠
هي الموضه رخره بقت فى العيا .
وانت يا نجوى ، ازيك يا شبه ٠٠٠ أنا محضره العريس ٠٠٠
عريسك عندى .
نجوى - يا طنط انتى كل ما تشوفينى تقولى لى محضره العريس ٠٠٠
انتى عندك مخزن عرسان والا ايه .
الحاجة - (مبتسمة) بس مالكيش دعوى ٠٠٠ قولى هاتى العريس
يا طنط وشوفى أجيبهولك على طول ولا لا .
نجوى - متشكرة جدا ياطنط أنا فاضل لى سنة واخلص البكالوريوس
وبعد ما اخلص عاوزه أشتغل أولا واعمل لى مركز وبعدين
أبقى أختار جوزى على كىفى ٠٠٠

الحاجه - كلام ايه دا يا اختي ؟!

سوسن - عاوزه يا ستي تشتغل مديعة ... دى مدهشة • بكره
أسمعك التسجيل الى عملناه سوا ، فضلت تحقق معايا
وتستدرجنى فى الاسئلة • مدهشه • مدهشة يانجوى •
حاسم الحديث لعبد المجيد أول ما يوصل •

الحاجه - بالحق فكرتيني ... أنا كنت طالعه أسألك مش عبس
المجيد حيرج الساعة ١٢ •

سوسن - (بلهفة) لا حيرج الساعة ١١ زمانه راجع •

الحاجه - حذاشر ؟ حقه انتى يا سوسن ؟ دانا سامعاه بودنى بيقول
لعمك الشيخ انه جاى الساعة ١٢ • أقول له كده يقول لا دا
جاى بعد كده يمكن الساعة واحدة •

سوسن - (بعصبية) يا نينه أنا متأكدة من الى بقولهولك ...
عبد المجيد قال لى انه حيرج الساعة حذاشر وعبد المجيد دايم
يحافظ على كلامه •

الحاجه - ايه على الله يا بنتى ربنا يريح قلبك ... هه خلتيكم
بالعافيه بقى أما انزل أحسن عمك تعبان شوية ... اتمسى
بالخير يا عيشه هانم • سلمى على نيتك جليلة هانم وقولى
لها سكر ولا مش سكر أنا واخده على خاطرى منها دى واحشانى
موت •

وانت يانجوى ... طاوعيني وشاورى عقلك ... بلا جامعاه
بلا بكروس وكلام فارغ قولى عاوزه يا طنط العريس وأنا
اجبهولك على طول •

نجوى - على كل حال يا طنط خليه برده فى المخزن يمكن تيجى له
عوزه •

(ضحك)

الحاجه - الله يجازى شيطانك ...
(تخرج)



الحاجة : وانت يا نجوى : طو عيني وشاوري عقلك ، قول عاوزه يا طنط
العريس وأنا اجهولك على طول

المشهد الخامس

سوسن - عيشه - نجوى

نجوى - هما بتوع زمان دول مالهمش كلام الا على العريس .
سوسن - أسكتى بقى بلاش دهل ٠٠٠ بتوع زمان وبتوع دلوقت
وفى كل وقت ٠٠٠ هى البنت لها أمنية أعظم من العريس .

عيشه - هما بردوا يا سوسن على عوايدهم مايناموش الا لما يرجع
عبد المجيد بك .

سوسن - أبوه يا ستى يقعدوا طول الليل صاحبين لغاية ما يرجع
من برا ويسمعوه يحط العربية فى الجراج ويمسى عليهم وهو
طالع السلم .

نجوى - طيب ياللا بقى يا ابله عيشه الساعة قربت على حداثر
(بخبت) وأنا مش عاوزه أبقى من العواذل .

سوسن - لا ماتخافيش لسه ثلث ساعة اقعدوا كمان عشر دقائق .
وأهو البيت جنب البيت وجوزك مسافر زى مايتقولى .

عيشه - وعلى ايه بقى القعاد الى بالدقيقة والثانية ٠٠ دا
لا ياختى تنزل حلوين كده أحسن ٠٠٠ اقعدى بالعافيه .

سوسن - أنا مش عارفه أشكركم أد ايه على الليلة الجميلة دى ٠٠٠
سلتوني وخلليتوا الوقت يفوق ما احسش بيه .

نجوى - دنا الى قضيت ليلة من أسعد الليالى . حاسبى على التسجيل
بتاعنا اوعى تمسيحيم ٠٠٠ علشان حابقى آجى اسمعه وأعرف
زأى عبد المجيد بك .

سوسن - طب اياك آمال نشوفك كثير !

نجوى - والله يا ابله أنا ما يمنعننى الا المذاكرة ٠٠٠ وساعات أفكر
آجى ٠٠٠ أخاف أزعجك .

سوسن - شوفى يا اختى نجوى ! .. تزعجيني ازاي بقى ...
طيب ابقى تعالى وازعجيني كل ما تحبى .

نجوى - طبعاً ما عدا فى الاوقات والساعات الى يكون فيها عبد
المجيد بك قاسم مشرف فى البيت .

عيشه - يقطعك يانجوى أنت يابت مش حتبطل العفرتة دى ؟

سوسن - (ضاحكة) لا وحتى لما يكون عبد المجيد فى البيت

نجوى - وعد شرف .. مافيش رجوع .

سوسن - (ضاحكة) مافيش رجوع .

نجوى - طيب أما نشوف - اتفضل انتى يا ابلة عيشه روحى وأنا

حافظل مستنيه لغاية ما ييجى عبد المجيد بك .
(تجلس)

عيشه - (تخبط على صدرها) نجوى - انت اتجنتتى ، يا بت بطل
شغل العفرتة دا انتى مابقتيش صغيره .

نجوى - مش سامعاها بتقول انها تحب تشوفنى فى كل وقت ..
طيب أنا نفسى أقعد أتفرج ، كيف يتقابل الزوجان السعيدان
العاشقان (بتمثيل) كيف يهرع الزوج الى عناق زوجته ،
وكيف ترتدى الزوجة فى أحضان زوجها . (ممثلة الزوج
والزوجة على التوالى) حبيبى .. حبيبتى .. روحى ..
حياتى .

(سوسن تضحك)

عيشه - (تجذب نجوى) يابت اختشى ... لا دانتى اجنتتى
خالص ... دانتى اتهوستى ... آل ودى الى مش عاوزه
تجوز .

سوسن - انتى عملتى المسألة رومانتيك خالص ... المناظر دى فى
السينما وعلى المسرح .

نجوى - آمال انتم بتعملوا ازاي والنبي يا أبله . . .
عيشه - يادى الفضيحة ياختى . . والنبي ياسوسن هانم
ماتأخديهاش دى البنت اتجننت .
سوسن - اجوزى وانتى تعرفى . . . خلصى البكالوريوس بشاعك
واحنا نجوزك علشان تعرفى .
نجوى - انتى رخره حتعملى زى طنط الحاجة هو العريس فى المخزن
ولا على الرف . دى مسألة حظوظ . . مين عارف (تنهد)
على كل حال (ارفوار) . . . أنا حاسامحك المرة دى واعتقك
لوجه الله .

(ضحك - عناق - قيلات (تصبحى على خير) -
يسيرون نحو باب الصدر - المسرح - خال - تدق
الساعة الحادية عشرة - تدخل سوسن بعد وداع
ضيوفها)

المشهد السادس

سوسن بمفردها

(سوسن تعود الى المسرح بنشاط تحاول أن تعيد بعض
النظام فى الصالة - تدندن بنغمة موسيقية - تتوقف
قليلا كأنها تتذكر شيئا - ثم تضحك)
- الله يجازيكى يا نجوى - (تحين منها التفاتة للساعة)
- الساعة بقت حذاشر زمانه جاى بقى .
(تذهب الى أحد أبواب اليمين وتنظر الى الداخل فى
اتجاه حجرة هناء تهتم بالدخول ولكنها تعود الى وسط
المسرح وتظهر عليها الحيرة والارتباك)
- أوف الدنيا مالها بقت حر كده . . (تذهب وتفتح
النافذة - تعود وتتنجى نحو الراديو - تعبت بمفاتيح

الراديو فتنبعث مختلف أصوات المحطات - دونه أن
تستقر على محطة - لا تلبث أن تغلق الراديو - تبحث
بين الكتب - تعثر على كتاب - تطالع عنوانه - «الوسادة
الخالية» تقرأ الاهداء - من «منى الى صديقها هناء»
طيب يا ست منى انتى وهناء أما نشوف احسان بتاعكم
دا بيقول ايه .

(تتلفت حولها - تذهب وتطفىء النور بعد أن تضىء
شمعدان كبير الى جوار الكنية الاستديو - تحاول أن
تشرع فى المطالعة متظاهرة بالبشاشة والرضا مع أن
حقيقة نفسها خلاف ذلك - لا تلبث أن ترمى الكتاب
(تذهب الى النافذة وتنظر منها بقلق) ثم تدخل الى
حجرتها .

(المسرح خال - ومظلم - الا من نور الشمعدان -
الساعة تدق الثانية عشرة (تدخل سوسن وقد بدت
فى غاية القلق - تضىء النور فى الحجرة - وتذهب
نحو التليفون)

المشهد السابع

سوسن بمفردها

سوسن - (ترفع السماعة) (بعد قليل) نينه لا مؤاخذه عن اذنك
الحط . حاكم فى التليفون - يائينة اتوغوش ازاي هو
حصل حاجه لا سمح الله علشان اتوغوش ٠٠٠ أيوه طبعا زمانه
جاي مانا عارفه ٠٠٠ أنا حاكم واحده صاحبتى .
(تدوير القرص) أحسن تكون نامت ؟ ألو ٠٠ ألو مين عفاف
هانم ؟ أنا سوسن ، أنا متأسفة جدا لازعاجك فى الساعة دى .
كنتى صاحيه ؟ صحيح ؟ طب الحمد لله . ياعنى كنت وعدتى
انك حتزورينا انتى وزكى بك وتمضوا عندنا فى حلوان يوم
بطول النهار ولا حدش شافكم ٠٠٠ كده ٠٠ كده بقى زكى

هنا - أعمل معروف والنبي ياماما سيبك من حكاية الانشغال ده ،
بعدين مزاجك يتعكر وتبقى عصبية

سوسن - (بغضب) هنا انا قلت لك الف مره مالكيش دعوه
بعصبيتى .. عصبية .. عصبية .. ماتقولوا مجنونونه
وتخلصوا

هنا - بعد الشر عليكى ياماما .. انتى زعلتى .. حقك على يارتنى
ماجيت .. أنا رايجه أودتى أهوه بس والنبي ماتزعليش
(هنا وهى خارجة) استر يارب .. استر

« المشهد التاسع »

سوسن بهفردها

(تسمع ضحكة فى الداخل - فتشتعل غضبا)
سوسن - كويس خالص .. عال جدا .. انت لسه مانتتش ياسى
هانى .. طب ودينى مانا عاتقك انت والبنت هنيه

(تعدو الى الداخل - يسمع صياح - وضرب - وبكاء)
من الصبح قاعده أقول لك نام .. نام .. نامت عليك حيطه
انت مالك الليلة دى عليك عفريت ولا ايه .. اخرس ..
اسكت .. مش عاوزه اسمع نفسكم .. سامعين ؟ أنا مش
أبوكم يقعد بره لنص الليل فى الحفلات وانتم تجننونى هنا
(تدخل وهى متهيجه) - وتغلق باب الصاله بشدة)
(جرس التليفون يدق بصورة تفزع سوسن فتقفز
من المفاجأة - التليفون يدق - تمد يدها لترفع السماعة
ولكنها تخشى أن يحمل لها التليفون نبأ سيئا -
التليفون يدق - وترفع السماعة)

ـ (بصوت مرتجف) الو - مين ؟ زكى بك ؟ أهلا وسهلا ..
أيوه أنا سوسن ، بالعكس أنا متشكره لك جدا .. (تعود

المشهد الثامن

سوسن - هناء

سوسن - أهلا هناء ... عاوزه حاجة يا حبيبتي .

(فى التليفون) دى هناء يائينه - طب عن اذنك حا اقفل
التليفون أما أشوفها عاوزه ايه (تقفل التليفون)

نعم يا حبيبتي أعمل لك سندوتش مربه .

هناء - ماليش نفس .

سوسن - يعنى يا حبيبتي انتى عاوزه تمقتى نفسك ، ماهو كمان دى
مش طريقة ... خلاص ارمى الكتاب الى فى ايدك ده وروحى
نامى .

هناء - أناام ازاي يا ماما وفاضل على الامتحان شهرين .

سوسن - ويعنى لما تهلكى نفسك فى الشهرين حتبقى الشهادة
تنفعنا بابه .

هناء - انتى عارفه يا ماما أنا وعدت بابا انى لازم أدخل الهندسة
علشان أبقى اشتغل معاه ، ومش معقول أقدر أدخل الهندسة
فى جامعة القاهرة ولا عين شمس الا لما أجيب مجموع ، انتى
عارفه دلوقت ان النجاح ما بقاش كفاية ، لازم التفوق
والامتياز .

سوسن - ربنا يا حبيبتي يقويكى ويأخذ بايدك ، بس تعالى علشان
خاطرى اقطع لك برتقالتين كليهم يغدوكى .

هناء - طب بعدين ... بعدين يا ماما أنا حابقى أكل قبل ما أناام ،
هو بابا لسه مارجعش من حفلة المهندسين .

سوسن - أيوه انما ماكانش عندى فكره انه حيتأخر كده تلاقينى
ابتديت انشغل خالص ... عمره ماعمل كده .

بك هو السبب ؟ طيب بس لما أشوفه • دانا محضره لكم حنة
دين ذيك رومي •• ! أهو أنا بس باسمع كلام •• طيب أما
أشوف أنا مستنياكم بكره • بتقولى زكى بك ماجاش ؟ فى
حفلة النقابة مع عبد المجيد ؟ عجيبه قال لك حيتأخروا ؟ أنا
ما فهمتش كده من عبد المجيد • طيب اسمعى والنبي يا عفاف
هانم لما ييجى زكى بك يكلمنى علشان بكره • لا طبعاً مانا
سهرانه مستنية عبد المجيد لما يرجع • اسمعى ما فيش اعتذار
••• اعرفى شغلك أنا حاقوم أهوه أدبح الديك •

أنا مستنيه تليفون أول ما يوصل زكى بك ••• طيب اتمسى
بالخير دلوقت •

(تضع السماعة - ثم تسمع جرس ضعيف)

- أيوه يانيه اكلمت خلاص • دى عفاف هانم حرم زكى بك
قالت لى انه راخر فى الحفلة وما رجعت لسه •

يا نينه يا حبيبتي أنا ما قلتش أن هوه ما قال لكوش ، ما دام
بتقولى انه قال كده يبقى قال كده ، أنا بقول لك على الى
قاله لى أنا ، قال لى أنا حافوت أشوف العربية اصلحت ولا لا
واذا كانت اصلحت حابقى ارجع بيها أما اذا ما كانتش اصلحت
حارجع بالقطر ••• قطر عشره وتلت - لا مش حداشر أنا
متأكده • طب يا نينه حصل خير •• أبدا مش متنرفزه ولا
حاجه حاتنرفز علشان ايه هى دى يا عنى أول مرة بيسهر بره ،
بس ربنا يرجعه بالسلامه •

(تدخل هناء - وفى يدها كتاب)



سوسن : كويس خالص ، عال چنا !! انت لسه مامتش ياسى هانى
طب ودينى ماانا عاتقك انت والبت هنية .

اليها الطمأنينه بالتدريج) هي عفاف هانم مش قالت لك اني منتظره التليفون ده علشان زيارتك بكره ؟ لا لسه ما جاش
جاي في الطريق . طب متشكره جدا . ان شاء الله تكون
الحفلة عجبتم انبسطتم ؟ كان فيها غنا ورقص . . . طب عال
أحسن عبد المجيد كان نازل مأريف شويه . . . ان شاء الله
يكون انبسط . . . كان بيضحك ومبسوط ، طب عال . . . مين
كانت بترقص ؟ تحيه كاريوكا وساميه جمال الاثنين ؟ ياسلام
لكن عبد المجيد ما ادانيس فكره عن الحفله وانها حتكون
بالشكل ده . . . قال لي دي حفلة عشا وعلشان كده قال لي
انه حيرجع في قطر عشره وتلت دا الي شغلني شويه ،
أفندم ؟ استلم العربية ؟ آه حيرجع بقي بالعربية . . . العفو
يا زكي بك . . . انت تعرف عبد المجيد بيعزك ادايه ؟ كده ؟
طب اذا كان الكلام ده صحيح تقفوا جايبين بـكره . . . بس
ما تعملش تكليف . . . والولاد كلهم . . . ألف شكر سلم لي على
عفاف هانم - مساء النور يافندم

(تضع السماعه ثم لا تلبث أن ترفعها من جديد)
نينه ؟ ايوه الحمد لله اطمني خلاص جاي في السكه - زكي
بك كلمني دلوقت . . . اصل ياستي الحفله كانت على كيفك
تحيه كانت بترقص هي وساميه جمال . . . طبعا ما فيهاش
حاجه - أنا قلت ان فيها حاجه ، انتي عارفه مفيش شيء
يبسطني أكثر من انه يكون مبسوط . . . يانينه حرام عليك
انت تملّي ظالماني . . . حازعل على ايه بس . . . هو بس لو كان
قال لي انها حفله مغني ورقص كنت عملت حسابي . . . ايه . . .
اتخاف ؟ والنبي حرام عليك يانينه انت عارفاني بتساعه
خناق ؟ أبدا مش عصبيه ولا حاجه . . . دا هاني كان بيتعفره
اتصورى انه بسلامته لفاية دلوقت مانامش . . . رحت ضارباه
أهو اتخمد . . . عيل في عينه . . . والنبي ما بيخسرهمش كده
الا دلعلك ودلع عبد المجيد . . . اسمعي اما اقولك ، هي أم

خليل لسه صاحيه ؟ روح ؟ يا خساره .. اصل زكى بك
جاي هو وعفاف هانم بكره وكل الولاد كنت عاوزه أبيت
الديك مدبوح .. طب الصبح .. هيه مش جايه الصبح ..
طب والنبي يانينه ماتنسيش أول ماتيجي الصبح بدرى تدبجه
وتنضفه وتعلق عليه .. وبعدين بقي معاكى ، قلت لك مش
وعلايه .. هو بس لو كان قال لى من الاول ماكان خلاص ..
اسمعى أنا حاريحك خاخش أنام وييجي يلاقينى نايمه - لاجول
الله ياربى .. طب مش حنام .. حاستناه .. حاضر .. حاضر
وحاضحك فى وشه وعاوزه ايه كمان أرقص زى تحيه كارىوكا
.. أهو دا اللى معرفش فيه .. اعمل ايه يا نينه .. حاضر
حاضر (تضع السماعة) حاجه تجنن ..

(تعبت من جديد بمفاتيح الراديو .. لا نسمع شيئاً)
- حتى الراديو رآخر متنيل .. طبعا ماهى الساعة بقت واحدة
مفيش محطات دلوقت

أوف الدنيا مالها حر كده .. (تعود لفتح النافذة التى كانت
أغلقتها - تسير حتى تصبح على عتبة حجرة النوم - تقف -
تتردد - تعود الى منتصف الحجرة - تتجه الى التليفون -
ترفع السماعة)

- أدينى والنبي الخط تانى - بس يانينه ادينى الخط (تدير
قرص التليفون - وقبل أن تتمها - تسمع صوت كلاكس من
بعيد - فتقفز من الفرش وتعيد السماعة الى موضعها ..
الكلاكس يعزف نائبة بنغمة معينة)

(تتلفت حولها فى حيرة وارباك - تذهب الى النافذة
يسمع صوت عربة وهى تدخل الجراج - وصوت انبعاث
البنزين)

(تقرر ان تختفى .. فتسرع الى حجرة النوم - تطفى ..

نور الحجرة (المسرح خال - نور السلم الخارجى يضى ٠٠
صوت صعود على السلالم

عبد المجيد يقول - تصبح على خير يا بابا ٠٠ تصبحى على
خير يانينا ٠٠ يدخل من باب الصندى بادية السرور والانشراح
يضىء النور - يتلفت حوله - يسمع جرس خفيف للتليفون)

المشهد العاشر

عبد المجيد ثم سوسن

عبد المجيد - سوسن ٠٠ سوسن ٠٠ (التليفون يدق)
حاضر ٠٠ حاضر يا فندم لازم نمضى على الدفتر أولا - (يرفع
السماعة) أيوه ؟ يانينه أنا مش قايل لبابا مش حاجى قبل
١٢ ونص ولا واحد - أيوه قلت لها طبعاً بس يمكن ماخدتش
بالها - لا مافيش حاجة بتقولى زكى كلم سوسن ؟ طب عال
متشكر جداً يانينه - بوسى ايد بابا ٠٠ مالهاش حق ما أنا قايل
لها - وانت من أهل الخير ٠ (يضع السماعة تدخل سوسن)
سوسن - حمد الله على السلامة

عبد المجيد - الله يسلمك يا حبيبتي - اسكتى يا شيخه اما انا زعلان
زعل الى ماخدتكيش معايا الحفله ٠٠ كان فيها ستات كتير ،
كل المهندسين كانوا واخدين ستاتهم ، وأنا أقول لك تعالى
معايا ، تقولى ما يصحش يقولوا واخذ مراته معاه

سوسن - الدعوة كانت خصوصيه يا عبد المجيد ومش مكتوب عليها
عبد المجيد وجرمه ٠ كنت عاوزنى أروح ازاى ٠٠ متطفله كده
من غير دعوه

عبد المجيد - يعنى هما كل الستات الى راحو دول كانوا بدعوه ٠٠
بس انتى الى تمللى تهقلى

سوسن - أنا ياخويا ما اعرفش ! على كل حال انت عارفنى بتاعة
حفلات ؟ خللى الحفلات لاصحابها

عبد المجيد - دا انت لو كنتى معايا كنتى تكونى اجمل واشييك
واحد فى الموجودين .. ياسوسن يا قمر ، يا جميل انت ..
(يقترب منها فتبتعد)

سوسن - بس وطى صوتك انت مش عارف ان هناء لسه سهرانه
بتذاكر ؟

عبد المجيد - طب ما تسمع وفيها ايه ، هو عيب تسمع أبوها بيغازل
أمها ويقول لها يا جميل ؟

سوسن - طب عال .. عال يظهر الحفله روقت مزاجك جدا

عبد المجيد - ما انت عارف يا جميل انى تمللى مزاجى رايق معاك
(يقترب منها ويضمها بحرارة ولكن سوسن لا تبادله
نفس الحرارة)

سوسن - وعجبتك تحيه كاريو كا اكر ولا ساميه جمال ؟

عبد المجيد - (مندهشا) الله مين قال لك !

سوسن - أهو الى قال قال لى والسلام

عبد المجيد - صحيح والنبي مين قال لك .. آه لازم زكى .. على
فكره .. اكلم كان عاوز ايه ؟

سوسن - ولا حاجه .. ضرب لى تليفون علشان يطمنى عليك ويقول
انك كنت معاه وانك راجع بالعريه

عبد المجيد - طب والله كتر خيره .. زكى دا ابن حلال .. فكره
كويسه جدا انه يكلمك

سوسن - هو ما اكلمش من نفسه .. أنا الى ضربت تليفون لعفاف
هانم علشان أسأل عليك وقلت لها أول ما يوصل زكى بك
يبقى يضرب لى تليفون

عبد المجيد - طب وكان لازمته ايه التليفون ٠٠ ماانت عارفه اتافين
وقايل لك راجع امته ٠٠ على كل حال حصل خير مادام جاين
يزورونا ٠

سوسن - أنت مش قايل لى يا عبد المجيد انك جاى فى القطر الى
يقوم من باب اللوق الساعة عشره وتلت

عبد المجيد - دا الكلام ده كان الصبح ٠٠ لكن بعد الظهر وانا نازل
قلت لك انى حاتأخر لنص الليل

سوسن - عبد المجيد ؟ انت حاتجننى ؟ انت قلت لى ؟ بس ماتكذبش
انت تعرف مافيش حاجه تعفرتنى اكثر من الكذب

عبد المجيد - ساعة ماكنت واقفه على الحوض بتغسلنى وشك وانا
ماسك المفاتيح فى ايدى ونازل ، مش قلت لك انا حافوت على
الميكانيكى يمكن يكون خلص العربية ٠٠ وقلت لك على فكرة
دا يظهر ان فيه حفلة سمر بعد العشا وحاضر آتأخر لنص
الليل

سوسن - أنا ماسمعتش الكلام ده أبدا

عبد المجيد - ماسمعتيش ؟ طب وانا اعمل ايه بقى ؟

سوسن - أيوه ماسمعتش يا عبد المجيد وانا مش طارشه

عبد المجيد - حاقول لك ايه ٠٠ لازم بقى الصابون كان فى ودنك
ووش الميه خلاكى ماتسمعتيش أنما انا قلت لك

سوسن - لاصابون ولا حاجة/ انت ما تاخذنيش فى دوكة صحيح
أنا فاكره انك كلمتنى عن العربية ٠ أما حكاية حاتأخر دى
لأن فيه حفلة سمر فدى ماسمعتهاش أبدا ٠٠ أبدا ٠٠ أبدا

عبد المجيد - يعنى أنا كذاب ؟

سوسن - وأنا مش كذابه

عبد المجيد - طيب خلاص

سوسن - خلاص يعني ايه ؟

عبد المجيد - خلاص يعني خلاص .. مسأله على كل حال هايفه
ومش لازم نتخايق على حاجه زى دى مادام انتى بتقولى انى
ماقلتتش خلاص ابقى ماقلتتش

سوسن - انت مش مقتنع بالكلام ده .. انت بتاخدىنى على
عقلى ؟

عبد المجيد - سوسن اعملى معروف الساعة واحده والولاد نايمين
وانا مش مستعد اعمل خناقه دلوقت ياالله ننام من سسكات
وبعدين لما يبقى النهار يطلع يبقى فيها فرج .. نتفاهم على
كل حاجه

سوسن - طبعا حضرتك راجع معمر مخك من الغنا والرقص وست
تحبه وست ساميه جمال .. مايصحش بقى المدهوله الى
مرزيه فى البيت تعكنن مزاجك

عبد المجيد - ما هو كمان يا سوسن مش طريقة ان الواحد يرجع
بيته نص الليل علشان مراته تعكنن عليه وتعمل موشح


سوسن - (متنرفزة جدا) أنا عملت لك موشح يا عبد المجيد ؟
الى يقولك ماقلتليش انك حتنأخر ، يعني خلاص الواحد
مابقاش يقدر يكلمك .. انت معتبرنى خدامه عندك والا ايه
.. طب خلاص موشح موشح .. أهو أنا كده .. طبعى
كده لسه ماعرفتنيش ؟

عبد المجيد - طبع زفت

سوسن - ومادام طبعى زى الزفت عايش معايا ليه ؟ ماقلت لك
نسيب بعضنا .. والله مانا قاعده

(تترك الحجرة وتدخل حجرة النوم)

عبد المجيد - لاحول ولا قوة الا بالله .. مااحناش خالصين الليلة



عبد المجيد : ما سمعتيش ؟ طب وانا اعجل ايه بقى ؟
سوسن : ابوه ماسمعتش يا عبد المجيد وانا مش طارقه !

سوسن - (تعود ثانية في عتاب) وتخرج من بقك يا عبد المجيد ؟
أنا طبعي زى الزفت • تخونك العشرة • • تخونك سبعة عشر
سنه • • شايف فى ايه يا عبد المجيد • شايفنى زى الستات
الى كل يوم يقولوا لآزواجهم يغيروا العربية • • شايفنى
مقطعه السكه على الخياطه والكوافير • • ولا شايفنى دايره
على حل شعري فى الكباريهات والحفلات • • مش باشتغل
عندك وعند ولادك زى الخدامه • • وريني حد فى مركز
مرايه بتشتغل بايدها زى ما بعمل وزى مانا مموته نفسى
وكل ده علشان ايه • • مش علشان أوفر لك ولا اكش زى
الستات الى بيعتروا فلوس اجوازهم وأدى النتيجة • •
ماينوبنيس الا الشتيمة • • الله يسامحك يا عبد المجيد • •
الله يسامحك (تبكى)

عبد المجيد - (وقد رق قلبه) طب بس ماتعيطيش • • حقك على
انا غلطان • • ما انتى عارفه لما بتتفرزى بتخلينى أنا راخر
اتفرز واقعد ألبح • • حقك على ياستى • • أنا الى طبعي
زى ألزفت • • هاتى راسك أبوسها • • هاتى بوسه من
بقك

(يحاول أن يقبلها فتمانع بمزيج من العصبية والدلال)
سوسن - ماتسيبنى يا اخى فى حالى - مادام طبعي زى الزفت
ماتسيبنى وتدور لك على واحده تانيه
عبد المجيد - وانا ألاقى حد فى الدنيا زى سوسن حبيبتى - هو
فيه ست تساوى ضوافر رجلها

سوسن - (معاكسه) ايوه يادهل ياخويا يادهل • • الدنيا مليانه
جماليات ومتعلمات وطبعهم مش زى الزفت

عبد المجيد - (متضايقا وصارخا) يوه ياسوسن دى ماكانتش
كلمه • • يعنى اعمل ايه بقى (صارخا بقوة أشد) عاوزانى
أعمل ايه • • اموت نفسى • • انتحر • • قولى اتكلمى

سوسن - (بغضب) انت ماتز عقليش كده .. انت عارف لما
بتصرخ فى وشى جسمى كله بيتلخبط

عبد المجيد - ياسوسن أنا زهقت خلاص .. وروحي بقت فى
مناخيرى .. لازم الموضوع ده ينتهى بقى مش عاوز أسمع
أى كلام

سوسن - وأنا عملت ايه مش انت الى قاعد تزعق
عبد المجيد - مش عاوزة تقصرى الشر ، كل ما حاول انهى الموضوع
تفضلى تلتى وتعجنى .. تلتى وتعجنى

سوسن - (متهيجة) مين فينا اللي لثات وعجان .. مين اللي
بيجرح احساس التانى .. انت مش قايل لى طبعى زى
الزفت ؟

عبد المجيد - (صارخا) أيوه زى الزفت ، زى الزفت وزى القطران
كمان أما اشوفك هتعمل ايه

سوسن - (صارخة بقوة أشد) وأنا خلاص مش مستعده اقعد ولا
دقيقه مع واحد يقول عنى زى الزفت والقطران .. ياللا
خلصنى .. خلصنى وطلقنى .. انا واحده لى كرامه .. انا
ماسمحش لك أبدا تقول عنى زفت وقطران لازم تطلقنى

عبد المجيد - يا عالم ياهوه .. الحقونى .. أنا حاجتن
قول لى بس اخلص من المصيبة دى ازاى اسكتك ازاى ..
(يتجه نحو النافذة ويفتحها بعنف) تحبى انتحر ..
اموتلك نفسى علشان تنبسطى

سوسن - (وهى تغلى) طلقنى

عبد المجيد - هو الطلاق دا عندك لعبه ؟ أنا قلت لك ألف مره
مفيش عندى حاجه اسمها طلاق .. هو الطلاق دا لبانه فى
بقك .. اختشى على عرضك ، دا بنتك لو اتجوزت تبقى
جلمه

سوسن - ماتقول بصراحة الى فى نفسك ، قول بقيتي كركوبه
وعجوزه ٠٠ طبعا بعد ماشفت تحيه كاريوكا وساميه جمال
واتهزولك حاروح أنا فين ٠٠ (صارخة بتهيج) ولما انا
بقيت كركوبه ٠٠ قاعد معايا ليه ٠٠ مش عاوز تطلقني ليه
ماتسيبيني وتدور لك على بنت صغيره ، اهي نجوى كانت
هنا ٠٠ روح اتجوزها ٠٠ أيوه ياخويا اعمل لى بقى مش
عارف نجوى مين ٠٠ اندهش قوى ٠٠ اهي صغيرة وجميلة
ومتعلمه ٠٠ حضرتها معجبك بيك قوى ٠٠ معجبه بالجنسه
الى انت معيشنى فيها ، ياللا روح اشبع بيها اهي دى الى
تنفعك ٠٠ أما انا مش قاعده ٠٠ ودينى مانا قاعده ٠٠ لازم
تطلقني دلوقت حالا

عبد المجيد - يعنى أنت فاكره ان أعصابى من حديد ٠٠ مادام
بننفضح كده كل يوم والثانى ٠٠ والله العظيم عقلى بيقول لى
أعملها واخلص

سوسن - طب مانا عاوزاك تعملها هو أنا باهزر ؟ أنا خلاص
طهقت ٠٠ طلقني (بصوت مرتفع) طلقني

عبد المجيد - (يهجم عليها) طب امشى من قدامى ٠٠ امش من
قدامى أحسن بعدين حاموتك

(تبتعد سوسن الى الوراء خطوتين بينما يتراجع عبد
المجيد - فلا تكاد تراه يتراجع حتى تنفجر)

سوسن - وآدم الى كان ناقص حضرتك بترفع ايدك على عاوز
تضربنى ؟ خدامه أنا عندك ٠٠ أنا أنضرب ؟ تنكسر ايد الى
يضربنى

عبد المجيد - (يعدو خلفها) طب والله العظيم لانا ضاربك ما دام
بقت فضيحة والدنيا كلها بتتفرج علينا ، خليها بقى فضيحه
بالمره ٠٠ والله يا سوسن لانا ضاربك ان ماكان حتتكتنى
وتسكتنى

(سوسن تجرى وهو خلفها - يدوران حول الكنيسة
الاستديو - تدخل هناء فى فزع واضطراب)

المشهد الحادى عشر .

السابقان - هناء

هناء - (متوسلة - مستنكرة) بابا .. ماما
عبد المجيد - (بتأسى) انفضحنا خلاص ياهناء .. أمك فضحتنا
أمك حتجننى .. امك حتنقطنى .. بقينا ألن من العجر .
هناء - طب بس اهدا يابابا .. اهدا .. تعالى يا ماما معايا فى
أودتى

سوسن - (تصرخ صرخات عصبية) أبوكى عاوز يضربنى يا هناء
.. أمك تنضرب ياهناء .. ان شالله الى يضربنى ينضرب فى
قلبه .. والله مانا قاعدالكم .. (تخرج هالعة من الحجرة الى
حجرة النوم)

عبد المجيد - شايفه ياهناء عميل والدتك العاقله الرزينه ..
شايفه لما تتجنن ويركبها العفريت بتعمل فيه ايه .. شايفه
خلت البيت حريقه ازاي .. والى ماتختشيش تقعد تقول لى
كلام فارغ .. آل ايه تحيه كاريوكا .. اجوزلك واحده
صغيره .. روح اتجوز نجوى ! نجوى ايه وزفت ايه . أنا
بتاع كلام فارغ زى ده .. وكل ده علشان ايه ؟ آل علشان
كان لازم آجى الساعه خداشر وجيت الساعه اتناشر
هناء - معلش يابابا

(تدخل سوسن مندفة)

سوسن - انت ماتقعدش تكذب وتقول للبننت كلام على كيفك ..
انت عاوف انى مازعلتش علشان اتأخرت فى الحفلة وموضوع
الحفلة كان انتهى خلاص .. أنا زعلت لما قلت لى طبعك زى
الزفت .. ومديت إيدك على .. أنا طبعى زى الزفت ياهناء
أنا انضرب يا هناء .. والله مانا قاعده

عبد المجيد - ومستنيه آيه .. ماتروحي في ستين داهيه

هنا - (تصرخ) بابا

سوسن - (تصاب بالذهول - ثم لاتلبث أن تنفجر) انا اروح في

ستين داهيه .. أنا أروح في ستين داهيه .. يا قليل الادب

.. ياسافل

عبد المجيد - (ينقض عليها) طب مادام أنا سافل خليني بقي سافل

بالمره (يضربها بالقلم .. فتقع على ارض ، ينقض عليها

ثانية فتدخل هنا فتتمكن اسوحن من النهوض والجسرى

وهي تصرخ - يدخل هاني وهنيه في حالة جزع وفزع وهما

يصرخان .. « ماما .. ماما » - نور السلم يضاء - أصوات على

السلالم .. يفتح باب الصدر * يظهر الشيخ صابر والد

عبد المجيد ووراء الحاجه زينب .. وسط هذا الجو يتوقف

عبد المجيد عن العدو خلف سوسن .. وتسقط سوسن

في حالة نوبة تشنجات)

المشهد الثاني عشر

عبد المجيد - سوسن - هنا - الشيخ صابر - الحاجه

عنيه وهاني (يظهران ثم ينسحبان)

الشيخ - ايه هي المسخره وقلة الادب دي .. فضحتونا يا ناس

أمام الميران .. بقي أنا قاعد من الصبح أقول يمكن يعقلوا ،

يمكن يعقلوا ألافيكم كل ماده تتجننوا .. خبر ايه ؟

عبد المجيد - سوسن جننتني خلاص .. تنها ورايا لما خلتنني

مجرم

(هنا تأخذ أخويها الى الداخل وهي تهدئهم ثم تعود

سريعا)

الحاجة - (التي كانت قد اقتربت من سوسن) ياختي باسم الله

الرحمن الرحيم ودي مالها متلبشه كده .. روجي يا هنا

هاني شوية ميه (هنا تعدو لاحضار ماء)

عبد المجيد - خلاص .. خلاص مافيش حل لمشكلتنا دى الا بالموت
لازم ربنا ياخذنى بقى ويريحها منى كمان

الحاجة - (مستنكرة) ياختى باسم الله الحفيظ .. الشر برة
وبعيد .. انت مش فالح الا فى الكلام الى توجع قلبى بيه
ده .. قبل ماتموتك طلقها .. طلقها ياخى واستريح

(هناه تكون قد دخلت بكوبة الماء فتسمع العبارة
الاخيرة)

هناه - ستى؟! كلام ايه ده .. اخص عليكى يا ستى .. دى ماما
بتحبك تقومى تقولى كده ؟

الحاجة - ماهو كمان يا هناه يا بنتى دى مش عمايل .. ابوكى
بيقول عاوز يموت وتبقى مبسوطه يعنى لما يجرا لابوكى
حاجه ولا لمامتك ؟

هناه - ان شاء الله مش حايجرا حاجه .. دلوقت كل شى ينتهى
على خير زى العاده .. (تنحنى على والدتها) ماما .. ماما
(ترش الماء على وجهها ثم تدعك يديها ووجهها)

عبد المجيد - يعنى هو الطلاق بالسهل بعد عشرة سبعتاشر سنه
والولاد يقدرُوا يستغنوا عن أهمهم .. هو الطلاق بيحل أى
مشكله .. أنا عارف كويس من الى بشوفه ان الطلاق
بيعقد المشاكل اكتر واكتر .. أنا عارف يارب ايه الى
بيجرا لنا ده

الحاجة - والنبي عين .. عين وصابت ، أحسن تمللى أقول لكم
تضحكوا على .. أهو أنا الليلة اتلخمت فى غيابك مابخرتش
زى ما باعمل كل يوم .. أهى النتيجة أهى .. علشان
تبقوا تصدقوا كلامى .. والنبي دى عين .. عين وصابت من
ساعة البت الملسوعه دى الى اسمها نجوى وانا قلبى كان
حاسس ان الليله مش حتنتهى على خير

الشيخ - دانت اتجننت يا عبد المجيد تضرب سوسن وانت هاييج .
أنا مش قايلك ميت مرة أخطر شيء ان الواحد يضرب وهو
هاييج أحسن ضربه تيجي كده ولا كده ياللا السلامة . . .

عبد المجيد - هو أنا بقي في عقل ؟ . . . هو أنا باعرف ايه الى
بيجرالى . . . هي تتطور وأنا أبص ألقى نار آيده في جسمي
وكل كلمة تخرج من بقها أكنها بنزين بتحطه على النار . . .

هو معقول يا ناس اني اضرب سوسن . . . لا حول ولا قوة
الا بالله - ايه ياهناء . . . شايفه ايه - . . ؟

هناء - أهى مستخسجة يا بابا - ونفسها مكروش . . . (باضطراب)
بابا . . . الحقنى يا بابا .

(يسرع عبد المجيد اليها)

عبد المجيد - (بفزع) فيه ايه يا هناء . . . ماما مالها .

هناء - (تبكى) مش عارفه . . . مش عارفه .

الحاجة - (منتهرة اياها) خبر ايه يا هناء وانت آلى بنقول عليكى
عاقله . . . انتى حتخضى أبوكى ولا ايه . . . أهو نوبه زى
بتاعت كل مرة ودلوقت تروح .

عبد المجيد - (جاتى الى جوار سوسن) سوسن . . . سوسن

(يمسك يدها) دى ايدها زى التلج .

الحاجة - أدعك ايدها انت بس - وادعك وشها بالكلونيا .

عبد المجيد - (فى فزع) أحسن يكون جرالها حاجة - سوسن -

سوسن - (يهزها - يدلك صدغها) ليه بس يا رب . . . ليه

بس خليتنى اعمل كده . . . استغفر الله العظيم . . .

الشيخ - هو ربنا بيقول لكم اتجننوا ؟ ولا ربنا خلق لنا عقل علشان
ندبر أمورنا بيه ؟

عبد المجيد - (يهم واقفا) دكتور ... لازم أجيب دكتور من تحت الأرض .

الحاجه - دكتور ؟! دكتور ايه الى حتلاقيه دلوقت ... وتجييه منين ؟! اسكت والنبي وصلى عالنبي وهى دلوقت تفوق .

عبد المجيد - ومافتتش لحد دلوقت ليه ... لا الميه نافعه ولا الكلوينيا نافعه سوسن ... سوسن حقك على أنا غلطان كان لازم أطول بالى ... كان لازم اسـتـحملـك ... حقك على (يقبل رأسها ووجها)

هنا - بابا مش فيه دكتور فى أول شارعنا ... دايماً أقرأ اليافطه بتاعته ...

عبد المجيد - أيوه الدكتور عبد الحفيظ حكيمباشى الصحة بتاع زمان .

الحاجه - يوه ... يا ابنى دا بطل شغل الدكتور من زمان وقفل عيادته .

الشيخ - لا! دا راجل عجز بهى وخرف وسمعه ثقيل .

عبد المجيد - أهو دكتور على كل حال ... أمال يعنى حنعمل ايه ... حنفضل قاعدين حوالىها كده ويمكن تروح منا فى شربة ميه ؟! اخص عليكى يا سوسن ... اخص عليكى تخلىنا نعمل فى بعض كده ...

الحاجه - والنبي لو تسمعوا كلامى سوسن دى ما هنى عاوزة دكتور ... دى لازم تكون مريوحه والاسياد بيركيوها .

الشيخ صابر - يا شيخه بلاش تهجيص وكلام فارغ ... طول عمرى أقولك بطل الكلام الفارغ ده .

عبد المجيد - يا نينه احنا فى ايه ولا فى ايه دلوقت ... (يعندو نحو دفتر التليفون - يحاول أن يقلب ...) أنا فاكـر لهـنـمره فى الدفـتر يا ترى فاضله ولا شالوها . استر يا رب استر يا رب .

الشيخ صابر - يا بنى حرام عليك تزعج الراحل الكبير فى الساعة
دى - يا عنى انتم تتجننوا وتروحوا ترموا بلاويكم على الناس .

عبد المجيد - (الذى كان قد عثر على النمرة) الحمد لله أهى النمرة
(يشرع فى ادارة القرص) ... ألو منزل الدكتور سيد عبد
الحفيظ ... أيوه ياستى عارف ... عارف انما دى حاجة
خطيرة جدا اعمل معروف .. بس ألكم الدكتور .. دنا جاركم
مش بعيد عنكم . أنا عبد المجيد قاسم أيوه ابن الحاجه زينب

... أهى جنبى أهوه ... الله يسلمك بس والنبي خلى الدكتور
يكلمنى - (لحظة انتظار) دكتور عبد الحفيظ - الحقنى
يا دكتور ... أنا عبد المجيد قاسم - أيوه ابن جارج الشيخ
صابر خلف الله قاسم .. هو .. هو زميل الصبا الحقنى
يا دكتور .. مراتى بتموت يا دكتور .. الحقنى زى ما أنت
كله .. با لجلابية والشيشب .. طب البس (الروب دى
شامبر) أفنلم ! عندها ايه ؟ وأنا ايش عرفنى يا دكتور أهى
مسخسوخة ومتخشبه ونفسها حينقطع .. اعمل معروف أنا
حانزل استنك على الباب . قوام يا دكتور .
(ينزل وهو يعدو حافى القدمين بالبنطلون)

المشهد السابع

الشيخ - الحاجه - هناء

الحاجه - (مخاطبة عبد المجيد) يا واد تعالى البس فى رجلك حاجه

الشيخ - لا حول ولا قوة الا بالله ... انا لله وانا اليه راجعون دى
عمایل ناس محترمة .. عاجبك كده يا بنتى يا هناء نتفضح
بين الجيران ... مش عارفه تعقل أمك وأبوكى ؟

هناء - والله يا جدى أهى حوسه ... بس أنا خايفه قوى على ماما .

الحاجه - ياختى يا هناء ... يعنى هى حاجة جديدة ... ولا حاجة جديدة ؟ ما هم فى الهم ده من يوم ما أجوزوا ومامتك تتلهب من الغيرة على أبوكى .. تغير عليه من الهوا .. !

الشيخ - بس أنا كنت تملى أقول بكره لما يكبروا يعقلوا ... لما يخلفوا أولاد يعقلوا ... مع الزمن أعصابهم تهدأ إنما أنا شايف الحكاية ماشيه من سوء الى أسوأ وأنا خايف ييجى يضربها يوم ... بالله السلامة .

الحاجه - مافيش ست ييجرا لها حاجه من ضرب جوزها أنت ناسى الى كنت بتعمله فى أول ما أجوزنا لما كنت تقطع جسمى بالخرزانه ... بس أنا بقى يا كبدى كنت باستحمل مشزى

ست سوسن من ورق الفسفس والاعرفتش فى عمرى البدلح ده يبقى شكله ايه ... (تنهد) حسره على .

هناء - طب والنبي يا ستى أنا حادخل أطمئن على هنيه وهانى ... مساكين الولاد اتخضوا قوى ...

الحاجه - خشى ... خشى يا هناء ربنا يكملك بعقلك يا بنتى .
(تشنجات جديدة من سوسن)

الشيخ صابر - الحقيقى يا حاجه .

الحاجه - والنبي تقعد ساكت انت راخر بلا محن ستات ... والنبي لو سابها لتفوق من نفسها .

(يسمع صوت الدكتور وعبدالمجيد على السلم - يدخلان)

المشهد الثامن

الشيخ - الحاجه - عبد المجيد - الدكتور

(يدخل الدكتور سيد عبد الحفيظ - في السبعين من عمره أشعث الذقن - نحيف جدا - على رأسه طرطور صوف - روب دى شامبر على الجلباب وشيشب صوف - وكوفيه حول رقبته - منظار قديم على عينيه منزلق على أنفه بحيث ينظر من خلفه إذا ما حادث أحدا أو حاول أن ينظر عن قرب - ضعيف السمع - يحمل حقيبة لا تمت لحقائب الاطباء بصلة)

عبد المجيد - أنا متأسف ... متأسف يا دكتور لكن ما كنتش أقدر أعمل غير كده .

الدكتور - (واضعا يده على أذنه ليسمع) بتقول ايه ؟

عبد المجيد - (رافعا صوته) بقول متأسف على ازعاجك .

الدكتور - خلاص ... خلاص يا ابنى مانت قلت لى كده وادينى جيت والى كان كان ، أنا صحيح تركت المهنة من عشر سنين بعد أن أحلت على التقاعد ، لكن ما أقدرتش أرفض استغاثتك وانت جارى وأبوك صاحبى ... انت بتقول مين اللى عيان ؟

عبد المجيد - مراتى .

الدكتور - بتقول ايه سنانك ؟

عبد المجيد - (بيأس) حوسة ايه دى يا ربى (رافعا صوته) بقول مراتى ... مراتى .

الدكتور - أيوه ... أيوه مراتك ... صحيح أنت قلت لى ... مالها بقى مراتك ؟

عبد المجيد - أهى قدامك أهوه شوف بنفسك .

الدكتور - (يثلفت حوله من وراء النظارة فتقع عينه على الحاجة فيهرع نحوها) ماهي كويسة أهوه وواقفه على رجليها .
سالخير يا هانم .

الشيخ - لا يا دكتور عبد الحفيظ ذي مراتي أنا الحاجة زينب مش مرات عبد المجيد - صباح الخير يا دكتور والله أنا أسف على ازعاجك .

الدكتور - (بعد أن رأى الشيخ صابر) الله . . . مين . . . صابر بك (يعانقه) أهلا وسهلا .

أنا جيت علشان خاطرك . . . انت عارف اني أحلت على التقاعد قبليك من عشر سنين دلوقت ، لكن لما عرفت ان ابنتك بيستغيث بي ما قدرتش ما ألبيش نداء الواجب . . .

الشيخ - ماهو برده العشم فيك كده يا دكتور عبد الحفيظ .
الدكتور - يا سلام . . . فين أيام زمان . . . أيام الشباب . . . فاكرك . . . فاكرك يا صابر بك .

الشيخ - أيوه فاكرك طبعاً ودى أيام تنسى .

عبد المجيد - (مستغيثاً) يا دكتور أعمل معروف تعال شوف المريضة هنا .

الدكتور - (لم يسمع كلام عبد المجيد يتكلم بحسرة على نفسه) شوف حالتى بقت أزاي . . . والى زاد على الروماتيزم بعينه عنك . الروماتيزم هلكنى .

الشيخ - روماتيزم ؟ هنا فى حلوان .

الدكتور - اتصور بقى . . . فى حلوان يا سيدى . أصله روماتيزم من نوع خبيث جدا اسمه روما تويدار تريس .

Rheumatoidarthritis



عبد المجيد : (مستفينا) يا دكتور اعمل معروف تعال شوف المريض هنا
الدكتور : (الذي لم يسمع) شوف حالتى بقت ازاى ؟ الروماتيزم هلكنى

عبد المجيد - (يجنب الدكتور بشدة نحو سوسن) يا دكتور ...
يا دكتور انت جاي تعالج نفسك ولا تعالج المريضة .

الدكتور - ايه بتقول آيه ؟

عبد المجيد - (رافعا صوته) بقول الحقنى أولا ... وبعدين تبقى
تتفرغ للروماتيزم بتاعك .

الدكتور - أيوه صحيح عندك حق ... فين بقى مراتك دى . انت
قلت اسمها ايه ... سرسق ... سنجق

عبد المجيد - (بغیظ) سوسن ... سوسن ... اسمها سوسن .

الدكتور - (بدھشة) طب وبتزقق قوى كده لينه يا بنى ... أنا
صحيح سمعى تقيل شويه لكن لسه ما بقتش أطرش سوسن
... سوسن اسم لطيف ... دا نوع من الزهور من فصيلة
اسمها يا سيدى ... اسمها يا سيدى ...
(سوسن تخرج أصوات متحشرة - وتنتفض فيصرخ
عبد المجيد من الرعب)

عبد المجيد - يا دكتور الحقنى ... مصيبة ايه يا ربى دى الى
وقعت على دماغى .

الدكتور - (يقترب من سوسن ويقف أمامها متأملا من تحت النظارة)
وبقالها كتير على الحالة دى ؟

عبد المجيد - ييجى نص ساعة .

الدكتور - الساعة ... طبعا جبت معايا الساعة .

عبد المجيد - (يتمزق من الغیظ) يارب ... يارب - (صارخا)
يقول بقالها نص ساعة .

الدكتور - أيوه يا ابني وبشزعق كده ليه انا مش أطرش صحيح سمعي تقيل شنويه لكن مش أطرش بقالها نص ساعه - والحالة دى سبق جاتها يا ابني .

عبد المجيد - أهو تيجي فى السنة مرة مرتين لكن المرة دى شديدة قوى يا دكتور اعمل معروف خلصنى بقى .

الدكتور - دا يصح بقى تكون عندها حالة الابلبيتفورم كونفالتشن Epileptiform convulsion ولا عندك فكرة تانيه

عبد المجيد - يا دكتور انت جاي تنقطنى ؟

الدكتور - بتقول ايه ؟

عبد المجيد - بقول هو انا الدكتور ولا انت مش تلحقها قبل ما تموت .

الدكتور - لا سمح الله يا ابني لا سمح الله . انت معذور طبعا لانك مش دكتور يا ابني الى باعمله دلوقت اجراءات تمهيدية لابد منها للكشف على المريض دى مرحلة ال History-Taking يعنى جمع المعلومات التاريخية وبعد الدكتور ما يحيط بتاريخ المريض ينتقل الى حالة ال دياجنوزس Diagnosis الى يقولوا عليها دلوقت بالعربى التشخيص والتشخيص ما ينفعش الا بعد جمع المعلومات

عبد المجيد - يا دكتور اجمع . اجمع بس الحقها قبل ما تموت .

الدكتور - عمرها كام سنة ؟

عبد المجيد - ٣٤ سنة .

الدكتور - ٦٤ مش باين عليها (يحدق من وراء المنظار) .

عبد المجيد - (صارخا بغیظ) بقول ٣٤ أربعة وثلاثين .

الدكتور - طب ومالك يا ابني بتزعق قوى كده صحيح سمعي
تقيل شويه لكن لسه مايقتش أطرش ٣٤ سنة .
كوبس خالص (يتلفت حوله نحو الحاجة زينب) تعرفوا
إذا كانت حامل ولا لا ؟ .

عبد المجيد - ما أظنش .

الحاجة - لا مش حامل .

الدكتور - عال جدا دلوقت نقدر نبتدى نكشف عليها .
باسم الله الرحمن الرحيم توكلنا على الله وبه نستعين .
(يحاول أن يجلس على ركبتيه - ولكن الألم ينال منه فيتاوه
ولكنه يغالب الألم حتى يشرع فى الاستقرار الى جوار سوسن
التي تقوم بتشنجات عصبية جديدة فيرتعه الدكتور)
بسم الله الرحمن الرحيم بسم الله الرحمن الرحيم
هى بتعمل كده ليه يا ابني ؟

عبد المجيد - (صارخا) ودى واقعة ايه المطينة دى يا رب . أنت
بتسألنى أنا يا دكتور بتعمل كده ليه .

الدكتور - أبوه صحيح مانا قلت لازم يكون عندها حالة الابلتفورم
كونفالشن ودى من اعراضها بس أنا مش حا اعرف
اكشف عليها وأنا كده رجليه بتوجعنى جدا
الروماتيزم يا ابني هالكنى (ينهض فى ألم) قول لى هى
متعودة تنام هنا ليه مش نايمه فى السرير ؟

عبد المجيد - (بحنق) يا دكتور أصل الدور جالها وهى ماشيه راحت
واقعه واحنا الى جينا المخدة وغطيناها بالبطانية من البرد .

الدكتور - صحيح صحيح ما هو حالة الابلتفورم تيجى على

غفله ... طب اسمع ... اعمل معزوف نيمها على الكنبه
علشان أقدر أكشف عليها .. ماتأخذنيش يا ابني الروماتيزم
هالكني .

(تتقدم الحاجه للمعاونة مع عبد المجيد لرفع سوسن عن
الارض - ونظرا لتشنجات سوسن وتقلصاتهما فانها
تقع من أيديهم وأخيرا ينجحون بعد لأمي في ارقادها على
الكنبه - الجميع يلهثون)

الحاجه - (تلهث) عاجبك البهدلة دي كان لزومه ايه الدكتور
الاطرش المخرف ده .

عبد المجيد - أهى مصيبة ... مصيبة والي كان كان ... استر
يا رب ... يا رب سترك .
(الدكتور ينحنى على سوسن ويحاول فحص قلبها
بالسماعة)

الدكتور - (فى قلق) الله ! ... الله !

عبد المجيد - (منزعجا) ايه يا دكتور فييه ايه ؟

الدكتور - أنا مش سامع حاجة ...

عبد المجيد - مش سامع حاجة يا خير اسود !

الدكتور - سمعى تقل شويه (يخلع السماعة) .

عبد المجيد - دي بتنازع أهوه .

سوسن - (تنازع) .

الدكتور - بتقول ايه ؟

عبد المجيد - (صارخا) بقول لك بتنازع .

الدكتور - يتنازع ؟ طب عال ... عال جدا .
(الدكتور يقرب وجهه من وجهها - ويمسك نبضها -
ويظل ينصت فى تهلل)
- الحالة كويسه ... الحالة كويسه والحمد لله ... نفسها
منتظم والنبض كمان منتظم .
عبد المجيد - المهم اننا نفوقها ... لازم نفوقها .

الدكتور - طبعا يا ابنى ... طبعا هذه هى مهمتى ... أنا صحيح
بقالى عشر سنين بعيد عن مزاولة المهنة بعيد أن أحلت على
التقاعد لكن بقا علشان خاطر والدك ... (ينظر للشيخ
صابر) فاكرا يا صابر بك أيام بنى سويف لما كنت أنت فى
المحكمة وأنا حكيم باشى الصحة ... فاكرا أيام زمان ؟ ...
يا سلام يا ناس على شقاوة الشبان .

عبد المجيد - (صارخا) يا دكتور سيب أيام الشقاوة وخليك هنا .
الدكتور - طب وبتزق كده ليه أمال أنا فين ... مانا أهوه معاك
دلوقت .

مش تركت السرير وأنا عيان بالروماتيزم وجيب لك بالجلابية
والشيشب .

عبد المجيد - أنا مقدر يا دكتور ... أنا مقدر تضحيتك بس اعمل
معروف فوقهاالى .

الدكتور - ما هو ده الى أنا بفكر فيه ... بقى دى يا سيدى عندها .
حاله الابلتفورم كونفالشن وهذه حالة تنشأ من وجود
مؤثرات غير طبيعية تؤثر على الهايرسنترز Higher-Centers
يعنى المراكز العلوية فى المخ يبقى علشان ننبه المراكز دى لازم
نريح المريض فى الاول وبعدين نعمل ستيموليشن Stimulation
حقنة كافور ولا كورامين . ودا الى خلانى من باب الاحتياط

أجمع كل الأنبياء إلى عندى فى البيت من أيام زمان ...
ولازم حنلقى فيها حقنة كافور ولا حقنة كورامين ... تعالى
... تعالى أما نفرزهم مع بعض .

الشيخ - (يهمس لابنه) مافيش داعى يا عبد المجيد لحقن ...
الراجل بيقول لك حقن قديمة متلخبطة ... انت عاوز تودى
مراتك فى شربة ميه .

عبد المجيد - هو أنا عارف أخلص منه ازاي ... يا رب استر يارب

الشيخ - أنا أخلصك منه - (يقترب من الدكتور ويتكلم بصوت
مرتفع) الحمد لله أدبك طمنتنا يا دكتور ... تعالى بقى أما
أعمل لك فنجان شاي يدفك من البرد ... وعنبدى دوا
روماتيزم انما هایل جدا .

الدكتور - كتر خيرك ... الحقنى بالدوا ده ... بس استنى لما
أخلص من الست وافوقها . الواجب أولا يا صابر بك ...
الواجب ، علموئنا كده فى المدرسه ... فاكرا أيام زمان ...
فاكرا أيام الشقاوة .

(يبحث فى الحقن بطريقة مضحكة من وراء المنظار)
- مش شايف كويس ... خد يا عبد المجيد اقرا ايه الى
مكتوب على الانبولة دى .

عبد المجيد - (يطالع) استركن ... استركنين .

الدكتور - مكتوب ايه

عبد المجيد - (صارخا) استركنين .

الدكتور - لا أعوذ بالله دى خطر ... دى سم ابعدها ... ابعدها
لا هاتها هنا - (يأخذها منه وعبد المجيد يتردد) (يبحث عن
انبولة أخرى) .

عبد المجيد - مفيش لزوم يا دكتور ... خليها بقى تفوق على مهلهما
مش لازم ستميوليشن .

الدكتور - (غير منتبه اليه) أنا متأكد ان لازم يكون هنا حقنة
كورامين - صحيح حتكون قديمة انما حتكون فى حالة صالحة
للاستعمال ... على كل حال مش حيكون فيها ضرر .

الحاجة - (هانسة فى اذن سوسن) ماتصحى يا مجنونة وتفوقى
لنفسك ... اصحى يا مخيلة ليضيعك الدكتور فى شربة ميه

سوسن - (تنازع) .

الدكتور - (هاتفا من الفرح) أهيه ... أدى حقنة كورامين ...
لازم تكون دى كورامين ... (يقرأ) كورامين ... خذ
أناكد يا عبد المجيد .

عبد المجيد - (يطالع) كورامين

الدكتور - عظيم .. ودلوقت بقى الحقنة ... لازم تنفلى الحقنة ..
أنا ما باستعملهاش من عشر سنين .. وان شاء الله ماتكونش
الابره صلت من عدم الاستعمال ... هاتأخذنيش يا ابنى ..
أنا قلت لك بقالى عشر سنين منقطع عن مزاولة المهنة بعد ان
أحلت على التقاعد ... انما ماكنتش أقدر ما أحضرش ...
الواجب ... نعمل ايه فى الواجب ... مش كده ولا ايه
يا صابر بك .

(يخرج حقنة قديمة يروح يعالج فيها ويبدو عليها انها
صعبة الاستعمال)

الشيخ صابر - أنا فكرى يا دكتور ما دام الحقنة مش مستعملة
والانبولات قديمة ... بلاش الحقنة دلوقت أحسن ياللا
السلامة كده ولا كده ...

الدكتور - (بكبرياء مجروح) اسمع يا صابر بك ... أنا ما كنتش
عاوز آجى لانى متقاعد بقالى دلوقت عشر سنين ، وانا راجل
مريض وعمرى ما باخرج بالليل ، ولكنى جيت وضحيه بكل
شئ علشان خاطر كم ... الى بتقولوه ده أهانة لى وأنا
لا أسمح أبدا ان كرامتى تهان ... أنا لما لعمل حاجة أنا
مستول عنها ... (لعبد المجيد بانتهار) يا الله خلصنى ، هات
لى حاجه نغلى فيها الحقنة ... أى حاجة ... كسروله ...
حله ...

(سوسن - (تتنهد) - نفس عميق آخر - تفتح عينيهما)

عبد المجيد - (قافزا من الفرح) دكتور ... دكتور ... فتحت عينيهما .
فاقت يا دكتور خلاص فاقت ... (يخطف من الدكتور الحقنة
ويسرع بها الى حجرة النوم)

سوسن - (متنبهة تنازع) هيه ... هيه ... مين ؟ أنت مين ؟

الدكتور - (مبتسما) ... (يقترب منها - يحملق فيها من وراء
المنظار) حمد الله على السلامة يا بنتى ... أنا الدكتور عبد
الحفيظ جار كم ... بقالى عشر سنين معتزل المهنة بعد ان أحلت
على التقاعد ... لكن بقى لما سمعت الى جراك ما قدرتش ...
ماجيش وألبى نداء الواجب ... حمد الله على سلامتكم ...
دلوقت حقيقى كويسة خالص .

سوسن - (تتلفت حولها) نينه ... بابا ؟

(تدخل هناه)

المشهد التاسع

السابقون - هناء ثم عبد المجيد

سوسن - (لا تكاد تلمح هناء حتى تهتف بها) هناء ... بنتي حبيبتي
(هناء تهرع الى أحضان أمها)

هناء - حمد الله على سلامتك يا ماما ... خضيتنا يا ماما .
(يدخل عبد المجيد فيرى منظر زوجته وابنته يتعانقان)

عبد المجيد - خلاص ... خلاص ... الحمد لله
(يقع على الأرض مغشياً عليه)

الحاجه - (تهرع اليه من ناحية وهناء من ناحية) عبد المجيد ...
ابنك ... ضنايا .

هناء - بابا ... بابا مالك يا بابا ... ماما بقت كويسه ... ماما فاقت

الحاجه - الحق يا دكتور تعال شوف ايه اللي جراه الجدة اتهد ...
من الى جراه .

الدكتور - وانا كان مالي ... ومال الحوسة دي ... يا ناس أنا معتزل
المهنة بقالي عشر سنين بعد أن أحلت على التقاعد ... أنا أعصابي
ما تستحملش ... الروماتيزم اتحرك على ... الحقوني ...
الحقوني أنا حدوخ ... (يجلس على الكرسي متهاكاً ثم يروح
يقبض بيديه على ركبتيه)

سوسن - (أقرب الناس اليه) ... لاء اعمل معروف ... بابا
خليك والنبى مع الدكتور ... روى يا هناء هاتى للدكتور
شوية ميه .

(تنهض بتثاقل وضعف ... تذهب ناحية عبد المجيد
وتنظر اليه متأمله وفاحصة) .

الحاجه - عاجبك كده يا سوسن ٠٠٠ عاجبك كده تعملي في جوزك كده وتعملي في نفسك كده ٠٠٠ عاجبك الفضايح والبهله دي ٠ تبقي مبسوطه لو جرا لعبد المجيد حاجه ٠

سوسن - اسكتي والنبي يا نينه ٠٠٠ اسكتي بعد الشر عنه ألف مرة ٠٠٠ بعد الشر ٠

(هناء تدخل فتسقي الدكتور - سوسن تنظر اليه)

- يا دكتور والنبي شدد حيلك وتعالى الحقنا هنا ٠٠٠

الدكتور - (بعد أن شرب) كتر خيرك يا بنتي ٠٠٠ الحمد لله ٠٠٠ أيوه أنا لازم أودي واجبي حتى النهاية ٠٠٠ (يتعاون مع صابر بك على النهوض - وهو يتألم - مخاطبا صابر بك) ٠٠٠ احنا خلاص يا صابر بك ٠٠٠ يالله حسن الختام ٠ فاكرك ٠٠٠ فاكرك يا صابر بك أيام زمان ٠٠ أيام ٠٠٠

صابر - أيام الشقاوة ٠٠٠ أيوه فاكرك ٠٠ فاكرك ٠٠

الدكتور - شوفوا بقى طريقة تنقلوه على الكنبه علشان أقدر أفحصه (يحاولون تحريره ولكن الدكتور يصرخ فيهم فجأة) لا ٠٠٠ استنوا ٠٠٠ اوعوا تحركوه جاتني فكرة ٠ الواحد لازم يحتاط لكل شيء ٠٠٠ يمكن يكون عنده حالة Fractured spine يبقى في الحالة دي مش لازم يتحرك ٠


سوسن - (مفزوعة) بتقول ايه يا دكتور عنده ايه ؟

الدكتور - (لا يجيب) ٠

الحاجه - أصله مايسمعش زعقي له ٠

سوسن - أطرش يعني ؟ (تصرخ في أذن الدكتور) بتقول عنده ايه ؟

الدكتور - أنا مش متأكد ٠٠٠ أنا بافترض من باب الاحتياط يكون حصل له لا سمح الله كسر في العمود الفقري ٠



عبد المجيد : اصل معروف فوئها
الدكتور : ما هو ده اللي انا بفكر فيه

الحاجه - كسر فى العمود الفقرى ؟ ياخي جك كسر حقا يا بعيد .
باسم الله الحفيظ ... الشر بره وبعيد .

سوسن - يا ندامتى ... كسر فى العمود الفقرى ... دكتور
الحقونى بدكتور . بابا فى عرضك / بابا لازم نجيب دكتور اكلم
مين دلوقت ؟

صابر - يا سوسن طولى بالك ... الراجل ماقالشى عنده كسر فى
العمود الفقرى ... دا بيحتاج ... بيقول ماتحركهش لحد
ما اشوف .

الدكتور - (يركع بألم الى جوار عبد المجيد ثم يشرع فى مد ذراعيه
الى جوار جسده وضم ساقيه وقدميه كما يفعل بالموتى) .

سوسن - باسم الله الحفيظ الراجل بيعمل كده ليه ... نينه ...
الحقيني ... انتم جبتم الراجل دا منين ...

الحاجه - وكم ان بتتكلمى ... أهو كله من عمايلك ... أهو كله
بسببك وسبب بلاويك وعمايلك .

سوسن - والنبي تسكتى يا نينه حرام عليكى ، أنه خلاص مش
مستحمله ... كفاية الى عمله فى عبد المجيد ... شتمنى
وضربنى وبهدلنى .. لكن معلش ... أنا مسمحا .. مسامحا
بس يقوم بالسلامة .. يقوم بالسلامة .. دا شيطان ياتينه
.. شيطان الى بينط بينى وبين عبد المجيد .. طمنى يا دكتور
قول لى حاجه فى عرضك (تمسك يد عبد المجيد) دا ايده
زى الثلج .

الدكتور - (يشرع فى استعمال السماعة ويطلب بإشارة من سوسن
أن تكف عن الدعك فتتوقف وتحملق فى وجهه) .

(يخلع السماعة) مش سامع حاجه يا خسارة ... يا خسارة .

سوسن - (تدق على صدرها) يا مصيبتى ... دكتور .

صابر - (هارعا الى جوار الدكتور) خسارة ايه يا دكتور ؟

الدكتور - خسارتى أنا طبعاً ... خسارتى فى عدم السمع ...
لكن معلش فيه طرق تانيه للفحص ... (يمسك يده ويعيد
النبض) النبض كويس ... منتظم وممتلئ ... (يقرب
وجهه من أنفه) والنفس هادى ومنتظم .

سوسن - لكن العرق ... شوف العرق يا دكتور الى نازل منه ؟
الدكتور - ايه بتقولى ايه ؟
سوسن - (صارخه) العرق ... بقول العرق ... شوف العرق
الى بيكت منه .

الدكتور - آه العرق ! - بس بتزعقى كده ليه يا بنتى ... أنا
صحيح سمعى تقل شوية ... لكن لسه مابقيتش أطرش ...
العرق دا يمكن يكون علامة على الهايبرترميا . Hyperthermia
سوسن - (بعزم) نينه ... نينه ... أنا فى عرضك لازم تمشى الراجل
ده ونجيب دكتور ... لازم اكلم دكتور ... مين ... مين ؟ براده
... جنيته ؟

صابر - وايه الى حيجيب دول حلوان دلوقت ... يا سوسن
الموضوع بسيط دا رد فعل الارهاق الى حصل له نعمل ايه
بقى فيكم ... ما أنتم أحوالكم لها العجب .
سوسن - (تبكى) يا رب ساعدنى يا رب . اعمل ايه يارب دلوقت
... أنا عازفه ايه الى بيجرالنا ده ؟

الدكتور - (متذكراً) آه الحقنه ... فى الحقنه بتاعتى الى كنت
عاوز أغلبها وادبها للهانم ... هاتوا الحقنة ، الكورامين ينفعه
سوسن - (صارخة) لا ! بلاش الحقنة ... بلاش الحقنة دى ...
ما اقدرش أعمل حاجه الا لما يشوفه دكتور ... (لا تكاد
تلفظ الكلمة حتى تتنبه لغلطتها) .

الدكتور - (مجروحا جدا) كتر خيرك يا سوسن هانم ... كتر خيرك على المكافأة اللى بتديها لى بعد ما جيتلكم وأنا عيان فى الفجر .

سوسن - (بخجل) أنا متأسفة ... متأسفة يا دكتور .

صابر - سبحان الله يعنى اشمعنى الكلمة الوحشة دى اللى سمعها - (يقترب من الدكتور) ايه هو أنت سمعت ايه ...

الدكتور - لا يا صابر بك أنا سمعت كويس قوى أنا مش أطرش ... بتقول لازم يشوفه دكتور ... أنا ما عنديش مانع يشوفه دكتور واتنين وثلاثة ... انما أنا اللى أقول ... أنا صحيح اعتزلت المهنة بعد احالتي على التقاعد من عشر سنين ... لكن دلوقت أنا هنا ... لازم تحافظوا على كرامتى (يشتد عليه الألم) آه ...

سوسن - كرامتك على العين والرائس أنا متأسفة ... حقك على (تقبل رأسه) .

الدكتور - الحقنه ... هاتوا الحقنة كرامتى لا تصان الا باعطاء الحقنة ...

سوسن - هى فين الحقنة دى ... تعرفى الحقنة دى فين ياهناء .
صابر - أظن عبد المجيد كان دخلها جوه .

سوسن - هناء ... روحى هاتى الحقنة - (تغافل الدكتور وتشير لها أن لا تفعل - تخرج هناء) .

الحاجة - (هامسة لعبد الحميد) قوم بقى انت راخر يامنيل أحسن تروح فى شربة ميه .

عبد المجيد - (ينازع) هيه ... هيه .

سوسن - (ترتدى عليه) عبد المجيد !

الحاجة - الحمد لله أهو فاق يا دكتور خلاص مافيش لازمة للحقنة .

عبد المجيد - هيه ٠٠٠ أنا فين ٠٠٠ جرائي ايه ؟
سوسن - انت بالسلامة يا حبيبي ٠٠٠ انت هنا في بيتك ٠٠٠ أنا
سوسن ٠

عبد المجيد - سوسن ؟ ٠٠٠ انت كويسه يا سوسن ٠
سوسن - كويسه يا حبيبي ٠
عبد المجيد - سامحيني يا سوسن ٠
سوسن - سامحتك ٠٠٠ سامحتك يا عبد المجيد وانت كمان سامحتني
(تجهش بالبكاء) ٠

الدكتور - (مبتهجا) الحمد لله ٠٠٠ ياما انت كريم يا رب ٠٠٠
الاعمال بالنيات ٠٠٠ أهو الواحد معتزل المهنة بقاله عشر
سنين لكن برده حننزل من هنا مجبورين الخاطر ٠

الشيخ صابر - يا سلام يا دكتور ٠٠٠ دا صحيح صدق من قال
الدهن في العتاقى ٠٠٠ والله لو الف دكتور ما كانش سرهم
يبقى باتع كده ٠ (الشيخ يبحث في جيبه ٠ ثم ينظر الى ناحية
سوسن) والواحد مش عارف يقدر فوزتك أد ايه ٠

الدكتور - بتقول ايه ؟

صابر - (متشجعا) الواحد مش عارف يقدر الفوزيته أد ايه ٠
الاتعاب يعني ؟

الدكتور - (كمن لسع) فوزيته ؟ فوزيته ! انت كمان عاوزتهيني
يا صابر بك ٠ هو انا جاي علشان فوزيته ٠٠ بقالى عشر سنين
على التقاعد وأسيب الفرش بالليل علشان فوزيته ٠٠٠ الله
يسامحك يا صابر بك أنا جيت هنا تلبية لنداء الواجب ٠٠٠
انت نسييت ولا ايه ٠٠٠ أنت نسييت كانوا بيعلمونا ايه بتوع
زمان ٠٠ يا سلام ٠٠ يا سلام ٠٠ فاكرك ٠ فاكرك يا صابر بك
أيام زمان ٠ أيام الشقاوة ٠

صابر - أيوه .. أيوه فاكر .. طيب حقك على علشان مسألة الفوزية
دى .. انما بقى أنا حادبك دوا الروماتيزم اللي حايشفك على
طول .. هو صحيح وصفه بلدى .. لكن مدهشة .

الدكتور - الحقنى ... يا اخويا الحقنى (يعاوده الاثم يتأوه)
(فى خلال الحديث السابق تكون اجراءات استنفاقه
عبد المجيد الكاملة فى طريقها - سوسن تساعده
وتجلسه على الكنبه وتمسح له وجهه بالكولونيا - ثم
تخرج لتحضر له ماء)

المشهد العاشر

الحاجة - الشيخ - الدكتور - عبد المجيد - هناء

هناء - (داخله) انت كويس دلوقت يا بابا .

عبد المجيد - (معانقا هناء) أنا آسف جدا يا هناء أنا آسف يا بنتى ،
أجنا بنزعجكم أنا ومامتك بدون مناسبة ... اخواتك عاملين
ايه ؟

هناء - ماتخافش عليهم يا بابا ... أنا نيمتهم .

عبد المجيد - مش عارف أقول لك ايه .. أنا مكسوف منك .

هناء - ماتحملش هم يا بابا ربنا يخليك لنا ... انت وماما .

عبد المجيد - انت عارفه والدتك يا هناء ، مافيش زياها فى العقل
والكمال والطيبة مالهاش ذنب ان ربنا خلقها مرهقة الاحساس
وأعصابها تضطرب لاقل شىء ، ولما تضطرب أعصابها تبقى
شخصية تانيه .

هناء - أنا عارفه ... عارفه يا بابا مايكونش عندك فكر بس دلوقت
قوم ارتاح .

عبد المجيد - مسكينة خليتنى ضربتها ، أنا مشألم جدا يا هناء
ماتأخذنيش يا بنتى فقدت أعصابى زى ما بتفقد أعصابها .

هنا - خلاص يا بابا المسألة انتهت ، جت سليمة والحمد لله . ماتفكرش
فى الى حصل (تدخل سوسن ومعها كوبة ماء)

سوسن - خد اشرب اشرب . حطيت لك عليها زهر كثير .

الدكتور - (متأملا منظر الزوجين من وراء المنظار) يا سلام . . .
مدهش . . . رائع عمرى ما شفت صورة من العطف والحنو
المتبادل بين زوجين بالصورة دى . . رينا يخليهم لبعض . .
شايف . . شايف يا صابر يا اخويا ابنك بيحب مراته اذ ايه
ومراته بتجبه أد آيه . . . دى حاجة تفرح . . . دى حاجة
نموزجية .

الحاجة - ايوه اضربهم يا اخويا من جديد عين . . حقه نموزجيه
قوى

الدكتور - (وهو يجمع حاجياته - ويأخذ الحقنة من هنا التى
جاءت بها اليه وتشكره) تعرفوا بقى ياجماعه أفضل علاج
دلوقت للحاله دى ايه ؟ الانسحاب . . ننسحب كلنا دلوقت
انت يا صابر بك والحاجة (يمسك هنا من خدها) والكتكوتة
الحلوه دى كمان تنسحب وتسبب الزوجين السعيدين
للطبيعه . . الطبيعه هي الى حتكمل الباقي

الحاجة - يوه يقطعك يادى الدكتور . . شوفى يا اختى الرجل

عبد المجيد - أنا مش عارف أعمل لك ايه يادكتور

(يبحث فى جيوبه - يذهب للجاكته - صابر يوقفه)

الدكتور - فوزيته انت راجر . . اخص عليك يا عبد المجيد . . هو
أنا باشتغل . . مش بقولك انى متقاعد ومعتزل المهنة من عشر
سنين . . أنا جيت علشان ألبى نداء الواجب

عبد المجيد - (صارخا فى اذن الدكتور) دى حاجه عظيمه جدا
دا انت نادره . . . دا انت فلتة

الدكتور - العفو . . العفو

عبد المجيد - (متصنعا الطرش) بتقول ايه ؟

الدكتور - (صارخا فى اذن عبد المجيد) بقول العفو .. العفو

عبد المجيد - طب وبتزغى كده ليه مانا سامع أهو صحيح سمعى
تقيل شويه لكن مابقتش أطرش

الدكتور - (يضحك) لطيفة .. كويسه .. شايف يا صابر
بك شايف الشقاوة

الحاجه - الله يجازيك يا عبد المجيد .. من يومه بتاع تنكيت

هناء - طب عن اذنكم بقى أنا حاروح انام .. عن اذنك يا بابا ...
عن اذنك ياماما

سوسن - (بصوت منخفض فى خجل) هناء

هناء - نعم ياماما

سوسن - عاوزه أقول لك حاجه

(تقترب منها هناء فتأخذها الى مقدم المسرح)

أنا متأسفه يا حبيبتي من الى حصل أنا بازعجكم أنا وابوكم
من غير مناسبه

هناء - ماتحليش هم ياماما ربنا يخليكى لنا انت وبابا

سوسن - انت عارفه والدك يا هناء ده مفيش زيه كله عطف وحنان

هناء - مقاطعة - أيوه ياماما .. عارفه .. عارفه .. بس ربنا

خلقه مرهف الاحساس واعصابه تضطرب لاقل شيء .. ولما

أعصابه تضطرب يبقى شخصيه تانيه .. مهسوطه بقى ..

أنا الدرس فاهماه كويس

سوسن - يعنى توعدينى ان ماتخليش الى بيحصل بينى وبين

أبوك له تأثير عليكى فى أى حاجه .. أنا مكسوفه منك

يا هناء

هنا - ياماما قلت لك ماتحمليش هم .. انا خلاص اتعودت على
الجو ده وفتحت عيني على المنظر ده ماتفكر يش فى الى حصل

سوسن - (تقبل ابنتها وهى تبكي ثم تسير معها حتى تخرجها)

الدكتور - السلام عليكم .. تصبحوا على خير

صابر - استننى يادكتور .. رايح فين أنا جاى معاك .. حديدك
دوا الروماتيزم .. تعالى يا حاجه .. وانتو بقى خشوا ناموا
(بتحبب) جاتكم داهيه .. يالله .. يالله يازينب تعالى
وسيبى الولاد الوحشين دول .. أنا زعلان منهم .. أنا مش
حاكلمهم

الحاجه - والله مانا عارفه يا صابر دا يمكن ان ماعملوش الهليله دى
كل شهرين ولا ثلاثه نتخض عليهم دى بقت عادة .. على
رأى عبد المجيد من لوازم الاسر السعيدة

سوسن - نينه

الحاجه - نعم ياسوسن

سوسن - أنا داخله أنا و عبد المجيد

الحاجه - يوه مانا عارفه يا بنت انكم حتناموا لازم تقولى لى ولا ايه

سوسن - (مبتسمة) مش كده يا صينة اخص عليكى انت بالك راج
لفين .. أنا بقول مش عارفه بعد العلقه الى خدتها أنا وعبد
المجيد حنصحي امتى .. وانت عارفه زكى بك وعيلته جاين
حايتغدوا عندنا

الحاجه - أيوه عارفه وعامله ترتيبى .. أم خليل زمانها جايه
خاليلها تدبح الديك وتولع عليه على ماتكونى صحيتى مش
ده الى عاوزة تقولىه ؟

سوسن - ربنا مايحرمينش منك يانينه يا حلوه يا قمره

الحاجه - شوفى ياختى البث ٠٠ الى يشوفها دلوقت مايشوفهاش
وهى هايجه ٠٠ لا دى لازم عليها عفريت مفيش كلام

سوسن - خلاص بقى يانيه خلاص ٠٠ مش خلاص يا عبد المجيد
عبد المجيد - خلاص يا حبيبتى خلاص

الحاجه - خلاص ٠٠ خلاص ربنا يهدى سركم ٠٠ (وهى تخرج)
والنبي لو يسمعوا كلامى ، دول عاوزين زار - (تخرج)

المشهد الحادى عشر

عبد المجيد - سوسن

سوسن - اخص عليك تضربنى يا عبد المجيد ٠٠ وأهون عليك

عبد المجيد - كانت تنقطع ايدى قبل ماتتمد عليكى

سوسن - بعد الشر عليك وعلى ايدك ٠٠ (تقبلها)

عبد المجيد - اخص عليكى وانا برده قليل الادب وسافل

سوسن - ينقطع لسانى يا حبيبتى

عبد المجيد - سلامتك وسلامة لسانك

سوسن - (بدلع) اخص على حبوبى

عبد المجيد - اخص على حبوبتى

(يتعانقان فى قبلة طويلة - تدق الساعة الرابعة)

(طوال القبلة)


ستاد



ليلة الحساب

مأساة ذات فصل واحد

وستة مناظر




ليلة الحساب
مأساة ذات فصل واحد
وستة مناظر

أبطال الرواية

فؤاد حبيب	: موظف بمصلحة الأملاك سن ٢٨ سنة
ابراهيم باشا العجمي	: أحد كبار الأعيان في العهد السابق سن ٥٧ سنة
علي أفندي أبو ستيت	: موظف سابق بوزارة الأوقاف على المعاش سن ٦٢ سنة
عثمان	: بواب نوبى سن ٥٠ سنة
عويس	: سفيرجى يعمل لدى ابراهيم باشا العجمي سن ٣٠ سنة
زينب	: زوجة فؤاد بنت بلد جميلة سن ٢٠ سنة
ميرفت	: ابنة ابراهيم السبكي فتاة مودرن سن ٣١ سنة

زمن الرواية :

شتاء عام ١٩٥٠



تمهيد

موسيقى تصويرية

« ترفع الستار أثناء عزف الموسيقى حيث تظهر ستارة سوداء وقد سلطت عليها الانوار الساطعة - ثم يسمع صوت يحدث المتفرجين من خلال المذياع »

الصوت

ذات ليلة ، في شتاء عام ١٩٥٠ وفي ليلة عاصفة استيقظ مؤلف هذه الرواية على قرع شديد على باب شقته فأسرع الى باب الشقة يتساءل عن الطارق في هذه الساعة المتأخرة من الليل فطلب منه الطارق أن يفتح الباب فوراً وأبدى استنكاره أن ينام المؤلف في هذه الساعة بينما تجرى الى جواره هذه الاحداث . وفتح المؤلف الباب فاذا بالدنيا قائمة قاعدة في شقة الجيران وأن الذي طرق عليه الباب كان أحد رجال البوليس . أما لماذا كانت الدنيا قائمة قاعدة في شقة الجيران ولماذا سمح البوليس لنفسه أن يزعج المؤلف بهذا الأسلوب فهذا هو موضوع هذه المسألة التي سترونها الآن . .

« الموسيقى التصويرية تعزف من جديد - يسود الظلام - ثم يرفع الستار عن المنظر الاول التالي »

المنظر الأول

المسرح مقسم الى ثلاثة أقسام - قسم في الوسط يستغرق القسم الأكبر من المسرح حيث تنور فيه حوادث الرواية الرئيسية وهناك قسمان آخران الى يمين هذا القسم وإلى شماله بمثابة جناحين للقسم الرئيسي وتجرى في هذين الجناحين المشاهد المتلاحقة التي تصور حوادث الماضي كما يرويها فؤاد . ويجرى استعراض الحوادث في هذه الأجنحة بأن يسود المسرح الظلام ثم يسقط شعاع قوى من الضوء على أحد هذين الجناحين حيث تجرى المشاهد . ولا يوضع بهما من الاثاث الا قطعة واحدة على سبيل الرمز لما سيشار له في حينه . . .

القسم الرئيسي من المسرح يتألف من حجرة مكتب يؤدي إليها باب من الصدر - في جدار الغرفة الايمن باب الشرفة التي تطل على الطريق العام . أرضية الحجرة عارية وهي من الخشب . يتألف الاثاث من مكتب صغير رخيص . أريكة (كنبة) من القش . مقعدان من القش (فوتيل) . كرسي خلف المكتب . على المكتب أوراق ومحبرة ومصباح كهربائي (شمعدان) يحيط بمصباح المكتب سياج من الزجاج الأخضر تظهر صالة الشقة من خلال باب الصدر أرضيتها من البلاط الملون - يتفرع من يمين الصالة دهليز مضاء بمصباح كهربائي صغير (لمبة سهارى) يؤدي الدهليز الى باقى حجرات البيت التى لا تظهر - فى صلا الصالة أى فى وسط المسرح تماما - باب الشقة الخارجى وهو مصنوع من الخشب والحديد والزجاج وعندما يضاء خارج الشقة أو يصعد (الاسانسير) المصعد الكهربائى ينفذ الضوء الى داخل الشقة ويضاء المسرح . لا يوجد بالصالة أى أثاث . عند رفع الستار تكون مظافة .

الشهد الاول

فؤاد (بمفرده)

• فؤاد جالس الى المكتب منهمك في الكتابة .
يستضيء بنور المصباح الكهربائي الموجود على المكتب
• لا يوجد على المسرح أى مصدر للضوء سوى نور
هذا المصباح • الصالة مظلمة كذلك • سكون يستغرق
ربع دقيقة • يسمع صوت صرير القلم • فؤاد يكتب
• يصل الى المسرح صوت ساعة من بعد وهي تدق
بصوت رهيب تسع دقائق يتوقف فؤاد عن الكتابة
عندما تشرع الساعة فى الدق وينظر الى ساعة فى يده
ثم يستأنف الكتابة بسرعة اكثر • بعد قليل يرمى
فؤاد بالقلم • يتنهد كما لو كان قد انزاح عنه
كابوس • يقف ويشعل سيجارة • لا يكاد يشرع فى
اشعال السيجارة حتى يسمع صفارة قطار يقترب •
ضجيج القطار يشتد مما يدل على أن البيت قريب جدا
من السكة الحديد • لا يلبث صوت القطار ان يتلاشى
بالتدريج نتيجة ابتعاده • تسمع صفارة مكتومة •
لا يكاد صوت القطار يتلاشى حتى يظهر الضوء على
المسرح من خلال زجاج باب الشقة • صوت صعود
(الاسانسير) • باب المصعد يفتح • لحظة • يدوى
جرس الشقة الكهربائي • يباغت فؤاد بالجرس • يظل
ساكنا بلا حركة • ينظر بحركة لا شعورية الى الساعة
فى يده • يدق الجرس ثانية • يلتقط فؤاد بسرعة
من فوق المكتب نظارة سوداء يبادر بلبسها فوق عينيه
• يسحب من فوق المكتب بعد ذلك مسدسا من نوع
ذى الساقية • يخرج منديلا يقربه من فمه ليغير به من

صوته ويساعد بقدر الامكان على اخفاء وجهه .. يخرج
من المكتب الى الصالة ..

فؤاد - (بصوت منخفض) من ؟

عثمان - أنا عثمان يا حاج سليمان

فؤاد - معك حد ؟

عثمان - لالسه ماجاش ...

فؤاد - (يبدو عليه الارتياح - يخفي المسدس ويخلع النظارة
ويدسها في جيبه) يضىء نور الصالة ثم يفتح الباب - يدخل
عثمان البواب)

المشهد الثانى

فؤاد - عثمان

فؤاد - فى ايه ياعثمان ؟

عثمان - ربنا يطول عمرك يا حاج الباشا الى بتقول عليه ماحضرش
لسه

فؤاد - ولكن أنا قلت لك ان الباشا حا يحضر الساعة عشرة ولسه
الساعة داقه تسعه

عثمان - أيوه انما أنا ما قدرش أنتظر أكثر من كده النهارده السبت
والليلة دى ليلة الاحد واحنا فى الليلة دى كل جمعه نجتمع
فى النادى مع بلدياتنا وهما دلوقت كلهم منتظرينى لازم
يكونوا دلوقت على نار وانا كمان على نار ولازم أروح
الجمعية بتاعتى

فؤاد - لا ياعم عثمان انت لازم تنتظر لغاية ما يحضر الباشا اعمل
معروف احنا اتفقنا على كده

عثمان - صحيح اتفقنا .. لكن انا كنت ناسى ان النهارده السبت
والليلة دى ليلة الاحد يعنى ليلة الجمعية .. والجمعية دى
عندنا مهمه خالص

فؤاد - (مقاطعا) أيوه أيوه عارف لكن انت اتفقت معايا وانا عملت ترتيبى على كده لازم تنتظر لغاية مايحضر الباشا ده ضيف عزيز على جدا (تخطر عليه فكرة - يبحث فى جيبه عن نقود - يعثر على نصف ريال) خد ياعثمان نص ريال كمان اهو وانزل بسرعه احسن يمكن يحضر قبل الميعاد

عثمان - (يأخذ النصف ريال بلهفه ويدسه مسرعا فى جيبه) طيب معلش غلشان خاطرك بس وغلشان كنا اتفقنا و احنا دائما نحترم كلمتنا .. انا حا انتظر لغاية الساعة عشرة ان ماحضرش لغاية عشرة حامشى على طول اروح الجمعية

فؤاد - لامتاخافش انا متأكد انه لازم يحضر قبل عشرة (تلمح عيناه ويحول وجهه عن عثمان ويخاطب نفسه)

عثمان - طيب عن اذنك بقى .. (يهم بالانسحاب)

فؤاد - (وقد خطرت له فكرة) لما يحضر الباشا اطلع معاه فى الاسانسير وافتح له باب الشقه .. اوع تنسى ياعثمان زى ماعلمتك ، المفتاح مش معاك ؟

عثمان - أيوه

فؤاد - وتدخله فى غرفة المكتب يمكن اكون انا مشغول فى المطبخ بحضر الاكل واذا سأل عنى تقول له اهو جاى حالا بس مشغول فى المطبخ تقدر تعمل كده ياعم عثمان ؟

عثمان - ياسلام دى حاجة بسيطه جدا .. نطلعه هنا ونقعه فى غرفة المكتب ونقول له الحاج سليمان مشغول فى المطبخ .. حاجه بسيطه جدا (ينسحب) السلام عليكم

فؤاد - وعليكم السلام ياعم عثمان فتح عينك اوع تنتقل من جانب الباب

عثمان - عيب يا حاج سليمان احنا بنلعب ولا ايه ؟ (صوت باب المصعد يغلّق ثم صوت المصعد وهو يهبط)

المشهد الثالث

فؤاد بمفرده

« لا يكاد يغلق الباب خلف عثمان حتى يرتكن على الباب من الجهد والاعياء .. يتلفت حوله فى أنحاء الصالة .. يتنهد .. يعيد فتح باب الشقة فى هدوء وينصت فلا يسمع شيئاً - لحظة سكون - يعيد غلق الباب فى هدوء - يواجه المتفرجين لأول مرة مواجهة كاملة - يرى شكله الحقيقى أصفر اللون - غائر العينين - تحيل الجسد من فرط الهم - ترى آيات التصميم حول فمه وفى تقطبية ما بين عينيه - يتجه نحو المكتب ، يضىء النور فى الحجرة - يخرج المسدس من جيبه - يفحصه - يفتحه ويتأكد من وجود الرصاصات الست من الماسورة ثم يعيدها الى موضعها .. ينظر فى الماسورة فى اتجاه الضوء .. تسمع صفارة القطار ينزعج بمجرد سماعها ويبدو عليه الاهتمام طوال اقتراب صوت القطار - ينظر فى ساعته خلال الفترة التى يتصاعد فيها ضجيج القطار حتى يغمر المسرح ثم لا يلبث أن يتلاشى الصوت تدريجياً .. يبدو القلق والعصبية على فؤاد - يضع المسدس على المكتب يروح ويحيى فى الحجرة - صوت الرياح ، يبدو عليه كما لو كان سمع شيئاً - يتجه نحو باب البلكون يفتحه يختفى فيه لحظة ثم يعود للظهور وقد بدا عليه فرح وحشى - يغلق باب البلكونه .. ويتحرك بسرعة فيأخذ المسدس من فوق المكتب »

فؤاد - وصل .. أخيراً ، تمام زى ما توقعت .. جه قبل الميعاد (يحاول الخروج ولكنه لا يلبث أن يتوقف فجأة) ولكن دا مش بمفرده .. اصطحب شخصاً آخر (يظهر عليه التردد - ثم يعاوده العزم والتصميم) ولو ..



فؤاد : يفحص ماسورة المسدس فى اتجاه الضوء بعد أن تأكد من وجود الرصاصات الست

« يخرج من الحجر وعندما يصبح في وسط الصلاة
يقف منصتا - يسمع صوت المصعد يقترب فيسرع
بمغادرة الصلاة الى الدهليز حيث يختفي داخل أحد
الابواب • المسرح خال تماما - سيكون - يسمع صوت
المصعد وقد وصل - رياح - رعد - حركة في خارج
الشقة - صوت أقدام مختلطة - يرتفع من بينها صوت
عثمان وهو يقول : دى شقة الحاج سليمان •• دا
منتظر كم طول النهار »

(يفتح الباب •• عثمان يتقدم القادمين لارشادهم)

المشهد الرابع

العجمي - أبو ستيت - عثمان

عثمان - آتفضل ياسعادة الباشا

« يدخل ابراهيم باشا العجمي فارغ القامه ولكنه
مترهل الجسم - له كرش - سريع الحركة على الرغم
من بدائه - أسمر اللون - يبدو عليه النشاط والسكر
فقد شرب خمرا قبل حضوره - يرتدى بدلة رمادية من
الصوف ويرتدى صديري البدلة وفوقه (بلوفر) صوف
كحلي وعلى رأسه طربوش طويل نسبيا • ويرتدي
معطفا فاخرا ••

يدخل وراءه على أبو ستيت وهو رجل نحيل وقصير
القامة تجاوز الستين له لحية خفيفة تحيط بوجهه
يرتدى حلة سوداء قديمة - يمسك في إحدى يديه
مسبحة ضخمة الحبات ويحمل في اليد الأخرى مظلة
وبعض الصحف •• طربوشه قصير بصورة تلفت
النظر »

العجمي - (متلفتنا حوله ومتكلما بصوت مرتفع وفي مرج) الله ،
امال فين الحاج سليمان ؟

عثمان - (مسرعا خلفه ومتجها صوب حجرة المكتب) حالا جاي
ياسعادة الباشا اتفضل في غرفة المكتب دا الحاج سليمان
منتظر سعادتك من بدرى وكلفنى انى ما اروح الجمعية علشان
استقبل سعادتك ربنا يطول عمرك ياباشا . انك شرفت ، لاني
كنت قاعد على نار عاوز نظير نروح الجمعية بتاعتنا

أبو ستيت - ياسلام ياباشا انظر التضامن بتاع النوبيين انظر
ياباشا اهتمامه بمقابلة بلدياته دول لهم تنظيمات عظيمة .
تعرف ياباشا انا معجب جدا باخوانا النوبيين ومساعدات اعتبرهم
من أحسن الناس في مصر

عثمان (مبتهجا) العفو ياسعادة البك . . احنا خدامين دا بس من
لطفك

أبو ستيت - خدامين ؟! كفايه عليكم الامانة في زمن ضاعت فيه
الامانة . . انت بتظن ياباشا الناس بتعهد لهم بحراسة البيوت
ليه . . ماهو بسبب امانتهم العجيبة

العجمي - (متبرما) طيب . . طيب ماعلينا

عثمان - ربنا يسترك ياسعادة البك انت راجل طيب جدا

أبو ستيت - شالله ياسيدنا الحسين ، ولا نضاقتهم ياباشا !
خصوصا يوم الجمعة وهما بيصلوا وملابسهم كلها بيضا
مغسولة ومكوية وعلى رأسهم العجم
« يبلو التبرم على العجمي الذي خلع معطفه
ووضعه على أحد الكراسي وجلس على الاريكة
مظهرا عدم رضائه »

عثمان - العجم تيجان الاسلام والتظافة من الايمان ياسعادة البك
ياسلام دا انت راجل طيب جدا ، انت من الصالحين ياشيخ



عثمان (البواب) : اتفضل ياسعادة الباشا سليمان منتظر سعادتك
من بدري .

العجمي - (في خشونة) طيب كفايه بقى روح لول لسيدك أن
ابراهيم باشا العجمي حضر ومعه واحد ضيف تانى وهو
الاستاذ على أبو ستيت ٠٠ ياللا أسرع

عثمان - (يرتبك) حاضر ياسعادة الباشا لا مؤاخذه يا سعادة
الباشا

يظهر استياءه ٠٠ وعندما يكون في الصلاة يقوم بحركة
كما لو كان يبصق على هذا الباشا - اتفوه - ٠ ويذهب
نحو الدهليز وهو يقول : يا حاج سليمان يا حاج ٠٠
فؤاد يظهر من أحد الابواب ويشير الى عثمان أن يقترب
منه ٠٠ يشرع عثمان فى الكلام ثم يختفى ليتحدث مع
فؤاد ،

المشهد الخامس

العجمي - أبو ستيت

العجمي - ياراجل انت مش حتبطل شغل العبط بتاعك ده ، انت
حتتصاحب مع الخدام ٠٠ غاوزه حضرتك يقعد يانسنا والا
ايه ؟

أبو ستيت - يا باشا انا بخلص ذمتى من الله ٠٠ أنا معجب جـ
بالنوبيين ٠٠ أنا أصلى باجتماع معاهم فى مسجد المنيرة
ويستوقفنى ايمانهم العجيب

العجمي - قلت لك بلاش هوسه جتك نيله طول عمرك فقـرى
وحفضل فقـرى ٠٠ ايه الفلسفة الخدامينى دى ٠٠ ده بواب
خدام يعنى يامغفل ؟

أبو ستيت - يعنى هو الخدام مش بنى آدم يا ابراهيم باشا ؟ ربنا
يقول ان أكرمكم عند الله اتقاكم سامع يا باشا ان أكرمكم عند
الله اتقاكم ٠٠ لم يقل أغناكم ٠٠ لم يقل أقواكم ٠٠ بل اتقاكم .

العجمي - اسمع يا جـدع انت ٠٠ أنا مش جايبك هنا علشان

تكنن على بالكلام الفارغ بتاعك ٠٠ أنا معمر راسني وجاين
نتعشى ونضحك ماتطيرش بقى الكام كاس من راسي بكلامك
الفارغ ده

أبو ستيت - (فزعا) كلام فارغ ؟ أعوذ بالله ده كلام فارغ ؟ دا
قرآن ياراجل أعوذ بالله أمال كنت فى الحجاز بتعمل ايه ؟
العجمي - أهم قعدوا يدوشوا دماغنا بالكلام بتاعك ده شـهر
بأكمله كفايه على بقى

« يظهر عثمان ويشرع فى غلق الباب »

عثمان - عن اذن سعادة الباشا (يغلق الباب)

العجمي - خليه مفتوح يا ابن الايه خلينا نتفرج (لـ أبو ستيت)
لازم الحريمات حيحضروا العشا

أبو ستيت - حريمات ايه ياشيخ انت جتفضل طول عمرك كـده
غرقان فى الحريمات دول ؟ (يتلفت حوله) والله ياباشا انا
متضرر جدا من حضوري معك الى مكان لأعرفه ، زمان أولادى
منتظرينى فى البيت زى العادة وعمرهم ما حيتعشوا لغاية
ما أرجع وخصوصا الليلة واحنا طابخين ملوخية بأرانب -
(يقول فى حدة) بقى فى أول مرة نتقابل فيها صدفة بعد
كام سنه تقوم تجيبنى معاك فى بيت لأعرفه علشان اتعشى
فيه ٠٠ والله يا ابراهيم باشا طول عمرك لك تحكيمات ؟
بالعربى أنا متأذى جدا ومكسوف

العجمي - أنا جبتك معايا عشان اتعكز عليك ساعة ماشفتك
قلت دا نزل على من السما فى الحقيقة انا كنت فى طريقى الى
هنا ولكن كنت اتمنى لو معايا حد اتونس به فما صدقت
لقيتك يا ابو الاساتيك ٠٠ فاكرو لما كنا فى المدرسة نناديك
بيا ابو الاساتيك ؟

أبو ستيت - لكن يا باشا هذا لا يصح ، رجل بتقول انه عازمك لأول مرة تقوم تحضر له معك واحد لا يعرفه ؟

العجمي - وفيها ايه يامغفل دي حفلة ٠٠ حفلة بمناسبة عودتنا من الحجاز ياجدع اتنجر اتلحج كده واتمتع لك يومين ٠٠ حتفضل طول عمرك تعيش وتموت زى الحمار ؟

أبو ستيت - (الذي كان قد جلس - يهب واقفا من فرط الالهانة)
لا! لا! حمار؟! استغفر الله العظيم بقى يا باشا انت جاييننى من عرض الطريق لكى تقول لى انى زى الحمار ٠٠ أنا أحتج بشدة .

العجمي - (ضاحكا) الله الله من امتى كده يا أبو الاساتيك ، دا انت خسرت جدا ٠٠ طول عمرنا فى المدرسة نهزر معاك ما كنتش تزعل آيه الى جرى ؟

أبو ستيت - أيوه انما احنا دلوقت لسنا فى المدرسة انا راجل محترم رب أسرة . صحيح انت باشا قد الدنيا وعندك يمكن ألف فدان وأنا راجل على قد حال فى المعاش وبأخذ تسعة جنيه وه ٤ قرش وستة مليم كمان لكن انا رب أسرة محترم علمت بنتى واولادى وعشت طول عمري بشرف ولا تنسى انى أكبر منك فى السن وأقدم منك فى المدرسة ٠٠ أنا كنت فى سنة رابعة وانت كنت فى سنة أولى .

العجمي - (ضاحكا) ماهى دي خيبتك الثقيله يا أبو الاساتيك فضلت راقد فى سنة رابعة لحد محصلناك من سنة أولى ٠٠ وما صدقت خدت الابتدائية ورحت متوظف بيه على طول فى وزارة الاوقاف وعملتلى فقى (يضرب بيده على صدره مازحا) وبرده مش عاوز تعترف انك حمار (يضحك)

أبو ستيت - (يقفز من الالهانة) يا باشا أنا لأسمح لك ٠٠ أنا مش حمار أنا لى ابن مهندس ولى بنت مدرسة ٠٠ أنا راجل فى

حالى وعمري ما أذيت حد .. انا ماينقاليش حمار .. أنا
لازم أخرج من هنا .. ماكنش لازم أطاوعك واجي معاك
علشان تهينى (يصفق بيديه) لازم ييجوا يوسعوا السكه
ويخرجونى من هنا .. أنا مش مستعد اسمع اهانات علشان
انت باشا

العجمى - (يقهقه ، ضاحكا) الله يجازى شيطانك ياشيخ .. دا
أنت اتحمقت قوى (يجذبه من يده ويجلسه) طيب حقك
على يا ابو الاساتيك انا ياسييدى الى حمار مش انت ..
مبسوط بقى ياعم ؟ خليك بحبوح هو احنا خناخد منها
حاجه غير الفرفشه وشوية التهييص ؟

ابو ستيت - ياراجل اختشى .. حتفضل طول عمرك غارق فى
الهلس ده الى بتسميه تهيص وفرفشه ؟ دا أنت لازم تكون
جاوزت الستين .. هو انت سنك مش من سننى ؟

العجمى - فشر ياعجوز ياكهنه .. انا من سنك ؟ أنا عمري
دلوقت ٥٧ سنه ولسه ماكملتهمش .. والرك يا عبيط على
القلب على شعورك واحساسك .. أهو انت كنت طول عمرك
عجوز وانت عمرك ١٢ سنه .. كنت عجوز لانك دايم
كثيب مش عاوز تلعب مش عاوز تفرفش .. أما انا شباب
وحافظ طول عمري شباب .. أنا حاعيش مائة سنة ..
انت سامع يا ابو الاساتيك حاعيش مائة سنة ويمكن اكتر
وافضل شباب زى البمب لان الرك على القلب ومفيش حاجه
تخليك شباب طول عمرك الا الشرب والنسوان يامففل

ابو ستيت - أعوذ بالله شوف ياخويا الراجل الى ما يخنشش
بيتكلم ازاي ؟ ده يظهر ان كل الى باسمعه عنك صحيح
يا ابراهيم ياعجمى .. ياراجل دانت لسه راجع من الحجاز
.. طيب دنا ساعة ماقريت الخير فى الجرائد وقالوا

آنك مسافر تحج والله العظيم فرحت لك من كل قلبي
يا ابراهيم وقلت يمكن ربنا بقى يهديك

العجمي - مهر برده أنا رحمت الحجاز للغرض ده ٠٠ مش يقولوا
ان الى بيحج بيتغسل من ذنوبه ويعود كما ولدته أمه ؟

ابو ستيت - لكن ما انت غارق تانى أهو فى المعاصى لغاية شوشتك
ادى انت شارب خمر والعياذ بالله وقاعد تتكلم عن النسوان
والحظ والفرشة

العجمي - الله مش قلت لك أنا خلصت الحساب القديم ومبقاش
على حاجه ٠٠ مش حجيت خلاص ؟ لازم أفتح حساب جديد
ولما الحساب يتقل يا ابو الاساتيك كمان كام سنه ابقى
أروح أحج تانى

ابو ستيت - يا راحل هو انت ضمنت عمرك ٠٠ هو انت حتخلد فى
الدنيا ؟ سيدنا عمر بيقول أعمل لدنياك كأنك تعيش أبدا
وأعمل لآخرتك كأنك تموت غدا

العجمي - أهو ده الفرق بينى وبينك ٠٠ انت طول عمرك تفكر
فى الموت اما انا لأفكر الا فى الدنيا ٠٠ فى الحظ والفرشة

ابو ستيت - يبقى مفيش فايده من الحج بتاعك ٠٠ لم تستفد الا
ضياع مالك ووئتك ٠٠ صحيح ان ربنا غفور رحيم صحيح
ربنا بيقول انه يغفر الذنوب جميعا لكن هذا بشرط ان
الانسان يتوب توبه نصوحه

العجمي - مهر انا وحياتك يا ابو الاساتيك ناوى ماأعملش حاجه
بطاله أبدا بس موضوع النسوان ده يا ابو الاساتيك مش
قادر عليه ٠٠ ساعة ما أشوف وظوظه تلاقى جسمى
ماتعرفشى ازاي (يتلفت حوله فى شغف وشبق) انكهرب

ابو ستيت - اللهم احفظنا يارب ٠٠ طيب والحمرة ! الى

ربنا قال عليها رجس من عمل الشيطان دى رخره مش
حتبطلها ؟

العجمي - أما مالكشى حق يا ابو الاساتيك .. طيسب والخمرة
دى رخره مالها ؟ الخمرة دى مزاج .. لما الواحد يشرب
خمرة مزاجه بيصلح .. هو ربنا عاوز يمكنن علينا والا ايه ؟
انت ما دام قارئ قرآن وحافظه مش قرئت الآيه الي بتقول
« يسألونك عن الخمر قل فيها منافع للناس » ؟

ابو ستيت - (ينتفض من الغضب) اعسوذ بالله يا راجل حتى
القرآن .. انت عاوز تكفر ولا ايه ؟ « يسألونك عن الخمر
والميسر قل فيهما اثم كبير ومنافع للناس واثمهما اكبر من
نفعهما »

العجمي - أهو مش بقولك فيها منافع للناس ؟

ابو ستيت - واثمها أكبر من نفعها

العجمي - وبعدين بقى يا ابو الاساتيك .. انت حتخلينى أندم
الى جبتك معايا والا ايه ؟ بقى أنا جايك علشان اسلى معاك
ونقعد نهزر عاوز تقلبهاالى بغم .. ياشيخ خليك بحبوح ..
ماحدش واخذ منها حاجه .. يعنى هو احنا آلى خلقنا نفسنا
ماهو ربنا آلى خلقنا كده .. مش بيقول ويعفو عن كثير ..
مش سمى نفسه الرحمن الرحيم .. ان ماكناش احنا
ياعبيط نذنب ونعصى امال يبقى حيرحم مين ؟ تبقى فمين
رحمته آلى تتسع لكل شىء .. أسكت اسكت ياشيخ خلينا
نهيص ونفرفش ماحدش واخذ منها حاجه - دا ربنا كبير
كبير جدا خد سيجاره عفر ..

(يخرج علبه السجائر ويقدمها لابی ستيت)

ابو ستيت - لا ياسيدى يفتح الله ... ما بشر بوش

العجمي - حتى السجائر ؟ لا يا ابو الاساتيك دا انت مزودها

حدا .. دا انت يا بعيد حاطر شق من جنابك .. طيب
والسجاير دى الاخرى حرام ؟ تقدر تقول فيها حاجه ؟

ابو ستيت - ماقلتش فيها حاجه . ياسيدى . لكن لما يكون واحد
غلبان زيبى كان ساعات مرتبه يكون خمسه او سته جنيشه
تقدر تقول لى ازاي اشرب سجاير واربي اولادى ؟

(يقطع الكلام فجأة ويلتفت حوله بقلق)

الله .. لكن احنا الكلام سرقنا كده ونسينا نفسنا . فين

أمال صاحب البيت ياباشا ؟ ماجاش ليه ؟

العجمى - مش قال لك البواب انه مشغول فى تحضير العشا ؟
يعنى انت عاوز منه ايه ماخنا قاعدين مع بعضينا نتسلى
اهوه

ابو ستيت - (وقد استبد به القلق) قاعدين نتسلى ؟ لكن ياباشا
أنا شاعر ان موقفنا غير طبيعى .. أنا منزعج .. تكونشى
غلطت فى البيت ؟

العجمى - ياراجل .. ياراجل يمدھول على عينك ماتخلىنيش
بقى أقولك يا حـ ..

ابو ستيت - (مقاطعا) لا .. لا .. ياباشا انا امنعك تقول لى ياحمار
العجمى - (يجلسه ثانية وهو يضحك) ماتخافش يا ابو الاساتيك
مش حاقول لك ياحمار ، ازاي ياراجل تتصور اننا نكون
غلطانين فى البيت ؟ مش البواب هو الى طلعننا .. مش
سامعه بودنك بيقول ان الحاج سليمان كان منتظرنا طول
النهار ؟

ابو ستيت - (بصوت مرتفع) طيب وهو فين الحاج ده ؟
العجمى - مش قالك البواب انه مشغول فى المطبخ بيحضّر العشا ؟

أبو ستيت - يحضر العشا؟! وهو ده اسمه كلام؟ مش ييجى أولا
يسلم على ضيوفه ويرحب بهم وبعدين يبقى يروح يشوف
شغله؟ ولا يسبهم كده يرنوا... لالا اسمح لى ياباشا دى
قلة ذوق وأقولك كمان وقلة طهى .

العجمى - أصلك غشيم مش واخد على الحاجات دى... مش واخد
على الغرز مش وش مغامرات لذينة . تعرف تعرف يا أبو
الاساتيك ساعات كانت تحكم على الواحد يقعد ليله بحالها
مستخبى تحت السرير .

أبو ستيت - يا ساتر يا رب... سلام قولاً من رب رحيم أنا ياباشا
بالعربى ماحبش أسمع الحكايات دى .

العجمى - (غامزا) ياراجل يامناق هو احنا معانا
حد دلوقت؟! مراتك معانا ولا حد من مشايخ الحسين قاعد
معانا؟ بلاش نفاق بقى وخذ راحتك بقى بدمتك... بدمتك
يا أبو الاساتيك عمرك ما عملتها؟ عمرك ما استخبيت تحت
السرير

أبو ستيت - يا راجل اختشى على عرضك ايه اللي حيخلينى استخبى
تحت السرير .

العجمى - تكون يعنى كده ولا كده... قاعد مع واحدة صاحبك
ويروح جوزها يعنى كده جى على غفلة ومايكونش قدامك
يا حلو الا تحت السرير .

أبو ستيت - اللهم احفظنا يا رب... يا راجل آتق الله دانت مجوز
دا انت عندك ولايا هو الحج ده مصلحش فيك حاجة أبدا .
(تنطلق صفارة القطار يفزع أبو ستيت من صوتها -
ضجيج القطار وكلما ازداد الضجيج كلما ازداد أبو
ستيت فزعا ، ولا يكاد صوت القطار ينتهى حتى يقول
أبو ستيت)

أسمع يا باشا أنا بالعربى الفصيح مش مرتاح لقعدتنا دى
أنا عاوز اخرج من هنا . أنا شايف ان وجودنا بالشكل ده
مش طبيعى أبدا . انت تعرف الراجل صاحب البيت ده من
زمان؟

العجمي - لا معرفوش ...

أبو ستيت - يا نهار اسود؟! انت جاي في بيت واحد ماتعرفوش
علشان تتعشى وكمان جاييني معاك بصيفة طرطور ...

العجمي - ماهو يا حضرة الطرطور دي حفلة عشا زى ما قلت لك -
اتفضل أما اقرأ لك تاني تذكرة الدعوة (يبحث في
جيبه عن بطاقة الدعوة فيعثر عليها) اسمع يا سيدى (يقرأ)
دعوة - يشرف الحاج سليمان الأعسر المكاول بدعوة سعادة
ابراهيم باشا العجمي لتناول العشاء بداره ٦ شارع حلوان
بالدور الثامن وذلك في الحفل الذى يقيمه بمناسبة عودته
من الحجاز في تمام الساعة العاشرة مساء يوم ...

أبو ستيت - (مقاطعا) حفلة؟ فين هي الحفلة دي؟ فين المعازيم
فين المعازيم فين التعاليق؟ فين صاحب البيت؟ حفلة عشا ايه
فى نص الليل ووسط الشتا والرعد والبرق .

العجمي - هو ده الفرق بين الراجل الكهنة المهلهل زيك الى عايش
فى الاوراد والفته بثاعة سيدنا الحسين وبين الراجل الملح
الى عاوز يتمتع بالدنيا الى عاوز يتمتع بالدنيا يا على يا أبو
ستيت لازم لا يعرف حر ولا برد ولا صيف ولا شتا ولا ليل
ولا نهار دي فرص يا عبيط ... فرص لاتعرف امتى تقابلك
ولا فين ولا ازاي ... تعرف تعرف واحنا قاعدين دلوقت
يمكن تبص تلاقى على غفلة واحدة داخله زى القمر ولا لهطة
القشطة ... دي فرص فرص يا عبيط اتعلم بقى اتنحرر
انت ايه؟

أبو ستيت - أنا يا عم لا عاوز اتعلم ولا أنا عاوز اتنحرر بس ربنا
يستر علينا يا باشا خليك جد شوية انت متقدرش تبقي جد
أبدا؟ انت مش فاكرا ان البواب هو الى فتح لنا واننا من
ساعة ماجينا قاعدين لوحدنا؟ ... فين هم المعازيم؟
(ينصت) الى ما فيه حس صريخ ابن يومين؟! (يشم)
الى ما فيه ريحة طيبخ ولا ريحة ثقلية ولا لحة بتتحمرو
بتتشوى ...؟!

العجمي - (ضاحكا) أيوه أيوه اعترف كده ان عصافير بطنك

رُفِزْتُ وريقتك أبتدى يجرى (ينظر فى الساعة) انت
حضرتك ناسى اننا جينا بدرى ؟ الميعاد عشرة والساعة لسه
تسعة وثلاث .

أبو ستيت - (وقد ظهر عليه العزم يقف ويتجه نحو الباب) تسعة
ايه يا عم وعشرة ايه ؟! وأنا ايش رمانى الرمية السوداء دى
خللينى أروح لبيتى وعيالى والملوخية بتاعتى (ينصت -
سكون) يأنهار اسود مفيش حس خالص مفيش كركبة
صحون ولا أطباق أنا خايف يا باشا أنا لازم أخرج من هنا .
(يخطو نحو الباب) .

العجمى - (يضحك) الله على فىن يا حضرة . . كده كده لا احم
ولا دستور هى وكالة من غير بواب ولا ايه يا حضرة الافندى ؟

أبو ستيت - وحياء أبوك يا باشا سيبنا من الهزار بتاعك دلوقت
أنا قلبى مقبوض (يتلفت حوله) الله داحنا زى المحبوسين
دحنا زى الى وقعنا فى مصيدة . . . أنا لازم افتح الباب
واخرج .

(لا يكاد يخطو نحو الباب حتى ينفتح الباب بقوة ويرى
فؤاد شاهرا المسدس بعنف وهو يبدو كالمارد)

المشهد السادس

السابقون - فؤاد

فؤاد - (وقد ارتدى المنظار الاسود وأشهر المسدس فى عنف يتكلم
طوال المشهد القادم بانفعال جنونى جاحظ العينين مخنوق
الصوت)
عندك . . . ارجع .

(يثب ابراهيم العجمى مذعورا بينما يصعق أبو ستيت
فيحملق بعينيه حتى لتكادا تخرجان من محجريهما
وتسقط منه المظلة على الارض بينما تظل الصحف فى
يده ترتفع اليد الاخرى التى تمسك بالمسبحة يظل
جامدا فى وضع مضحك نتيجة الذعر الذى أصابه)



• فؤاد : (وفد ارتدى المنظار الاسود واشهر المسدس في عنف وراح يتكلم
بانفعال جنوني) عندك .. ارجع

العجمي - (واثبا) ايه ده ؟ فيه ايه ؟

فؤاد - (بصرامة) اياك تتحرك ، ولا كلمة ، مش عاوز أسمع صوت
أبو ستيت - يا ليلة مطينة على رأسك يا أبو ستيت ؟ هي دي العشوة
الى عزمتنى عليها يا باشا ؟

فؤاد - (مشهرا المسدس فى وجه أبو ستيت) اسكت يا راجل
انت مش عاوز اسمع صوتك ولا كلمة سامع .

أبو ستيت - (فى منتهى الذعر) أيوه سامع حاضر حاضر يا بنى
سكت اهوه .. أدينى ساكت كويس كده ؟ كده يعجبك ؟

فؤاد - (صارخا فى أبو ستيت) اخرص ... اوع تفتح بقل .

أبو ستيت - (يزم فمه بشدة مرسلا صوتا يدل على ما يبذل من
جهد ثم يقرر أن يضع يده على فمه ليمنع صدور أى صوت
يخرج من فمه رغم أنفه) .

فؤاد - (مخاطبا العجمي) اقعد يا ابراهيم يا عجمي اقعد يا باشا
ارتاح خد نفسك لغاية ما اصفى حسابى معاك وان كنت تقدر
تتشاهد على أروحك اشاهد لانك حتموت حالا يا ابراهيم
يا عجمي (يضحك فى وحشية) .

العجمي - (يتهاوى جالسا من الرعب) انت مين أنا ما اعرفكش ايه
الهزار السخيف ده ؟

فؤاد - ده مش هزار يا باشا ده جد جدا جدا انت ما تقدرش تتصور
ان فيه حاجة جد أبدا حتى وانت على أبواب الأبدية ؟ الى
انت فيه ده يا باشا مش حلم دا علم حقيقة ، سعادتك لسه
ماعرفتنيش ؟ لسه ماعرفتش صوتى ؟ يا سلام أنا كنت نكرة
فى حياتك للدرجة دي ؟

العجمي - (وقد بدأ يدرك شخصية فؤاد يمتلكه الفزع فيهم
بالوقوف) .

فؤاد - (صارخا فى وجهه) اقعد ... اوع تتحرك يظهر سعادتك
ابتديت تعرف أنا مين وابتدى الخوف يملأ نفسك لانك عارف
جريمتك معايا ، أيوه يا سعادة الباشا أنا فؤاد .

(ينزع النظارة السوداء ويقذف بها في ركن من الحجرة بعنف)

المجمل - (في رعب شديد) فؤاد حبيب ؟ .

فؤاد - أيواه فؤاد حبيب يا سعادة الباشا فؤاد حبيب ربيب نعمتك
ساقط الكفاءة ألى شغلته بسة جنيه وفضلت ترقيه لغاية
ما خليت مرتبه عشرين جنيه .

أبو ستيت - الحمد لله أديكم طلعتم معارف سيبي بقى والنبي يا ابني
خلليني أروح بيتي قبله وبعدين اتعابوا مع بعض زي ما انتم
عاوزين .

فؤاد - (منتهرا) بقولك اسكت .

أبو ستيت - والنبي أنا مظلوم أنا ماليش دعوه بالموضوع ده
أنا ماعملتش حاجه وعمري ما أذيت حد دا جابني بالصدفة
كنت مروح لبيتي وعيالي مسك فيه وقاللي تعالى دى حفلة
تكريم معمولة علشانى أقول له ، سيبي مرأتى طابخه لي
ملوخية على حدة أرنب يقول تعالى حتاكل رومي يامقفل هوده
الرومي يا سعادة الباشا ؟

فؤاد - (بغضب شديد) اسمع يا راجل انت ، انت مش شايفني
مجنون ، بعدين خموتك قبل ما أموته (مهددا بالمسدس)
حتسكت ولا لا ؟

أبو ستيت - (بفزع) حاضر حاضر طيب بس ماتزعلش مني والنبي
يابني دا نا من العواجز .

فؤاد - ماتخافش مني أنا مش حاذيك اذا كنت تقعد ساكت وتنفرج
بعنيك روح أوقف في الركن ولا تتحرك .

أبو ستيت - (يتحرك بسرعة محاولا ارضاء فؤاد) فين ؟ فين ؟ أي
ركن يا ابني ؟ هنا ؟ هنا ؟ هنا كويس ؟ (يلتصق بالحائط
بصورة مضحكة)

فؤاد - أقعد أحسن على الكرسي وبعدين عاوز أنسى انك موجود وده
آخر انذار ذنبك على جنبك .

(أبو ستيت يجلس على أحد المقاعد فى الركن ويتشبث بالكرسى بصورة مضحكة ثم يفلق عينيه)

العجمى - (الذى يكون فى محاولة لاستجماع قواه يتبسم ابتسامة صفراء) أهو قعد وأنت كمان اقعد يا حبيب افندى اقعد وخلينا نتفاهم انت زعلان ليه ؟ طلباتك ايه ؟ قوللى أولاً هو المسدس الى فى ايدك ده متعمر ؟ مش خايف تطلع منه رصاصة كده ولا كده ؟ أوحش حاجة اللعب بالسلاح .

فؤاد - أنا لألعب يا ابراهيم يا عجمى المسدس ده متعمر بست رصاصات وأى حركة تبدر منك أو صوت حتتفرغ كلها فى راسك قبل الميعاد الى حددته لقتلك

أبو ستيت - (يغطى وجهه من الرعب - بصوت مكتوم) استر يارب **العجمى -** مش تقول لى أنا عملت ايه ؟ استأت اليك بايه ؟ مش بتعترف انى أنا اللئى وظفتك وأنا كنت أعاملك زى ابنى تمام ؟

فؤاد - (صارخا) اخرص ما يفولش ابنك يا كلب أنا اذا كنت حموتك فعلىشان الكلمة الى خلصتني بيها دى . أنا مش ابنك أنا أبويا كان راجل شريف ، صحيح كان أبويا مش باشا لكنه راجل شريف مستحيل أكون ابن لواحد داعر زيك . انت عارف ليه وظفتنى انت عارف الرعاية الى كنت بتحيطنى بها سببها ايه ، انت عارف جرائمك كلها الى بترتكبها ، كل يوم وكل ساعة وكل دقيقة ..

اسمع اسمع يا ابراهيم يا عجمى انت الليلة دى مش جى تتراجع أو تدافع عن نفسك ، انت خلاص اتحاكمت وخذت فرصتك واللييلة ليلة التنفيذ وانت جيت برجلك ربنا الى جابك وجاب الشاهد الى حيضر اعدامك . اسمع يا راجل انت ليه أضلرت حكمى بالاعدام على ابراهيم العجمى ، علىشان تعرف انى مظلمتوش وانى بنفذ فيه حكم ربنا (يتحرك العجمى كما لو كان يحاول النهوض - يصرخ فيه فؤاد قائلاً) اوع تتحرك يا كلب .

(يسود الظلام فجأة)

المنظر الثاني

(يسود الظلام - الموسيقى تعبر عن عودة الزمن الى الوراء - تسلط الاضواء على يمين المسرح - بينما يسود الظلام باقى الارحاء - يظهر تحت الضوء - تليفون فوق مائدة صغيرة - أريكة (اوبيسون) فتاة فى سن الواحدة والثلاثين - تواليت مبهرج - فستان قصير نموذج للطيش والاستهتار - جميلة جدا - تتكلم فى التليفون)
ميرفت - (فى التليفون) (تضحك ضحكه رنانة غير كريمة وتقول بالفرنسية) جى مان فو ياتانت ٠٠٠ قلت لك ألف مرة الكلام ده ما يهمنىش ولا يهم أختى زيزى ، احنا بنات مودرن يا شيرى ما يهمناش كلام الناس الباربار السوفاج ٠٠٠ أفندم ياتنت ٠٠٠ ماما ٠٠ ؟! طيب ابقى سلمى عليها قولى لها ميرفت وصافيناز بيسلموا عليكى ويبسوسوا ابيدىكى .
ما أقدرش ، ما أقدرش ياتانت (امبوسيبيل) بابا يزعل خالص لو عرف اننا قابلنا ماما ٠٠ طيب وماله ياتانت سايبنى على حل شعرى ، ماهو علشان كده لازم ما ازعلوش . طيب علشان خاطر حاجى أقابلها أنا لوحدى ٠٠٠ لاسيبك من صافيناز ٠٠ صافيناز ماتعرفش تقفل بقها وبعدى بابا يزعل زى ما قلت لك ٠٠٠ بس على شرط ياتانت لما أقابل ماما مافيش غير بونجور بونجور ٠٠ أبوسها تبوسنى لكن اسطوانة النصايح دى الى بقالها عشر سنين تسمعها لى بتنرفزنى خالص ٠٠ لازم ماما تفهم كده .

(يسمع من الخارج صوت ابراهيم العجمى وهو يصيح - عويس ولد يا عويس خد يا ولد الحاجات دى)
أهو بابا جه يا تانت ٠٠ ارفوار بقى ٠٠ حاضر ٠٠ حاضر .
(يدخل ابراهيم العجمى - يسلم ظربوشه وعصاه الى عويس)
- وهو كذلك (بالفرنسية) لاندى سانك اير ، ارفوار

العجى - سعيده ياروحى .. كنت بتكلمى من ياخلبوصة ؟
ميرفت - (بدلح) أوه بابا (تذهب اليه وتقبله)
العجى - وايه يابت الشياكه دى كلها - ؟
ميرفت - عجبك والنبي يا بابا فستانى الجديد (تدور حول نفسها)
العجى - جنان يابت جنان - طالعه لابوكى ، حتوكلونا ايه النهارده

(ينادى) عويس .. واد يا عويس

ميرفت - استنه شويه فيه ناس عاوزين يقابلوك
العجى - ناس ... ناس مين دلوقت .. ؟

ميرفت - البنت دى الى اسمها زينب .
العجى - زينب مين ؟

ميرفت - (بنرفزه) أوه بابا .. زينب بنت أم خديجة الداده بتاعتنا
بتاعة زمان جايه تقابلك وجايه جوزها معاها .

العجى - جوزها .. هى البت كبرت وبعوزت .

ميرفت - أبوه كبرت واحلوت وبقي يتخاف عليها منك .
العجى - يابت اختشى .

ميرفت - أما نشوف .

العجى - (مناديا) عويس ... يا عويس .
(يدخل عويس)

- خللى الضيوف الى فى الصالون يتفضلوا .
(يخرج عويس)

العجى - آمال فين أختك زيزى ؟

ميرفت - وبعدين معاك بقى .. انت يظهر عجزت خلاص .. مش
قلنا لك من امبارح ان أعضاء النادى عاملين (بكك) عند
بحيرة قارون وزيزى رايحه معاهم

(تدخل زينب فى سن العشرين ممتلئة الجسم قفيض

أنوثة واغراء ملابسها بسيطة ولكن تكشف عن مفاتها)

العجى - (حالما يرى زينب) باسم الله ماشاء الله .. باسم الله

ماشاء الله .. ازای یابنت تکبری کده وتنجوزی من غیر
ما اعرف

(تتقدم زينب لتقبل يده - فيقبلها في خدها بينما يكون
زوجها فؤاد خلفها يتعثر من الخجل)

زينب - (وقد أحمر وجهها) دا فؤاد جوزی

العجمی - أهلا وسهلا (يمد له يده مصافحا فيتقدم فؤاد ويقبلها)

هنيا لك يا عم فؤاد بالقموره دي - لكن ازای ما اعرفش انتم

اتجوزتم امتی .. كان لازم أعرف علشان أقوم بالسواجب ..

* زينب زی بنتی .. بنتی تمام

زينب - ربنا مايحرمناش منك ياسعادة الباشا

فؤاد - ربنا يخليك ياسعادة الباشا

زينب - ماهو برده العشم كده وانا الى قلت لفؤاد تعالى نقابل سعادة

الباشا علشان يوظفك وظيفه كويسه .

العجمی - من عنى الاتنين .. انت بتشتغل ايه يا فؤاد ؟

فؤاد - كاتب ياسعادة الباشا .. كاتب في محل بنزويون

العجمی - وبتاخذ كثير ؟

فؤاد - اربعة جنيه ونص ياسعادة الباشا

العجمی - لأربعة جنيه دول يعملوا ايه .. وعندك شهادات ؟

فؤاد - ساقط كفاءه

العجمی - طيب عال .. عال . تعرفوا يا اولاد انكم اولاد خلال جدا

انت عندك مانع تشتغل في طنطا ؟

فؤاد - أبدا مانع ايه .. أنا ماليش حد غير زينب وكل حته ترضي

تقعد فيها أنا أكون سعيد

العجمی - عظيم . النهاردة كنت مع مدير الغربية وهو من أعز

أصدقائي .. وطنطا دي طريقى للعزبه بتاعتي ، فأنا أخليه

يوظفك في طنطا وابقى أخلي بيتكم معطه أفوت عليكم وانا

هرايح او جاي منها علشان أطمئن عليكم



المجنى : سمينة يا دوحى . كنت بتكلمى مين يا خليوصة ؟
ميرفت : (بدلع) آوه .. يا بابا

فؤاد - ربنا يخليك يا باشا انا مش عارف أقول ايه لسعادتك
(يقترب منه مسرعا ليقبل يده)

(يدخل عويس)

عويس - الغدا ياسعادة الباشا
العجمي - طيب حاضر .. تعالوا بقى يا اولاد اتغدوا معايا

زينب - ياندامتى واحنا قد المقام
العجمي - يابنت بلاش عفرته ، قول لمراتك يافؤاد تبطل العفرته
انتم اولادى .. مقام ايه وبتاع ايه .. ياللا ياللا

حضر ياعويس طبقين على السفرة وقول لستك ميرفت
عويس - الست ميرفت اتغدت خلاص يافندم وبيحضروا لها
الاتومبيل علشان خارج
العجمي - طب عال .. عال .. روح حضر السفرة علشان البيه
والهانم .. انتم بقى تقعدوا عندنا النهارده وترتاحوا شويه
بعد الغدا

فؤاد - يا باشا العفو دا كثير خالص
العجمي - كثير ازاي لازم نعوض الي فات .. دى زينب دى بنتى
(يتوسط الاثنين ويأخذهما الى حجرة المائدة وهو يحيط كل
من زينب وفؤاد بذراعية)

موسيقى - يسود الظلام - الزمن يمر

المنظر الثالث

(تسلط الاضواء على الجانب الاخر من المسرح - مقعد
- مرآة معلقة على الحائط - باب حجرة أخـرى
- تخرج زينب من هذا الباب بجلبان منزل ورأسها
معصوفة بمنديل يبدو عليها الارتباك . تعادل في
ملابسها ومنديل رأسها - تنظر الى وجهها في المرآة
وهي تتلفت حولها - تشعر حركاتها بما حدثت في
الغرفة . يدخل العجمي وهو مرتد (روب دى شامبر)
وهو بدوره يساوى في شعر رأسه وعلى فمه ابتسامة
رضا وارتياح)

زينب - أنا خيفه .. خايفه يا باشا

العجمي - ماقلت لك يا بخت تبطل كلمة باشا دي قولي ياميمى انتى
مش بتجيبينى ؟

زينب - بعد ده كله ولسه بتسألنى .. بس انا خايفه .. خايفه من
فؤاد

العجمي - الواد المفعوص ده .. دا يكون ايه يا بخت فى الرجاله ..
على كل حال انا كلمت صاحبى المدير حينقله فى وظيفه تانيه
مرتبه ٨ جنيه

زينب - ربنا يستر

فؤاد - (من الخارج) يا زينب .. يا زينب افتحي الباب

زينب - (تفاجأ وتضطرب) حاضر .. حاضر ادينى نازله (تنظر
ناحية العجمي) والنبي يا باشا

العجمي - يا لله يا بخت بلاش محن - هي دي أول مره بيجي يلاقينى ؟
(تخرج)

(العجمي ينظر فى المرأة ويبرم شواربه ويساوى شعر
رأسه يا خيال)

(يدخل فؤاد وهو يحمل بطيخه يسلمها لزينب على
الباب ثم يهرع نحو الباب)

فؤاد - أهلا وسهلا سعادة الباشا .. أهلا وسهلا (يقبل يد الباشا
الذى يحاول سحب يده)

العجمي - استغفر الله يا ابنى يا فؤاد

فؤاد - ايه الانوار دي كلها .. انت بتدخل علينا بالسعادة يا باشا

العجمي - والله أنا زى العادة كنت رايع العزبة قلت لازم أفوت
أشوف أولادى .. هيه ؟ استلمت الوظيفة الجديدة ؟

فؤاد - ماهو ده البى خلانى أطير من الفرح وجيت أجرى علشان
أبشر زينب .. ثمانيه جنيه يا زينب .. ماهيتى بقت ثمانيه
جنيه



فؤاد : ايه الانوار دى كلها .. انت بتدخل علينا بالسعادة يا باشا .
العجمى : استغفر الله يا ابنى

زينب - ربنا يخلي سعادة الباشا - والله ما احنا عارفين نودى جماليه
فين

العجمى - يابت اختشى قلت لكم الف مرة ما احبش اسمع الكلام
ده

فؤاد - زينب .. فيه عندنا اكل كويس لسعادة الباشا ؟

زينب - أنا كنت أصل سعادة الباشا لسه واصل دلوقت
.. أهو عندنا البامية بتاعة امبارح

فؤاد - باميه .. باميه ايه .. أنا لازم أروح أجيب الكباب
(يسرع نحو الباب)

العجمى - طب اسمع ما تنساش تجيب معاك قزازة البيره
فؤاد - قزازتين .. (يخرج)

العجمى - (ضاحكا) مش بقولك الواد جوزك دا خرنج قوى

زينب - مش عارفه والنبي ياباشا هو طيب .. طيب قوى وعلى
نياته بس

العجمى - مفيش بس يا واد انت (يزغزغها) (تضحك ضحكة
عريضة) موسيقى - ظلام - سير الزمن سفلى

المنظر الرابع

(الجانب الآخر من المسرح - بمجرد تسليط الأضواء
عليه ترى أريكة حديثة (شيزلونج) - زينب مستلقية
عليها - ترتدى روب دى شامبر - لم يعد منظرها
بلديا - شعرها مقصوص - يبدو عليها الضيق والملل
والعصبية - فؤاد يروح ويجىء أمامها فى حركة عصبية
دون أن يتكلم)

زينب - (منتهرة اياه) وبعدين بقى معاك .. دوختنى موتنى واثبت
رايح وجى كده .. لسه فيه حاجه ماعملتهاش .. جبتنا

على ملا وشنا لكفر الزيات بعد ما كانت احوالنا اتحسننت في
طنطا - حابسنى ما أخرجش من البيت بقالى عشرة أيام -
مخرج على أفتح شباك ولا باب .. عاوز ايه أكثر من كده ..
عاوز تموتنى .. أموت لك نفسى علشان ترتاح والا أسيب
لك البيت

فؤاد - (صارخا) انا قلت الكلمة دى مش عاوز اسمعها .. مش
عاوز كلمة أسيب البيت تخرج من بلك .. أنا أموتك .. انتى
سامعة أموتك وبعدين أموت نفسى .. لانى ما أقدرش أعيش
من غيرك

زينب - طيب ماتسكت بقى وتصل على النبى وتخزى الشيطان ..
ايه بس الى حصل ويخليك تعمل العملة دى وتطلب من
المدير ينقلك كفر الزيات ؟

فؤاد - انت عارفه يازينب .. انتى عارفه عملت كده ليه ..
ما بقتش قادر .. ما بقتش قادر

زينب - (تضحك) والننى أنا ما عارفه حاجة والا انا فاهمه حاجة ..
يا فؤاد ماتبقاش مجنون .. تغير من راجل زى ابويا وبيعاملنا
زى أولاده .. قلت لك ألف مره ماما كانت الداده بتاعة
أولاده - متربيه عندهم فى البيت - كنت دايمًا أقول له
يا عمى .. وهو يعاملنى زى بنته .. وبيعاملك زى ابنه ..
قيها ايه دى

فؤاد - (صارخا) مش عاوز اسمع الكلمة دى .. ابنه وبنته ..
انتى مش بنته .. انتى مش بنته .. انتى مش بنته وأنا مش
ابنه .. الراجل ده سمعته وحشه .. مفيش حد ما بيتكلمش
عليه

هما الناس يخلوا حد متهنى - هم بيعسدونا على عطف الباشا
زينب - (تقف) يا فؤاد يا حبيبى انت مش عارف كلام الناس ..

يقوموا يقولوا الكلام الفارغ ده (تقترب منه بدلال) .. بقي
يا عبيط عقلك يقول لك ان الراجل العجوز الكهنه ده الى اكبر
من أبويا يكون له تأثير على .. هو قلبي فيه حد الا فؤاد
بس .. انتة ناسى لما كنت أبص عليك فى الراحه والجايه
من الشباك .. اخص عليك يافؤاد .. بقي هو أنا بقابل
الباشا كويس ولا باضحك فى وشه ألا علشان خاطرك ..
علشان يفضل يرقيك ويعطف عليك

فؤاد - (يعانقها بشدة) أنا باحبك يا زينب .. باحبك .. ماليش
غيرك فى الدنيا .. مقدرش اتصور انك تخونيني .. أنا
مصدقك .. مصدقك .. ينعل أبو الناس وكلام الناس .. على
كل حال الحمد لله ادحنا دلوقت بعدنا عنه .. جينا كفر
الزيات ما هياش فى طريق العزبة وبطلنا حجته

(يدق الباب - يتوقفان فى فزع)

العجمي - افتح يا خلبوص يا هراب .. يا قليل الاصل .. كده
تدوخني لغاية ما أعرف بيتك

زينب - عمى الباشا

العجمي - انتم خليتم باشا ولا لكم عم

فؤاد - (ينظر اليها بشدة ولا يتكلم)

زينب - (هامسة) امسك نفسك يافؤاد يا حبيبي ما فيش حاجة ..
روح افتح الباب

العجمي - انتم مش عاوزين تفتحوا لى ولا ايه ؟

فؤاد - ازاي ياسعادة الباشا .. أنا جاي أهه .. حافظ لك يا باشا

(ظلام .. موسيقى .. سير الزمن)

المنظر الخامس

(الجانب الآخر من المسرح بمجرد تسليط الاضواء ..)

تري زينب - فى ملابس شيك تعمل فى ترتيب زهرية
ورد - تنادى)

زينب - نعيمه .. يابنت يانعيمه (تدخل خادمة) خلصتى صنية
البطاطس ؟

نعيمه - يوه .. هو انا ياستنى لحقت لسه ؟

زينب - طيب يالله قوام

(يسمع مفتاح فى باب الشقة - تدبر ظهرها للباب
وتتشاغل فى اعداد الزهرية - يدخل العجمى - يتلفت
حوله - يتقدم نحوها ويغمى عينيه)

زينب - حاسب يا ميمى .. البيت الخدومه

العجمى - خلاص خدت على الشقة والخدمة الجديدة وعيشة مصر ؟

زينب - كل حاجه خلوه .. دانا حاطير من الفرح .. لكن خايفه من
فؤاد .. فؤاد بقى متأكد من علاقتنا ببعضنا .. ومن ساعة
مانقلته مصر بالطريقه دى راح متغير خالص

العجمى - متغير ازاي يعني ؟

زينب - كان فى الاول يضربنى .. يشتمنى .. يشتم فى لما تيجى
سيرتك لكن من ساعة ماجيتنا هنا وهو ساكت مابيكلمش

العجمى - طب عال وهو المطلوب .. طبعا هو عمره كان يحلم بالعز
ده ؟

زينب - انت ماتعرفش فؤاد .. فؤاد اتغير خالص .. دا مش
طبيعى بيقعد طول الليل ماينامش .. مابياكلش .. واكثر من
كده مابيكلمش .. أنا خايفه خالص .

العجمى - يا مغفلة وليه ما تقولىش انه خلاص اتعود على مركزه الجديد
.. على كل حال وظيفته الجديدة دى فيه الوف من الشبان
المتعلمين يموتوا عليها ولا يلاقوهاش .. (مغازلا زينب) وده

كله علشان خاطر عيونك ياواد يا زنوب انت .. انت يا بت
سحرالى ولا عملاى عمل .. عمر مافيه واحده كلت قلبى
بطريقتك دى

زينب - (بدلال) أيوه ياخويا اضحك على .. دا انت أظن ماخلتش
واحده ماجريتش وراها .

العجمى - هو أنا بانكر .. لكن عمرى ما اتعلقت بواحدة زى عملتى
معاكى .. دنا بصرف عليكى زى ماتكونى مراتى . ومستحمل
الواد الحرنج جوزك ده .. وهو ما يحصلش واحد من الخدامين
بتوعى .. انتى لازم سحرالى

زينب - ما اعرفش قلبى مش مطمئن من ناحية فؤاد لازم تشوف
لك معاه شوفه .. كان دايمًا يقول اموتك وبعدين اموت
نفسى

العجمى - وانتى برضه بتاكل من الكلام ده .. طيب ومستنى ايه
ييقبل الوظائف الى بجيبها له .. الاصناف دى مرت على
كثير .. والكلام ده سمعت منه كثير .. سيبك ساعة الحظ
ماتتعرضش

(يعانقها من الخلف ويقبلها فى عنقها وهى تضحك
وتتثنى - تدخل نعيمه الخادمه)

نعيمه - ستى .. ستى (ترى المنظر فتبتسم) يوه لا مؤاخذه
ماكنتش اعرف ان سيدى الباشا شرف

زينب - (وهى تعدل فى هيئتها) فيه حاجه يانعيمه ؟

نعيمه - (بسخرية لاذعة) هىء معلش بقى .. مش وقته

(ظلام .. موسيقى زمنية)

المنظر السادس

(الجانب الآخر من المسرح - بمجرد تسليط الاضواء
ترى زينب وهى موثوقة بالحيال الى عمود السرير الذى

يظهر نصفه فقط - وهي في حالة شديدة من الرعب
وأمامها فؤاد في حالة جنون ممسكا بيده سوطا ينهال
به عليها)

زينب - في عرضك يافؤاد .. في عرضك يا حبيبي .. أنا تبت
خلاص .. أهون عليك تعمل في كده

فؤاد - مافيش فايده .. مش حبيبك المره دى الا لما أبرد نارى ..
لازم أسمع من بقك كل حاجه .. لازم تعترفى بكل حاجه من
أول يوم

زينب - حرام عليك .. حافظل طول عمرى أقول لك دا راجل زى
أبويا

فؤاد - (ينهال عليها فى حلق شديد) طب خدى بقى .. مادام
لسه بتقولى الكلمه دى

زينب - (تصرخ)

فؤاد - (هائج) بتصرخى .. طيب علشان يكون عمرك فرغ ..
(يهرع الى الباب ويعود ومعه سكين) اصرخى .. اصرخى
تاني

زينب - لا! فى عرضك ادينى سكت اهوه

فؤاد - ما هو مفيش فايده المره دى لازم تعترفى بكل حاجه .. من
يوم المجرم ده مانقلنى مصر وجاب لك الشقه دى يامجرمه وأنا
كنت مقرر مستقبلنا .. حياتى معاكى انتهت خلاص .. أنا
عارف حاسل ايه لكن لازم أسمع من بقك كل حاجه .. كل
علاقتك بالكلب ده .. يوم بيوم .. وساعه بساعه .. اخص
عليكى .. اخص عليكى يا زينب (يبكى) تعملنى فيه كده
أنا حبيبك .. أنا الى بموت فيكى !

زينب - والنبي يا حبيبي أنا ماعملتش حاجه وحشه أبدا



زينب : في عرضك يا فؤاد ، في عرضك يا حبيبي ، أنا تبت خلاص ! اهون
عليك تعمل في كده ؟

فؤاد - (بغضب جنوني) طبع خدي ما دام لسه مش عاوزه تعترف
(ينهال عليها بالضرب)

زينب - في عرضك طب خلاص 'حقولك' مادام انتسه عاوز كده ..
حاعترف لك بكل شي .. وحاعترف اني سلمته نفسي علشان
حبي لك

فؤاد - اتكلمي
زينب - خلاص حا كلم بس حل الرباط بقى علشان اكلم واسقيني
شوية ميه

فؤاد - أوعى تتصورى انك تضحكى على ..؟ أموتك
زينب - أنا سلمته نفسي من خوفى عليك

فؤاد - اكلمي ازاي .. اكلمي

زينب - كان بيهددني وبيقول لي ان ما كنتيش تبقي عشيقتي مش
بس حاقطع عيش جوزك .. حاسجته .. حالفق له تهمة .
حموته

فؤاد - (هائج) قمتي بقيتي عشيقته واستغليتني حبي لك وطيبتي
وبلاهتي يامجرمه .. يا مجرمه .. (ينهال عليها ضربا
بالسوط)

زينب - (تتأوه في صمت) مش انت الي بتقول اكلمي

فؤاد - أيوه صحيح .. عاوزك تتكلمي .. عاوزك تقولي كل حاجه
علشان قلبي يموت واعمل الي حاعمله .. عاوزك تحكي لي كل
حاجه .. كان بيعمل معاكى ايه في طنطا وفي كفر الزيات ،
وهنا في « الجرسونيرة » الي أجرتها لي وأجرها لك .

زينب - حرام عليك عاوزني أقول ايه .. ماقتلك وخلاص

فؤاد - لا أنا عاوز بالتفصيل علشان حا اكتب اعترافك وتمضي
عليه

زينب - وليه تعذب نفسك بس ؟

فؤاد - (ضاحكاً بوحشية) أعذب نفسي .. هو انا لسه حا اتعذب
أنا اتعذبت وخلص .. دنا حابتدى ارتاح

(يقترب منها ويفك وثاقها)

كل ما تتكلمى تريحينى - (لا يكاد يفك وثاقها حتى تقع على
الارض من الأعياء - فيركلها بقدمه) اتكلمى

زينب - (تنشج بالبكاء) حا أكلم ...

(ظلام .. موسيقى)

المنظر السابع

(لا يكاد ينتهى المشهد السابق ويسود الظلام وتعزف
الموسيقى التى تدل على عودة الزمن الى أصله الذى
بدأت منه الرواية وهو الزمن الحاضر حتى ينبثق
النور فى القسم الرئيسى من المسرح ويعود الوضع
الى ماكان عليه ، أبو ستيت جالس فى الركن كما كان
وهو ينتفض من الرعب ، فؤاد يقف فى وسط الغرفة
مشهراً المسدس فى قوة وعنف .. وإبراهيم العجمى فى
فزع وتوسل ورجاء)

المشهد الاول

العجمى - أبو ستيت - فؤاد

العجمى - (متكلماً فى لهفة وجزع) دى كذابه ، ستين كذابه ،
تعذيبك لها هو الى خلاها تقول الكلام الفارغ ده .. حبت
تخلص نفسها قامت كذبت عليك انا وظفتك لاني فاعلى خير
مش انت بس الى وظفتك انا وظفت ناس كتير .. انا فاتح
بيوت ناس كتير .. مراتك كذابه والله العظيم كذابه

فؤاد - العظيم الى بتحلف بيه هو الى جيخلينى تأخذ أجلك حالا .
هو أنا كنت فى حاجه لاعترافها ، هو أنا ماكنتش شايف
كل حاجه بعينى ، لما كنت أرجع البيت ألاقيك فى أودة نومي
يا مجرم وأنا الساذج الابله مصدق أنك زى أبويا ، أنا كاتب
على المكتب ده عشرين ورقة ، انت سامع عشرين ورقة ؟ فيها
تاريخ علاقتك الاثيمه معايا ومع مراتى يوم بيوم وساعه
بساعه

العجمى - (مصفر الوجه على وشك الانهيار) أنا فى عرضك
يا فؤاد

فؤاد - أنت خليت لى عرض يا قدر يادنى ، اعترف اعترف يا كلب
بجرائمك قبل ما تموت ، يمكن ربنا يخفف عذابك شويه
العجمى - اسمع يا فؤاد ، خليك عاقل ، كل الى بتقوله ده ظنون
وأوهام ، لو قتلتنى ربنا حينتقم منك ومش ممكن حتقدر
تهرب .. حتروح فى داهيه واذا قتلتنى لازم حتقتل الراجل
الطيب ده الى مالوش ذنب

فؤاد - (ضاحكا بوحشية وتشفى) اتكلم كمان .. قول .. هدد
هوش ، ماتقدرش تعرف قد ايه سعادتى وانت حتموت
ومش عارف تنجى نفسك ازاي

العجمى - (بلهفة وجزع) أنا غنى يا فؤاد ، أنا غنى ، أدفع لك
زى ما انت عاوز الف جنيه .. الفين جنيه .. أنا مستعد
أجوزك واحده تانيه أحسن من زينب .. أجمل من زينب

فؤاد - (ضاحكا بوحشية) انت شبعت من زينب خلاص ، خلاص
قرفت منها عاوزنى أورد لك عشيقه جديده ، بنت بكر

العجمى - (وهو يلهث) والله مش قصصدى حرام عليك ، انت
ظالمنى اجوزك واحده من بناتى .. أنا تبت ، تبت خلاص
يا فؤاد على ايديك

(أثناء الكلام السابق يهم العجمي واقفا ويقترب من
فؤاد الذي يتراجع قليلا)

فؤاد - (صارخا في عنف) ارجع مكانك ، اقعد ، (يعود العجمي
فيجلس)

لو تحركت مرة ثانية حضرك بالرصاص على طول ، قبل
اللحظة الى أنا محددها لاعدامك ، تعرف يا ابراهيم يا عجمي
أنا ماقتلتكش لغاية دلوقت ليه ؟ لاني باتمتع ، باتمتع وانا
شايفك قدامي جيان ذليل زى الفار فى المصيد ، وعزرائيل
واقف قدامك . أموالك كلها ، أطيانك ، جاهك ، نفوذك ،
كل ده مش نافعك دلوقت أو يقدر يخلصك من ايدى .
وحتموت من ايد فؤاد . فؤاد الغلبان الجربوع الخرنج ، زى
ماكنت بتقول على ياباشا ، ثلاث سنين وانا جربوع وانا
جردل . ثلاث سنين وانا فى الخزى والعار ، وانا بتعذب .
ولكن السعاده الى أنا حاسس بيها دلوقت تخلينى مستعد
بعد ما أموتك ان ربنا يحييك تانى ويعذبني ثلاث سنين
تانيه علشان اتمتع بالساعه الى أنا فيها (يضحك فى جنون)
أنا لم أعد فؤاد حبيب الساذج الابله ، الضعيف الى يخاف
من خياله ، الى مايقدرش يدبج فرخه ، الى عمره ما شاف
مسدس ، دانا دلوقت بقيت عزرائيل ، الى جيموت الباشا
الى قد الدنيا ، شفت ياباشا عملت فى ايه ، شفت الانقلاب
العظيم الى عملته فى حياتي ، شفت ازاى رتبت كل حاجه
وخليتك تيجي برجليك ؟ تعرف حموتك امتى ؟ والقطر فايت
علشان ماحدش يسمع حس الرصاص (يضحك بوحشيه)
أنا رتبت كل حاجه . عاوزك تموت زى الكلب . ما حدش
يحس بيك .

(تنطلق صفارة قطار على البعد - فتحدث حركة دعر من
الجميع - فؤاد أول من يسيطر على نفسه ، ويندو عليه

انه يعرف ماذا يفعل - صوت القطار يقترب - ينهض العجمي في فزع ويحاول أن ينقض على فؤاد الذي يتراجع بسرعة الى الوراء ، ويعالج العجمي برصاصة ، العجمي يترنج ولكنه لا يلبث أن يستأنف تقدمه وراء فؤاد الذي يضربه ثانية بالرصاص - في أثناء ضرب الرصاص يكون القطار قد اقترب جدا وأصبح صوته يدوى - بعد أن يخف صوت القطار قليلا يزداد ترنج العجمي ويحاول في جراءة أن يرتمي على فؤاد الذي يتراجع الى الوراء بسرعة ويضرب من جديد العجمي الذي يكون في هذه الاثناء قد سقط على الارض في منتصف الصالة . الطربوش يكون قد طار في الهواء . العجمي وهو على الارض يئن ، ينتفض انتفاضة أخيرة ثم يسكن نهائيا - صوت القطار يكون قد ابتعد نهائيا . لحظة سكون ، صوت الرياح ، عواء . فؤاد ينحن على العجمي ويقلبه فاحصا ، يهم واقفا ثم يركل العجمي بقدمه (

فؤاد - (بصوت كالفحيح) خلاص ، خلاص ، مات ، مات الكلب (يتنفس نفسا عميقا كأنما انزاح من عليه . . كابوس يدخل الى حجرة المكتب ويضع المسدس على المكتب . يأخذ علبة السجائر ، وهنا تبدر حركة من ابوستيت الذي كاد يموت من الرعب خلال الموقف السابق وقد بدأت أسنانه تصطك فيتنبه له فؤاد)

فؤاد - آه ، انت هنا ؟ دنا كنت نسييتك خالص
ابو ستيت - (يرتجف من الرعب ، أسنانه تصطك ، يتهته) أنا في فـ . . فـ . . في . . عرضك
فؤاد - ما تخافش مني أنا مش حاذيك (يمد له يده بعلبة السجائر)
خد سيجارة تهدي أعصابك

أبو ستيت - (لا يزال يرتجف) مابشر .. مابشربوش

فؤاد - أما أنا لازم اشرب سيجارة (يتكلم فؤاد بلطف ورقة وقد ذهب عنه الجنون) تسمح لي أولع سيجاره ؟ (يشعل سيجارة ويجذب منها نفسا بكل قوة وشراهة - ينتهز مستريحا) الحمد لله ، كل شيء تم زى ما كنت مرتبه ، الشيء الوحيد الى ما كنتش اتوقعه أنك تيجي معاه ، فى أول الامر خفت وقلت يكون ربنا مش عاوزنى أموته فبعت معاه واحد ينجيه منى .. ولكن لما بعدين شفتك وسمعت كلامك معاه عرفت ربنا جابك معاه ليه ، ربنا جابك فى اللحظة دى علشان تكون شاهد تروى للناس والتاريخ ، كيف انتهت حياة ابراهيم العجمى المستهتره ، اياك يكون فيها عبرة للمستهترين الى بيسطوا على أعراض الناس .

أبو ستيت - (وقد تماسك نفسه عقب هذه الاقوال المشجعة) وانا كان مالى ومال الغلب .. والله يا بنى ولا لكش على يمين انا كنت مروح لبيتى اتعشى ملوخييه بأنا رب ، يقوم لجل حظي المهيب أقابل ابراهيم الزفت ده الى بقالى وحياتك يا بنى يمكن أكثر من خمس سنين ما شفتوش مرتين أو ثلاثه ، من بعيد لبعيد سلام عليكم عليكم السلام ما انا كنت عارفه وسامع على سمعته المهيبه .. انا عارف ايه الى كان جرى لعقلى الليله دى علشان ارضى آجى معاه ؟ علشان قضاييا .. علشان بختى المهيب .. طول عمرى وانا منحوس .

فؤاد - بنمتك يا .. يا

أبو ستيت - (متلهفا للارضاء) على يا أخويا ، على أبو ستيت

فؤاد - بنمتك يا على أفندى ، بعد ما سمعت على الى عمله فى العجمى انت توافقنى على الى عملته والا لاء ؟

أبو ستيت - موافك ؟ ياسلام ، ستين موافق يا ابنى ، هو فيه حد يعيبك فى الى عملته ده .. دكا مش موافق بس ، دنا

موافق جدا • ربنا يا ابني يحميك لشبابك كنت زى الاسد
(مسكون - بعد لحظة) قل لي يا سي فؤاد مش تسيبني بقي
ارجع لاولادى ؟

فؤاد - انت خايف منى والا ايه ؟

أبوستيت - (فى منتهى الذعر خوفا من أن يكون قد أغضبه) خايف
منك ؟ أعوذ بالله •• ودي كلمه برده تقولها يا فؤاد يا ابني ؟
أخاف منك ليه •• وانت عملت حاجه لاسمح الله •• أنا بس
أعصابى مهزوزه شويه ، ماتا خذنيش يا ابني عمري ما شفت
حاجه زى دى قدامي ، الا خايف منك ؟ أنا خايف منك ؟ لا
وشرفك ، بس أعصابى مهزوزه شويه •

فؤاد - (مبتسما ابتسامه صفراء) انت اتخضيت يا مسكين ، أما
أجيب لك شويه ميه علشان تشرب

أبو ستيت - (مدعورا) مفيش لزوم يا ابني •• أنا كويس أهوء
أنا مش مخضوض ولا حاجه •• أنا بس أعصابى مهزوزه
شويه

فؤاد - لا لازم أجيب لك تشرب وعلشان أشرب أنا كمان •• ريقى
ناشف

(يهم بالخروج ولكنه لا يلبث ان يتوقف ثم يقول لا بو
ستيت بصراة)

لكن اسمع ، اوع تقوم من مطرحك أو تعمل أى صوت

أبو ستيت - أقوم ، هو أنا يا ابني فيه حيل اتحرك ؟

فؤاد - أيوه افتح عينك •• أنا طبعاً مش عاوز أأذك لك فى نفس
الوقت أنا راسم خطه ومش عاوز دوشه ولا وجع دماغ ، سامع ؟

أبو ستيت - هو أنا يا ابني لسه ماشفتش انك ماتعرفش هزار
دوشة ايه ؟ ربنا مايجبب دوشه حد الله ما بيننا وبين الدوشة
(يتشبث بالكرسى بقوة) بص شوف اتلزقت فى الكرسى

أهوه ، وبص كمان اهو (يعلق فمه بشدة)

فؤاد - (يبتسم ابتسامة صفراء) أنت ربنا بعثك لي ، علشان
تسلينى فى اللحظات الصعبة دى (يخرج)

أبو ستيت - (ينظر الى السماء فى توسل) يارب ، يارب ، يامنجى
الله لا اله الا هو الحى القيوم ، لاتأخذه سنة ولا نوم
(يعود فؤاد حاملا زجاجة ماء وكوبة فيسمع صوت أبو
ستيت)

فؤاد - فيه حاجه ؟ بتقول حاجه ؟

أبو ستيت - (يكمل القراءة بسرعة وبصوت خافت جدا بحيث لاترى
الا شفطيه اللتين تتحركان)

فؤاد - انت بتقرا آية الكرسي ؟ انت لسه خايف منى ؟ (يفرغ
له الماء فى الكوبة) خد اشرب

أبو ستيت - (يتردد فى أخذ الكوبة) أنا يا ابني مش عطشان ..
مافيش لزوم

فؤاد - مفيش شك انت لازم خايف منى ، انت بتتصورنى مجرم ؟
أبو ستيت - (فى لهفة) مجرم ؟ معاذ الله ، ماعاش الى يقول عليك
مجرم

فؤاد - آمال مش راضى تشرب ليه ؟

أبو ستيت - أعصابى مهزوزه شوية

فؤاد - ماهو علشان كده لازم تشرب

أبو ستيت - (كما لو كان يقدم على الانتحار) هات هات يا ابني
(يتناول الكوب بيد مرتعشة) أشهد ألا اله الا الله وان
محمدا عبده ورسوله (يتجرع الكوبة مرة واحدة) خلاص
شربتها .. شربتها علشان ما تقولليش انى بفتكرك مجرم ..
شربتها كلها

فؤاد - أيوه كده دلوقت حتجس براحة

- أبو ستيت - (مدعورا) راحة على طول ؟ ابدية يعني ؟
- فؤاد - (يبتسم ابتسامة صفراء) للدرجة دى مش قادر تفهمنى ،
انت بتزيد اقتناعى باللى نويت عمله
- أبو ستيت - (مدعورا) انت نويت تعمل آيه ؟
- فؤاد - (يجلس ويشعل سيجارة) اسمع يا على افندى انا طالب
منك خدمة عملها لى
- أبو ستيت - (متوجسا خيفة) خدمة منى أنا يا ابنى .. دانا من
العواجز يا ابنى
- فؤاد - لكن الخدمة دى لازم تعملها علشان تنجى بيها نفسك وبدل
ما تقع فى سين وجيم .. انت ناسى انك دلوقت ممكن تنهم
فى قتل العجمى ؟
- أبو ستيت - (يقفز من الدعر) يا نهار اسود .. طيب ودا يخلصك
يلفؤاد يا ابنى
- فؤاد - ماتخافش ، ماتخافش .. أنا عامل ترتيبى وعلشان كده
لازم تعمل اللى حقولك عليه . انت حتتولى ابلاغ البوليس
- أبو ستيت - بوليس ؟ ياليله سوده .. وانا مالى يا ابنى ومال
شبكة البوليس ، مانت لسه قايللى ان البوليس .. هى دى
خطتك يا ابنى تموت العجمى وتودينى أنا فى داهية ؟
- فؤاد - (بأسى) للدرجة دى أنا حقير فى نظرك ؟
- أبو ستيت - يا ابنى استغفر الله ، والنبي ما تاخذنيش . أنا عارف
أنا بخرف بقول ايه ، أنا يا ابنى اعصابى مهزوزه شويه
- فؤاد - ماتخافش يا على افندى ، أنا عامل ترتيبى ان ما حدش يتأذى
بسبب اللى عملته ، أنا كاتب هنا على المكتب عشرين ورقة زى
ما سمعنى بقول للعجمى ، وفى العشرين ورقة دول اعتراف
مفصل عن كل حاجة بالمستندات .. لانى حاموت نفسى ..
أنا حانتحر ..

أبو ستيت - (في فزع) تموت نفسك ؟

فؤاد - دلوقت حالا

أبو ستيت - (صارخا) يا ابني أنا في عرضك ، أنا اعصابي
ماقدرش تتحمل أكثر من كده ٠٠ يارب أنا عملت ايه علشان
أقع في المصيبة دي ؟

فؤاد - ماتخافش يا علي أفندي ، أنا مش حانتحر أمامك ٠٠ بعد
ماتنزل وتروح تبلغ البوليس ٠٠ أنا حياتي خلاص انتهت
انا حققت الرسالة الى ربنا خلقتني من أجلها في هذه الدنيا
كان لازم الى خلق ابراهيم العجسى المستهتر يخلق فؤاد
حبيب علشان يضع حد لاستهتاره

أبو ستيت - انت مجنون تموت نفسك علشان واحد كلب زى ده .
انت انتقمت لشرفك وطهرت الارض من شخص داعر ٠٠ كل
واحد حيسمع حكايتك ، حيعطف عليك

فؤاد - يمكن بعض الناس لما يعرفوا الحقيقة يعطفوا علي ، لكن انا
دلوقت في نظر القانون مجرم انا عارف انا عملت ايه ، شوف
انت نفسك مع أنك سمعت الحكاية كنت بتبص لي ازاى
وخايف مني ازاى ؟

أبو ستيت - يا بني سيبك مني أنا راجل غلبان عمري ما شفت حد
بيدبح قدامي قام أعصابي اتهزت شويه ، سيبك مني أنا ٠٠
خليك في نفسك يا ابني دا انت لسه شباب حرام عليك ٠٠
انت مالکش ام ؟

فؤاد - (متنهدا) عندك حق لو كان لي أم ماكنتش انتحرت ٠٠ لاني
أعرف ان لي حد ييكى علي ، لكن من حسن الحظ أمي ماتت وأنا
مقطوع من شجرة ، أنا ملياش حاجة اعملها في الدنيا بعد
كده ، أنا فكرت في كل حاجة

أبو ستيت - لكن انت مش عارف ان الانتحار حرام ؟ جريمة
تغضب ربنا

فؤاد - أيوه عارف ان الانتحار جريمة .. كل الناس بتقول كده
ويظهر لازم تفضل تقول كده ، لكن أنا فكرت كتير في المسألة
دى ، وما قدرتش أفهم ليه يكون الانتحار جريمة ، الحياة
والموت شىء بايد ربنا .. هو الى عين لكل واحد منا ساعة
الاجل والطريقه الى ينتهى فيها الاجل .

ابو ستيت - يبقى مش من حقت أبدا أنك تنهى الاجل ده بايدك
انت .. سيب الروح لخالقها

فؤاد - انت يا على افندى بتتصور انى عملت شىء بارادتى ، أو لى
اراده دلوقت ؟ أنا خاضع دلوقت لارادة اعلى منى الى رتبت
كل شىء ، الى ملائتنى عزم وتصميم ، أنا الى عمرى مادبحت
فرخه ولا مسكت مسدس ، خلتنى أموت ابراهيم العجمى ، الى
عمت عنين ابراهيم العجمى وقادته لحد هنا فى الساعة الى
حددتها بالضبط لاعدامه ، الى جابتك من عرض الطريق
لتشهد هذه المأساة وتروىها بعدين للناس ، الارادة العليا
دى هى الى دلوقت بتهون على الموت وتدفعنى وتجعلنى شاعر
ان ضربة المسدس الى حاضربها لروحي كانى بطفى نور الكهربا
علشان أروح أنا

ابو ستيت - (متهيبا) ماتا خذنيش يا ابني ، أقدر اتكلم ولا تزعلش
منى ؟

فؤاد - قول .. اتكلم

ابو ستيت - الكلام الى بتقوله ده كلام فارغ ، فلسفة هدامة ، احنا
ربنا ادانا عقل وخلقنا أحرار وحذونا من ارتكاب الشر ، ربنا
قاللنا يا فؤاد يا ابني « ولا تقتلوا النفس التى حرم الله الا
بالحق » النفس دى مش بتاعتنا ، مش ملكك ، دى امر ربنا
دى سر من ربنا

فؤاد - وربنا قال « النفس بالنفس » أنا قتلت ولازم اتقتل .. أنا

بنفذ القصاص في روجي قبل ماينفذوه في الناس .. يا على
أفندي أنا فكرت في كل شيء

أبو ستيت - والله يا ابني أنا مش عارف أقولك ايه ؟

فؤاد - ماتقولش حاجه ، بس أوعدني انك حتقول للبوليس كل
حاجه

أبو ستيت - (بعزم - يقف) وهو كذلك .. اتفقنا .. أنا رايع
البوليس (يندفع نحو الخارج) .. سلام عليكم

فؤاد - رايع على فين .. مفتاح الباب في جيبى

أبو ستيت - (يتوقف) لامؤاخذه .. لامؤاخذه يا ابني

فؤاد - انت خلاص مستعجل على موتى .. اديني فرصه اتمتع بيك
شويه

أبو ستيت - (يعود ويجلس في خجل) والله يا ابني أنا مش
قصدي .. أنا مستعد أقعد معاك على طول للصبح ، اذا كان
ده يريحك ويمنعك من الانتحار

فؤاد - سيجازه واحده ، اسمح لى بسيجازه ، عاوز اشرب سيجاره
تانيه

أبو ستيت - والله يا ابني انت صعبان على جدا ، انت بقيت زى
ابني تمام .. اسمع يا فؤاد ، ماتعملش حاجه في روحك وأنا
أعدك اني أقف جنبك أجيب لك أعظم محامي يطلعك براءه

فؤاد - مفيش محامي يقدر يطلعني براءه ، أنا عارف كل حاجه ، أنا
بقالى سنه ادرس كل حاجه .. تعرف اللى عملته ده اسمه ايه
في القانون ؟ أنا سألت واحد محامي قاللى اسمه سبق اصرار
وترصد ، سبق اصرار استمر سنه بخالها ، أنا عارف عقوبتى
في القانون ، الشنق ، ماشفتش في الجرايد صور الى
بيشنقوهم ، يكتفوهم زى الخروف ويدبحوهم ، والناس

تتفرج يروحوا بدعوات علشان يتفرجوا ، والى يشنقنى
محترف ياخذ اجره على شنقنى

تعرف ابراهيم العجمى ده خينبقى ايه فى المحكمة ؟ ده خيكون
الباشا الكبير صاحب الاقطاعيات الى عمر بيوت مئآت الناس
باحسانه ، انت مش سمعته بودنك بيقول انه عمر بيوت ناس
كثير ؟ اهو من النعمة دى حيجلجل صوت النيا به ، حترثى
الباشا الورع التقى الى لسه راجع من الحجاز طاهر مطهر
وتعرف أنا حيقولوا على ايه ؟ الكلب العقور الى عض اليد
التي امتدت اليه بالاحسان ، ومراتى زينب المجرمه ، تعرف
حيقولوا عليها ايه ؟ مثال الطهر والعفاف وأن الغيرة عمت
قلبي ، ونفرض ان المحامى كان شاطر وقدر يقطع المحكمة
بظروفي ونظرت لى المحكمة بعين الرأفة .. تعرف يحكموا على
بايه ؟ بعشرين سنة أشغال شاقة ، عشرين سنة فى الجبل
أكسر الحجارة والزلط .. تظن ان قتل ابراهيم العجمى يستاهل
التمن ده .. عشرين سنة فى تكسير الحجر ، وعلشان ايه
ولزومه ايه ؟ أنا حياتى انتهت خلاص .. أدبت رسالتى ..
أنا موت عدوى .. موت ابراهيم العجمى

أبو ستيت - يا ابنى أنا مش عارف اقولك ايه .. انت صعبان على
قوى انت خساره فى الموت

فؤاد - اشكرك يا على أفندى ، كلمتك دى اكبر عزاء لى علشان انت
راجل طيب . لكن انت ماقلتش لى ايه الى حا اعمله فى مراتى
زينب .. زينب المجرمه وهى لسه حيه ولا ميتة ؟

أبو ستيت - عمرك أطول من عمرى .. انت خلصت على مراتك هى
رخره ؟

فؤاد - بالعكس انا قررت ان انتقامى منها يكون انتقام بطيء ..
الموت راحه يا على أفندى .. أنا حاسبها تعيش علشان يفضل

شبحى وشبح ابراهيم العجمى يطاردوها طول العمر ، حاسبها
تعيش وفى رقبته دم اثنين كانت السبب فى موتهم ، حاسبها
تعيش ملعونه فى الدنيا والآخرة

أبو ستيت - يا ابنى انت بتضحك على دلوقت ولا بتضحك على
نفسك ؟ هى مراتك دى عندها احساس ؟ حتى تفهم الكلام
ده ؟ انت تقول انك لسه بتحبها . .

فؤاد - (ينكس رأسه) أيوه لسه بحبها وعلشان كده لازم أموت
نفسى .

(صمت - صوت القطار بعد انتهاء جلبة القطار ينهض
فؤاد وينهض معه أبو ستيت)

فؤاد - (بعزم وتصميم) حان الوقت لازم تنزل ، أنا تعبنا عاوز
ارتاح عاوز انام .

أبو ستيت - (يعاوده الفرح) صحيح عاوزنى أنزل بقى ؟

فؤاد - أيوه لازم تنزل .

فؤاد - (الذى كان يوصل أبو ستيت) مع السلامة . (يفتح الباب)
ويخرج أبو ستيت - فؤاد ينادى بتأثر) على أفندى . . .

أبو ستيت - (يتوقف - ينظر اليه - يغلبه التأثر - يهرع اليه
معانقا)

- ربنا معاك يا ابنى ، ربنا معاك ، ربنا يسامحك فى اللى عملته
واللى حتعمله فى روحك .

فؤاد - حتقرالى الفاتحة فى سيدنا الحسين يا على أفندى ؟

أبو ستيت - (يبكى) والله يا ابنى ، أنا اتمنى انى أرجع من البوليس
فلا أجذك ، اذا حبيت تهرب ولا من درى ولا من شاف . .
ولكن اذا جيت لقيتك (يتلعثم) ولقيتك . . (يبكى ثانية)
حافضل طول عمرى أترحم عليك وأقرأ لك الفاتحة فى سيدنا
الحسين .

فؤاد - (متنهدا) الحمد لله دلوقت أروح مرتاح . . . فيه انسان



فؤاد : يا ترى حنتقابل ؟ امتی ؟ وازی ؟ ولما نتقابل انا نقول لك ايه ؟
وانت نقول لي ايه ؟

فهمنى وحيفتكرنى بالخير .

(يخرج على أبو ستيت فى هدوء - فؤاد يقف قليلا الى جوار الباب مراقبا فى صمت - يخرج مفتساح الشقة ويضعه فى الخارج ويغلق الباب فى هدوء - يقف قليلا فى الصالة ينظر الى جنة العجمى ، ثم ينحنى الى الارض ويلتقط طربوش العجمى ويدخل الى حجرة المكتب وبحركة لاشعورية يضع الطربوش الى جوار معطف العجمى)

فؤاد - طربوش وبالطو ، أدى الى فاضلين منك يا ابراهيم يا عجمى ، هه ؟ يا ترى حنتقابل ؟ امتى ؟ واذاى ؟ ولما نتقابل أنا أقولك ايه وانت تقول لى ايه ؟ وايه يعنى انى موتك ، طيب مانا كمان حموت أهو ؟ ويبقى ايه الفرق بينى وبينك ؟ ماهو كل الناس بنموت حتى القديسين والشهداء والانبياء ؟ ايه الفرق ؟ ايه الفرق ؟ الموت مش انتقام مدام كلنا حنموت .

عجيبه ؟ مال قلبى ما بقاش فيه أى حقد أو كره لابراهيم العجمى ؟ هه ؟ أنا سامحتك يا ابراهيم يا عجمى دلوقت بس حسيت انك مسكين ، وانك جدير بالثناء يا عجمى انت اتخلقت كده ، انت كنت مغلوب على أمرك زى مانا مغلوب على أمرى دلوقت (ينظر حوله فى يأس وقنوط) خلاص خلاص الدنيا ضلمت .. أنا تعبان (يجلس على الكرسي ويأخذ المسدس بيده) عاوز أرتاح

(صفيح القطار من بعد) سامحنى يا رب انت الى خلقتنى وانت الى بتنده لى .

(ضجيج القطار - موسيقى - يشرع فى اسدال الستار تسمع طلقة)

(الستار)

تم والحمد لله

كتب للمؤلف

كتب سياسية

- ١ - ايماني
- ٢ - الارض الطيبة
- ٣ - وراء القضبان
- ٤ - الاشتراكية التي تدعو اليها
- ٥ - في ظلال المشتقة
- ٦ - قصة مصر (بالانجليزية
طبع نيويورك)

كتب اجتماعية

- ٧ - الزواج والمرأة
- ٨ - رسالة في الحرب
- ٩ - رسالة في المجد (العلم)

كتب رحلات

- ١٠ - مشاهداتي في جزيرة
العرب
- ١١ - يقظة العملاق (رحلة في
آسيا)

- ١٢ - أمة تبعث (رحلة في
الهند)

- ١٣ - من وحي الجنوب (رحلة
في منابع النيل)

كتب قانونية

- ١٤ - قضيه مقتل النقراشي
(مرافعة)

- ١٥ - قضية التحريض على
حرق القاهرة

- ١٦ - علاقات العمل

- ١٧ - مجموعة تشريعات العمل

مسرحيات

من الحياة

مسرحيتان اجتماعيتان

تحت الطبع

مسرحيات تولستوى (مترجمة)

- سلطان الظلام

- نور يبدد الظلمات


انتظروا

الكتاب القادم
قانون الطاقة الانسانية

تأليف

أحمد حسين

كتاب علمي يبحث في القانون الطبيعي الذي يحقق به الإنسان غايته ، والمدى الذي يستطيع الذهاب إليه في تحقيقها ، مستخدماً هذه الطاقة الإنسانية المبتوتة في كيانه ، والتي حوت سر الوجود والخلق والإبداع .



الطبعة الحالية ١٧٠٩ شاع منزوع قشور الشاهزة